


BESO

Halîs YURTSEVER





BESO

Halıs YURTSEVER

HELBEST

J&J : 174

BESO: Halis YURTSEVER

Koordinatör Weşan: Azad ZAL

Tedeyisazi: Murat KAN

Raştkerdoxê saziyê ziwan: J&J

Ripelsazi: JJK

Devicsazi: a. l. zerdeshtee

Pêkeyê Devici: J&J

Çapkerdişê Yewin: Citmeng 2016 [J&J - 2016]

Çapxane: Bizim Buro Matbaa Dağıtım Basım Yayıncılık San.
Tic. Ltd. Şti; Sanayi 1. Cd. Sedef Sk. No:6/1 İskitler
ANKARA Tlf: 0312 229 99 28 Fax: 0312 229 99 29

ISBN: 978-605-9302-24-1

Sertifika no: 22054

© Copyright: Ajans J&J

WEŞANÊN J&J J&J YAYINLARI

Capers: Medya Mh. 180. Sk. Zafer 2 St. A Blok Altı No: 5/C
KAYAPINAR /DIYARBAKIR

Telefon: +90 412 349 01 89

Mobile: +90 533 436 58 54

Email: ajansjj@gmail.com

Web: www.ajansjj.com

BESO

Halis Yurtsever, 12.07.1956ê de girêdayê şaristanê Çewlîgi de şaristanêkê(qeza) Gêxi dewa Dare-biye de mardayê xo ra biyo. Dibistano yewin dewa xo de dibistano ortên yewine şaristanêk Darrahêne(GENÇ)de wend o,polê diyin û hirêyin girêdayê Şaristanê Çewlîgi şaristanêk Kanîreşi de wend o. Dibistano seratayi jî navedê Çewlîgi de wend o. Tira peyi di serre zanîngeha İzmir de wend o. Dima ra dibistanê mamostayon girdê zî qedêna ya û biyo mamoste. Hewt serri girêdayê Çewlîgi şaristanêk Kanîreşe de mamosteyîye dewam kerd. Dima heştayra zî sey welatperw-eronê binan tabîyê surgunî biyo.Derbeyê heştay de neqlê aye veto Sêvaz î .Şaristanêk Yildizeli, Dewa Karxîni de panc serî mamosteyîye dewam kerd a û neqlê aye serra 1988ê de veciyayo şaristanê Hatayî qezaya Hasa...Ayerâ dima neqlê aye yî veciyayo şaristanêka Serinyolî. Wexto ke neqlê aye amêyî şîyo Serinyol a serre sendîqayê Egîl-SEN newe awan biya. Yew demê zî no sendîqa miyon de xebitîyayo. Serra 2004'de taqawit biyo. 2004ê ra peyî zî siyasetmedarê kerdene. Hîma zî Hatay siyasetmedarê xo dewam keno.Helbestan verri hezar û newsey û heştayê ra heyânê ewrô nuseno. Sed ra zêde helbestê aye yî estê. H eyonê ewro helbestê xo zafê zî çap nêkerdene.Kirdkî nuseno,kirdkî sero xebatê aye yî estene. Labelê tayê helbestê aye yî Kürmanciyê sero zî estene.

Eserleri:

* Ez Kamîrê Biberbêne (Helbest), Weşanên Veng, 2007 - Amed

* Beso (Helbest), Weşanên J&J, 2016 - Amed

TÊDEYÎ

- DERHEQÊ KITABÎ DE ÇEND VATEYÊ / 9
VATEYO VERÊN / 11
BESO / 15
NÊVERDA / 16
EZ TE NABÎNIM / 17
MECALA MI TUNEYE / 18
EZ MÊYYMANÊ TOWA / 19
XO MEXAPÊNE / 21
KAMÎ RÊ ÇI / 22
KOR MEBÊNE / 23
KOKIMÊ WELATÎ / 24
TI KE ŞÎYA / 25
BÎRÎNDARÊ MI / 27
ŞERM BIKERÊNE / 29
DERENGO / 31
ÇÛÇIKA LENGE / 32
EZ AXÛ HESRETA / 34
EZ XERÎBA / 35
MI CA MEVERDÊNE / 36
Zozanê welatî vile çewtê / 37
DÎKÊ ŞODIRÎ / 38
ROJ MIDE HÛNO / 39
KANÎYÊ BIZÊBANAN BERBENO / 40
GELÎYA ZILAN / 41
MA BÊKES MENDÎME / 43
TI QEY NÎYMA / 44
LO BIRAWO / 45
DE ŞO / 47
NÊŞKÎNA FIRDÊNE / 48
EMSER / 49
HEWNÊ ŞEWAN / 50
BÊ XÊRET MEVINDÊNE / 51
TI AMEDA / 52
NÎ CA DÊRSIM O / 54
DERDÊ SERRÊ DERDAN / 56
EZ DOMANÊ KÛÇANO / 58

MI MEKIŞËNE / 60
LÊ XERÎBÊ / 61
BIRAWO BÎRÎNDAR / 62
XEMPLÊ WELTÎ / 64
TEYNA MENDA / 65
EZ KE FIRDÊNE / 66
KES HALÊ XERÎBAN NÊZANENO / 67
BÛRÎSKÎ JENENÊ / 68
DERD GIRANÊ DAYÊ / 69
VA HELBESTAN GOTINÊN DAYÎKA MI FÎKRÎYAYÊ NE / 70
DEWÊ MA BERBENÊ / 71
KESRÊ MI ZAFO / 72
WELAT MARA HÊRSO / 73
DE RAVAZE CÎRANO DELAL / 74
ŞARÊ MARA SILAMÊ MI VACÊNE / 75
TI MENALE / 76
KANÊ MEYÎTÊ MA / 78
HESRETA ZERRÎ MI / 79
TORÊ CÎ NÊMEND / 81
ŞERWANÊN AZADÎYÊ / 83
 BIRÎN KÛRO EZO / 84
ÇEWLÎG ŞÎRÎN O / 85
BÛRÎSKÎ JENENÊ / 86
WELAT XEMGÎNO / 87
MA MEXAPÊNE / 88
EZ HEWNÊ XO DE WELATÎ VÎNENA / 89
XEZEB MA RA VARENO / 91
MA MEXAPÊNE / 92
ÇILÊ MEZРАНÊ DAREBÎYE NÊVÊŞENE / 93
EZ KOR BÎYÊNE / 95
EZ XEMGÎNA / 97
GONÎWERÊ NÊVINDENE / 98
TI BIVÊŞAYENE PARÎS / 99
EZ BÎYA PEPÛG Û GOYÎN / 101
AX LEMINÊ WAY FELEKÊ(SITRAN) / 102
DE MEBERBE / 104
ÇEMÊ PÊRÎYE / 106
GORGEÇÎNÊ AŞTÎYE / 108
SERHÎLDANÊ KOBANÊ / 109
DE BIBERBE / 111

DÛRÎ QAYT KENA / 112
BÎRÎN KÛR MAYÎ ME / 113
QEY VILE ÇEWTA / 114
TI AXÎNA MI NA / 115
ZOZANÊ WELATÎ / 116
ZERRÎ MI VÊŞENA / 117
EZ HESRETÊ ŞIMAWO / 118
XO MEPESÊNÊNE / 119
HAWARO / 120
BEYBÛNÊ ÇOLE / 121
WILE KE TI RINDÊK A / 122
ROŞTÎ / 123
BIRA TEKÎN / 124
AX KOBANÊ / 125
ŞIMA XEYRE AMEYE / 126
DE BÎRÊNE / 127
ÇEWLÎGÊ RA SILAMÊ MI VAJÎNE / 128
EZ KÊF WEŞA / 130
VENGÊ MA BIHEŞNENE / 131
TI HEWNÊ MIDERA / 133
HÎN BESO / 134
MÊYMANÊ MI AMÊ / 135
PIRSÛS(SÛRIC) BERBENO / 136
XERÎBÊ WELATAN / 138
ADIR VARENO / 139
DAYÎKA FIKRÎYA / 141
RENGÊ PAYÎZÎ / 143
NÎ MA RA ÇI WAZENÊ / 144
TI KAMÎ PERSENA / 145
DARÊ Û KEMER ŞIMARÊ HELÎNO, / 148
RINDEKÎYA WELATÎ / 151
NÎ HARBÎYÊ / 152
BIVARE / 154
DE TI VANA / 156
ZÎNDANÊ XALFETÎ / 158
SÎSTEM O BÊAR / 160
AX CÎZÎRA BOTAN... AX! / 161
ŞIMA AXÎNA MINÊ / 163
SÛR XEMGÎNO / 164
ZERRÎYA XO CAMEVERADEYENE / 166



DERHEQÊ KITABÎ DE ÇEND VATEYÊ

Wendekarê mayê ercayî, Weşanxaneyê J&J yew kitabê kirdkî newe reydi hemvere şima do... Nî xebatê yew het ra kirdkî benê aver yew het ra zi hîson de.vateyon de nuştoxon de kirdkî rî tercûmanê kena.Ma zanayene ke tewir na xebat çina beno va bibo rencê nuştoxon ma veng nêşona. No qayide kitabî ke ma newe çapkerdo aye semedê zi biviyarte yo...

Nî kitabê helbestî de nuştoxê ma hîsê xo erdê zîwan.... Rojeve ma ra zafê çîyî ancina erdê ma vîr... Nî hîsê nuştoxê yew tewir hîşmendîyê ma wendekaronê zi yo.Na semedê ra ma nî xizmetê ke done wendekaron xo ercayo, ma peyî na xebatê.na xizmetê zafê zi keyfweş benê.

Ma na xebata ercayâ semedê nuştoxê xo Halîs YURTSEVERê ra vone ke berxudarî bî bîrêz Halîs.... Wendoxon xo re zi serfirazê wazene ma....

J&J



VATEYO VERÊN

Ez kamecî rojê, aşme ,serre de mardayê (dadiya) xo ra biya raştiya ey ez î nêzanena. Nasnamê mide 12.07.1956 niviseno raşt niyo. Rojê mi dadiya xo ra persa, ez kamecî serre ama dinya, va lajê mi ti serra ke Eliye Mistefa axayê dewa Êkmalera şî İzmir de merdo, ti a sere dadiya xo ra biya. Goreyê nasnameyî ez sera 12.07.1956 de giredayê şaristanê Çewligî şaristanêkê(qeza)Gexî (Kiği) dewa Darebiye de(Sütlüce) amayo dinya. Mi dibistano yewîn dewa xo de wend. Wexto ke ez şîya dibistan, mi tirkî nêzanayene. Ez tirkî dibistan de mûsa yo. A dem de mamostayon, Kürdi qedexe kerd bi. Şodirneke ma şiyene dibistan wexto ke mamoste ameyene polê, ge-ge qaytê bine zonê ma kerdêne. Mamostayon no gûre dênebe hevale de sinifa ma. Ey kam nivisnose mamostî dêne inan ra. Mi sera 1966 de dibistana seretayî qedêna. Serra 1966- 1967 de dest be dibistano navî polê yewîn şaristanêkê(qeza) Çewligî Darahêni (Genç) de qeyd biyo. A wext Darahêne de zono a bîn Franansızca bî. Polê diyin û hîrêyin zî şaristanêk(qeza) Çewligî Kanîreşî de wend. Dibistana hadreyîye û dibistano girda mamosteyîye zi Çewlig de wend. Mi panc serî navenda Kanîreş de, di serî zi giredayê Kanîreşî taxa Kela de mamosteyîye dewam kerd. Serra 1983 de neqlê mi(surgin 1402 ile) vete be şaristanê Sêvazî şaristanêkê Yıldızeli dewa Karkinî.

Na dewede panc serre mi beşdariye hevala xo mamosteyîye dewam kerd. Serra 1988 de mi neqlê xo waşt şaristanê Hatayî. Şaristanê Hatayî de di- hîrê sere şaristanêkê(qeza) Hasa de xebetîya yo, uca ra zi mi neqlê xo girewt girêdayê şaristanê Antakya Serinyolî. Ez wexto ke amayo Serinyol Sendîqa Mamosteyon Eğit- SEN û Eğitim- İş newe awan biyebî. Ez a wext endamê Eğitim-SENê biyo. Tabî dima nî wûrd Sendîqayon hezê xo kerd yew bî Eğitim-SEN. Mi poncês serre sendîqa de karê xo dewam kerd vîst û hawt serî zi mamosteyîye dewam kerd. Ti raştiye perse mi mamosteyîye ra zi, sendîqa ra zi zêde heskerdêne. Mirê wûrd zi zê kêye mibî. Hîna zi wexto ke ez şona navenda Antaqya wexto ke nêşorê Şaxa Eğitim-SEN î xo de kemîyîye vêneno. Mi nî wurd keyon xo yê delalîyon ra 30.08.2004 de xatir waşt û taqawît biya.

Nika zi ez newe zîndanî ra vecîya yo. Çend serrê mi helbestî û çîrokê kirrî hadre kerdî. Çend serra na xebatê xo ez dewam keno. Girêdayê Antakya Serinyol de roşeno.

Derheqê zonê dayîke de zi ez sera 1978ê ra na het serê zonê dayîke nivisneno. Zikmakîye mi zi zaravayê dimilkî ya. Domantîya mi dewa mide derbaz bîye. A dem de dewanê ma de pîrikon ma zaravayê dimilkî (kirmanckî) û kurmancî qesî kerdene; dewa ma de zî pîrikon ma Dimilkî qesîkerdene. Zaravayê Kûrmancî zi perikon ma zanayene. Derheqê kêyan ma de pêrkûne kilamê govende vatêne ayera herêma made kêyeyê ma ra vanê keyeyê dengbejanî (sitranbêjan). Wexto ke va ke Elî Axayê Darebîye ma ra henî vatêne. Kalike mi Elî axayê wexto ke govende de yewê maqamê kilame çewt bivatene se cade govende dêne vinetene ebe xo a kilame newera vatêne. Texmîne mi ez şeş serre bîyo kalike mi merd o. Pîrika mi zi dengbêj bîye. Pîrika mi girêdaye Çewlîgî dewa Belezerê ra ya. Wexto ke hîna kê nabîya keyeyê kalikê mi şîye biwazêne. Vanê ma kêna xo nedanîme, a waxt pîrika mi kalikê mi sero kilame vana.

Şarî bego, mi beglero,

Şarî Kurdo, mi axlero,

Daye gêna. bawo gêna.

Bê Elî Axay çaw nêgîna.

Na kilame wexto ke pîrika mi vate bî hîna demê Osmanlîyan bîyo. Ez qaytê vatenanê pîrika xo kena Gramerê Kurdîyê, zaravaya dimilkî. Dayîka mi Fikrîya zi dengbêje bî. Heremê ma Karer û dewa Darebîye nî vatenanê mi rindek zanê. Wextê kalikanê ma de derheqê zonî de ne dibistan bîyo, ne zi keso wendox bîyo. Çand û hûnerê ma, saya dengbêjan û çîrokvananê marêyanê ma de biran û domanê apanê mi pêrkûne zi dewa dengbejîye kerdêne. Raştîye ser herêma Karêrî de xêrce keyeyê ma xêlî sitranbêjî bî. Ez şikîna vajo her kêye de sitranbêjê bîyê. Derheqê sitranbêjîye de heremê Karêrî dewlemende bî. Derheqê zonî de, ez vana dibistanê mi dewa mina, keyeyê mino. Hetê helbest û nivisîyayîş de zi, ez oncîna çimeyê xo; kalikê xo, pîyê xo, pîrika xo, dayîka xo, apê xo, dewa xo û herêma xo vînenno. Heto bînde serê mi tesîrê Seydayê

Cegerxwîn, Feqîyê Teyrane, pîrê dengbejan Evdalê Zeynike, Filozofê pîl Amedê Xanî, Meleye Cizîrî û sitranê Klasîkê Kurdî serê ma xelî tesîrê nînan bî. Ayera ez helbestanê xo bi zarava dimilkî û a bîn zarava kûrmancî nuseyeno. Ez ciyayîye nêkeno mabênê zaravayonê Kurdî de.

Ez vana werrek na mi Zaravaya Soranî û Zaravaya Gorî-Lorîzi bizanayene. Wexto ke ez dimilkî nuseno ez xo. dewa xo. şare xo. welatê xo tede vîna. Helbestanê xo de zi ez nînan ano zîwan. Heyonê nika zonê ma qedexe biyo, ayera materyal zi çinîbiye. Ma pêro naye rind zanayene ke zaravayê dimilkî zaravayê dewlemend a. Make wayîr nêvecîmese zarava dimilkî se bena zonê wêjî. Wexto ke ez nuseno çend hewê zi ez çekuyon ra saeton reydi ferhengon ra, pûrtikon ra, koveron ra gêreno ke çewt nêro nuştîş. Zonê ma hezar serrawo ke bîn desto. Heto bînde ti qayt kena dengbejê de zi Girapetê Xaçoyê Kurd nêyo zonê kurdan rê xizmetê de zaf pile kerda. Ma qey serê zonê xo kar mekime. Ez vengê pêroyê Kurdan û şaranê bînan zi dana. Herçîye ke destra ci xebat ênose dûrî mevindêne. Serê zonê dayîke ez sera 1978 nat xebatê xo dewam keno.

Wexto ke ez nuseno semedê yew çekûye çend ferhengan ra ewnîyeno. Waştîşê mi,ayo ke gramêrê Kirdkî bêro nuştîş. Heyanû roje ewroyê zi Bakûr de dibistanê ma çinîbiyê. Ayera herêmanê ma de qalkerdiş ciya ciyawo. Kêmasîya zonê ma heyanû roja ewroy zonê pûrtîkî çinîbiyo. Aye ra herêman de, dewan de, şaristanon de ciya ciya ameyo qalkerdiş. Wexto ke zonê pirtûkî bibîyêne ewro roj Kurdan çar parçan de yewbîn ra qalkerdiş de fam kerdêne. Heto bîn de zi ez vana heyano ke weşbî ez ciyayîye mekerêne mabênê şaran. Biratîya ma biratîya raştkenê. Herçî mordemo welatperwer kotî esto ma pêrkûnera vanîme bira.

Ez heyanûk taqawît biya çar reyê surgin kerd o, çalekiyan de di reyê xeber a mergê mi ameye Antaqya. Mi des serî serekîya partîya DTP, BDPê şaristanê Antaqya û Çewligî kerde. Ez di reyê zî kewto zindan. Ez sera 30.05. 2016 de newe zindan ra vejîya yo.

Halis YURTYSEVER

BESO

Berbişê dayîkan rê vajîyeno beso,
Kıştena xort û kênan rê vajîyeno beso,
Koçkerdena dewican rê vajîyeno beso,
Kamo ke keserîn o derdê dînan rê vajîyeno beso.

Beso bira domanî sey memanê ne,
Bira veyvê dest henî, vile çewt memanê ne,
Mordem rewşê şarê marê, tar beno xerq beno,
Zê vara amnanî, daymiş nêbeno, helîno.

Bêrêne ma nî berbişî pîya bidime vinetene,
Marê darî deraman bivînêne, alîkarbêne,
Henî dûrî mevindêne, mara sêr mekerêne,
Nî xezebî ra, qetlû qûtalî ra, pîya vajiyeme hîn beso.

Sewalê çole nî xezebî rê vanê beso,
Koy berbenê vanê beso, mekerêne,
Dar û berê zozanan amo zon, vanê beso,
Na biratiye nîya, koletîya, ma koletîye rê vaniyeme hîn beso.

Kes be vatenanê şima bawar nêyo,
Şarê ma şimara heyânû roja ewroy, bêbextîye dîya,
Bîr û bawarî ya ma, şimarê çînîya,
Ma bêbextîya şimarê, vaniyeme hîn beso.

22.12.2007

NÊVERDA

Ma pîya jiyana xo derbaz kerdêne nêverda,
Ma pîya hûyêne. pîya berbêne nêverda.
Ma pîya rindekîya jûbînî zanitêne nêverda,
Ma zonê xode. nasnamê xode. rengê xode pîya rindekî me.

Ma jûbînîrê zê waye. zê biraybîme, nêverda.
Ma dewicê jûbînî. Cîranê jûbînî bîme nêverda,
Hevaltîya ma zaf rindek derbaz bîyêne nêverda,
Ma zonê xode, nasnamê xode, rengê xode pîya rindekîme
nêverda.

Ma veng danîme, vengêde berz vengdanîme bêrêne
Ma qadê aştiyede pîya serbilind vindime azadbîme,
Goştariya dek û dolabanê bêbextan mekerêne,
Ma zonê xode, rengê xode pîya rindekîme nêverdanê.

Zozanan de, betlanan de, waran de pîya gêrêne nêverda,
Bêriya pesîde, şuwane tiye û gabantiye de pîya bîme nêverda,
Ma roja tenge de, hîratiye de pîya bîme nêverda,
Ma zonê xode, rengê xode, nasnamê xode pîya rindekbîme
nêverda.

De bilorne dayîka derd girane, bê dermane bicorne
Vengê xo berz ke ,nî bêbextê veng nêheşnenê,
Bira şervanê azadiye vengê to biheşnêne,
Ma zonê xode, rengê xode, pîya rindekîme

27.12.2007

EZ TE NABÎNIM

Ez bilind temaşe dikim, te nabînim,
Dîsa temaşêdame, dûr mêze dikim te nabînim,
Ez ebe herdû roşnahê xwe temaşêdame, dîsa te nabînim,
Carê bikeve ber ronahîyên mi ez te bîbînim.

Ez hesreta teme, gorîya teme, heyrana teme,
Çîqa dinalim, dikalim bona dîyîna te,
Tû taqata minî, sebra minî, axa minî, rengê minî.
Hûn hemû ronahîya herdû çavê minin.

Îsal ronahîyên mi lél bûne, nêzik jî nabînim,
Taqata dilê mi şikestîye, taqat nemaye,
Aborî û tendûrîstîya mi jî ne başe,
Ez vê nebaşîyê de temaşêdame, te nabînim.

Ez bê hêvî û bê kes, bê taqat mame,
Dil bîrînim, derd giranim, çavê min li hatina weye,
Ez vê rewşê de, dîsa temaşêdame, te nabînim,
Were were heval were, em hevû din helalîyê bûxwazin.

Ew gelîyê teyê fena bûka dest hene,
Ew zozanê teyê xemîlîyê reng bi reng,
Bi herdû ronahîyê xwe temaşê dame te nabînim,
Ez hesreta teme, gorîya teme ey welat.

Ez te dûr ketime, pir dûr ketime,
Destê xwe dirêj dikim, pelekî dara daristanê te,
Gule kî zozanê te, dest mikeve ne mumkûne,
Ez hesreta ava teme, gula teme, zozanê teme ey welat.

02.01.2008

MECALA MI TUNEYE

Ey dil birîn û derd xûrê derdan,
Ey dermanê hemû kul û birînan,
Ey zanyarê hemû dozan,
Mecala mi tuneye, ez bê halim.

Ez bê dermanim fena Hûsê jar,
Ez derd giranim fena Nazê,
Ey hekîmê cîhanê, miraç derman,
Mecala mi tûneye, ez bê mecalim.

Ez dermanê hemû derdê xwe digerim,
Zanyar bi zanyar, bijîk bi bijîk digerim,
Digerim nagerim derman nabînim
Ey hekîmê hemû derdan, ka mirajî derman.

Derdê serê derdan, derman nabîne,
Cot kanîyê mi lêl bûne, ez dûr nabînim,
Fena Nazê bê hedûrim, derd giranim,
Ka mecala mi nemaye, ez bê mecalim.

Çendek û çend sale, ez digerim,
Bijîşk bi bijîşk, dîsa dermanê mi tuneye,
Ez birîn kûrim, derd giranim, lomanê ez dinalim.
Mecala mi nemaye, ez bê mecalim, bê dermanim.

09.02.2008

EZ MÊYYMANÊ TOWA

Welatê mi, sarê xo berz ke qayt ke,
Ez mêymanê towa, cîranê towa,
Çendek û çend serîyo, ez hesreta towa,
Xerîbîye zora, ma nêmusayme, macîrtîye.

Koyê toyê berzî, awa towa serdine,
Zozanê toyê reng be rengî,
Hewnê miderê, xeyalê miderê,
Ez bi dil û can, tora heskena welatê roje.

Welato rengên,
Sebeno mara hêrs mebe,
Terk kerdîşê welatî, ma destê nêbî,
Ti zana, ma hesrete toyme, ti axa zerê mawa.

Ewro çarê mino, ez ama welat,
Ez ewro meymanê towa, xerîbê, towa,
Welatê mi, mara helal ke,
Ti welatê mawa, hewnê şewanê mawa.

Ez ama welat,
Ama bîya meymanê velatê xo,
Darû berê welatî jî, selam danê mi,
Vanê ti xêr ama, meymanê welatê xo.

Kûlîlkê welatî û sewalê welatî jî mira persenê,
Vanê meymanê welatê xo, ti xêr ama welat,
Ma jî zê şima hesretê xerîbanê welatîme,
Şima xêr amê axa welatê xo, xêr amê.

Ey welatê dil bîrînan,
Kesrê to çîqa zafo, şarê torê,
Ti çîqa kesra, honday jî şîrîna,
Ez meymanê towa, ax û hesretê towa.

Destê mi axa tora nêbeno,
Ez ebe vile çewtîye, şona xerîbiye,
Ez şona defê de bîn key êna, kam çizano,
Coka ez vana mira helal ke, ez meymanê towa.

Ey welato delal û ser bilind,
Mordem qaytê zozananê to keno, mest beno,
Koyê to marê timî sitar û ser destê,
Ti axîna zerê mawa, hewnê şewanê mawa.

Defê sarê xo berz ke, qayt ke ey welat,
Meymanî şonê, xatir wazenê,
Vanê na welatê ma de kam esto, mara helal kerone,
Welato ser bilind, ti şoretê mawa, axîna zerê mawa.

Şorêne şîmarê oxûrbone,
Şîma wayîrê welatê xoyê, axa xoyê,
Ser bilîndê welatê xoyê, oxurbone,
Şîma xerîbê mayê, oxûrbone, şîmara helal bone

12.03 2008

XO MEXAPÊNE

Sebeno ne xo, ne jî şarê ma mexapnê ne,
Vanê her vaş serê koka xo kewe beno,
Vindêne majî zê vaşi, serê koka xo kewebime,
Hîn beso, ne xo, ne jî şarê ma mexapnê ne.

Ez vengê şarê mayê ser bilindî dana,
Pê vatenanê sistemê qilêrî qan mebêne,
Goş serê welat parêzanê xo, rewşenbîranê xodê ne
Pê nînan qan mebêne, hezar sera nî ma xapnenê,

Qaytê dayikanê makerêne, ebe zonê xo lornenê,
Ebe zonê xo berbenê, ebe zonê xo qal kenê.
Dêranê xo, ebe zonê xo vanê, ebe zonê xo, veng danê.
Marê beso, ne xo ne jî şarê ma, mexapnêne.

Sistem şîma xapneno, pê sistemê qilêrî, qan mebêne,
Zonê ma jîyana mawa, nasnamê mawo, rengê mawo,
Mordem ebe zonê xo êno nas kerdene, beno azad,
Hîn beso, ne xo, ne jî şarê ma, mexapnêne.

Şîma mara şerm nêkenê, daîkanê mara, şerm kerêne,
Ma hezar serawa ke pîyayme, a cîrantîya mara şerm kerêne,
Heqê cîrantîye barê xo girano, a cîrantîyera, şerm bikerêne,
Endî beso, ne xo ne jî şarê ma mexapnêne, fedî bikerêne.

13.03.2008

KAMÎ RÊ ÇI

Ma warbay me, viranîme,
Kamîrê çî,
Ma bê kar, bê gûrey me,
Kamîrê çî.

Ewro roj zimistano,
Dewan de, bijîşk çinîyo, derman çinîyo,
Ferman destê sîstemî qilêrîdero,
Kam mireno, kam maneno, kamîrê çî.

Nêweşî, dewan de zîbenê,
Derdê xorê, jîyana xorê, bê kesîya xorê,
Berbenê, lornenê, vanê alîkarê mabêne,
Kamîrê çî.

De bilorne, biberbe, bêkesa mi,
Şewqet çinîyo, alîkarîye çinîya,
Ti jar menda, bê kes menda,
Kamîrê çî.

Kalê ma, dayîkê ma, weîd mendê,
Bê kes, bê waîr mendê, alîkarîye wazenê,
Nêweşî nalenê, zîbenê, kesoke alîkar bone çinîyo,
Kamîrê çî.

Çimê kalan û pîranê ma, lél biyê,
Henîke jariya xorê berbê, dûrî nêvînenê,
Her tim jariya xorê, bê kesîya xorê berbenê.
Kamîrê çî.

02.04.2008

KOR MEBÊNE

Şima zê koran, qaytê ma kenê,
Şima made lal kî, qal kenê
Şima xo no kertîyera, vanê ma nêheşnenîme,
Şima mara rindêrî vînenê, rindêrî heşnenê.

Sebeno, ebe çimanê ma qaytê welatê makerêne,
Şima defê ebe çimanê ma, ebe axîna zere ma qaytkerêne,
Zê xo nê, ebe ax û hesreta ma, qaytê welatê makerêne,
Zê ma qaytê welatê makerêne ke, çîqa kemasî yê şima estê.

Şima timî zê xo, qaytê welatê ma kerdo,
Şima zê xo heşnenê, zê xo vînenê, zê xo kaykenê,
Sebeno, ebe çimê biratîye, qaytê welatê makerêne,
Ebe ser bilindîye, pê çimê biratîye qaytê makerêne.

Kam korê welatê xo, azadiya xo, şarê xowo,
Kam korê, xort û kênanê xo beno,
O kamo ke korê, nasnamê xo, zonê xowo,
Şima nînan rind bizanêne, rind bivînê ne.

Nî vengê ma rind biheşnê ne,
Axa zerê ma, birînanê ma bizanê ne,
Şima ma zê xo, zê bira bizanêne, bivînê ne,
Kor mebêne, zê ma qaytê welatê makerêne.

Bira welatê made jî gelo bindest azadbone,
A wext şewq û şemalê azadiye, bilind beno,
Xo dano her cayê welatî, a wext ma benîme bira,
Bêrêne ma hevaltîye de, cîrantîye de bibime jû.

14.04.2008

KOKIMÊ WELATÎ

Kokimê welatî,
Melûl melûl qayt kenê,
Kokimî bê hêvî, bê cîran mendê,
Kokimî xemgînê, bê hêvî yê, bê kes mendê.

Ewro roj, tîce eşto her cayê welatî,
Zozanê welatî, veroc û zimê welatî,
Reng be rengê, ti vana veyvika xemelnê,
Ti radî kena ke, qaytê welatîkerêne.

Verojî xemelîyê, kokimanrê çî,
Zozanê welatî, reng bi rengê,
Kokimanrê çî, kokimanrê, alîkarîye lazima,
Kokimanê welatî, gorê xo zaf dîyo.

Endî kokiman rê wer lazimo,
Şewqet lazimo, hêvîtiye lazima,
Kanê o şewqetê verî, hêvîtiya verî,
Kokimî ax û hesretê welatîyê, axa xoyê.

Çimê kokiman rayera şiyoy, qayt kenê,
Î hesretê xerîbanê xoyê, cîrananê xoyê,
Vanê ma xewzil defêna, jûbînî bidîyêne,
Kokimî ax û hesretê înan, kûnê ra wazenê ra.

Hewcebîne zora, zaf zora,
Îlam jî, kokimtiyede zora,
Kalê ma, hêvîtiye û alîkarîye wazenê,
Sebeno, nî vengê ma, biheşnêne kokiman bê waîr meverdêne.

22.05.2008

TI KE ŞİYA

Tike şîya
Ma zaf poxzîn bîme,
To defê pey xo de qayt kerdê ne,
Ma şîyana torê çîqa poxzînîbî me,

Tike şîya,
Cayê to zaf asêne,
Zerê kêyî de, to vatê teyw kes çînîyo,
Kê îpte îsiz bî, ne veng bî,ne kes bî.

Ti ke şîya,
Xem û xîyalê mi,
Tey to, şî welat,
Ez tey to ebe xîyalan, welatra gêrêne,

Ti ke şîya,
Şûna to, henî asêne, ma vatê ne,
Kêwer beno ya, ti nika êna,
To defê pey xode qayt kerdê ne ke, kam berbeno.

Eya pîrika Şukrîya ,
Oxûrbo ti şîya welat,
Ronîştene to,ravaştene to,qal kerdîşê to,
Hetê ma mend,çira ke ma, rewşa to qesî kenî me.

Pîrika Şukrîya, oxûrbo ne,
Ti pîrika mawa, ebû cedê mawa,
Ti tew caran ma vîrera nêşona,
Ti pîrika mawa, ser bilinda mawa,

Ti ke şîya,
Xebatê to, jîyana to amê vîra mi,
No honday kedo nazik, araqê çarê to,
Kotî mend , qey cayê nîyaseno, qey.

To qar û qotikê na aleme, xêlî dî,
To heyânû roja ewroy, her tim xewetîya,
Pêrkoyê domananê xorê, çi bî arde şûne,
Nika jî koma domanan vilawa, hergû jû welatêderê.

Ti ke şîya
Ma vile çewt û, xemgîn bîme,
Kam çizano, ma defêna jûbînî vînenî me,
Vile çewtîya, ma poxzînîya ma ayerawa.

Ti ke şîya,
Ma poxzîn û vile çewt verdayme,
To mara xatir waşte û ti şîya,
Şo pîrika şukrîya şo, torê oxûrbone.

Pîrika Şukrîya, kedkara zile,
Ticî mara helal ke,
Ma kedê to, zaf werdo, no ked caran vindî nêbeno,
Pîrika Şukrîya, belkî ma defêna jubînî nêvînenîme, helalke.

23.05.2008 SERÎNYOL

BÎRÎNDARÊ MI

Menale hevalê mi, menale,
Bîrîn kûrê mi, menale,
Ti çiqa bîrîn kura, ez zana,
Menale bîrîndarê mi menale.

Hewnê şewan, şima vîramiderê,
Ez senê kar û gûre bikerêne,
Tew caran şima mi, vîrera nêşonê,
Çira ke, ez bîrîn kûra, ez dayîka dayî ke.

Sebeno mira dûrî meşorêne,
Mi honday ax û hesretê xo mekerêne,
Şima taqatê minê, roşnaha hûrdî çimanê minê,
Sebeno mi bê omîd meverdêne, ez axû hesretê şimawa.

Ez gûneka, bê kes menda, bê taqat menda,
Ax ke şima nî vatenê mi biheşnê ne,
Jû defa bîyamêne, ma jûbînî bidîyêne,
Ebe hesretê dayîke, mi virane bîyardêne şimara.

Ewro nêweşa, zaf bê hala,
Mecalê mi, taqatê mi nêmendo,
Taqat çokanê mide nêmendo, ez bê hala,
Sebeno nî vengê mi biheşnê ne, ez axû hesreta şimawa.

Şima her wext, verê çimanê miderê,
Şima sebra minê, taqatê zerê minê,
Şima her tim hewnê miderê, xem û xîyalê miderê,
Ez na kalîya xode, bîrîn darê şimawa, ez dayîka dayîke.

Bê bê nêzdî bê, bîrîn kûrê dayîka xo,
Bê şewê bibêne meymanê dayîka xo,
Bêrêne ez bi hesretê dayîke, bîrînanê şima bîkewênê ne,
Şima mirê gul û sosinê welatîyê, pîvokê verê vareyê.

Mezra qûrbete verê gilê koyde ra ,
Şewê bêrêne meymanê dayîka xobêne,
Dayîka Zerîfe, axû hesretê şimadera,
Mehemedê mi, Heyderê mi, axû hesretê mi de bêrê.

Mi na ax û hesrete de meverdê ne, ez dayîka dayîk,
Zerê dayîka şima, şimarê zê ronê tawîke helîno,
Zê awa çemê Pêriyê hêrikîno, har bîyo nêvîndeno,
Mehemedê mi, Heyderêmi, ax û hesretê mi de bêrêne,

Ey şehîdê Kûrdistanî, ax û hesreta dayîkanê xo,
Şima pêrko mirê Mehemedê minê, Heyderê minê,
Defêna jî şima ser bilîndê welatê mayê, şoretê mayê,
Ez ebe ax û hesreta dayî ke, şimarê silamê xo rûşnena.

07.06.2008

ŞERM BIKERÊNE

Mordem hevalanê xo ra, heya keno,
Cîrananê xo ra, heya keno,
Şarê xo ra heya keno,
Nêşkîno qaytê înan kerone.

Sebîyo şimarê, çi cirîyo,
Şima qey çep û rastê xo nêzanenê,
Ez şarê mayê Çewlîgîrê vana,
Şima mara şerm nêkenê, î şehîdanê xora şerm kerêne.

Rind goş serê midê ne, a alîkarîya ke, şima danê, sistemê qilêrî,
Bena bomba, serê welatîra, zê varayîş varena,
Sebeno, şarê xo, welatê xo, ebe des peran meroşêne,
Ma azadî û serfirazîya pêrkoyê gelan wazenîme.

Çewlîg, meskenê şêr û egîtano.
Bacarê kurdan, mewzîyê mêrxasano,
Welatparêzîye pê peran nêna herînayene,
Çewlîgciyan qaytê dîroka xokerêne şerm bikerê ne.

Sebeno Yadin paşa yê dimilî ra,
Xayrî Dûrmîşê Xoşkare ra,
Memed Qarasûngîrê Karê rî ra,
Fede bikerêne, şerm bikerê ne.

Sayîd Elçiyê Takolan ra (Zeynebera)
Tekîn Qişînê Cafıranra,
Zekî Palabiyêxê Dara Hênera
Şerm bikerê ne, heya bikerêne.

Sebeno nî vatenanê ma, biheşnêne,
Lawomet, mixenet, cerdewan mebê ne,
Ser bilind û welat parêz vindê ne,
Çewlîg meskenê Şêx Şerîfiyo, kanîyê mêrxasano.

Nadîre Kale û Özgür Bînîcîyê dewa şîrnan ra,
Herçî şêr û egîtê navça Kanîreşe ra
Denîz Demircîoxlî yê Darebîyera,
Seyîd Hesenê Karêrî ra, şerm bikerê ne fedî bikerê ne.

Îbrahîm Încedûrsinê Dara Hêne ra ,
Harûn qomitanê Xolxolî ra,
Gûrbetelî Ersöza Zivêrî ra, Feqî Hesenê Modanra,
Pêrkoyê şehîdanê mara şerm bikerêne fedî bikerê ne.

Sebeno Şêx Seyîdê kalîra, Şêx Şerîfê ser bilindîra,
Şêx Abdulayê Çanîra, Baba beg û Kamil begê Kanîreşera,
Hecî Sadiq begê eşîra Zikte û hevalanê eyra,
Şerm bikerêne, heya bikerêne, hîn beso, bêbextêne.

08.06.2008

DERENGO

Ewro jî roj şîyo kora, şano,
Ez xêlî dereng kewta,
Nêresta hevalanê xo,
Hevalî rewra şîyê .

Mirê derengo, mi rayekerêne,
Ez şorêne, biresêne hevalanê xo,
Derengo, hevalî serê mi mevindêne,
Mi dereng mefinêne, ez biresê hevalanê xo.

Lo lo rêbiyo hevalo lo,
Ser bilindo, şewqeto, serfirazo lo,
Ti şona mîyanê hevalan, silamê ma vace,
Vace şima sebra mayê, ser bilindê mayê.

Dewan ra, navçanra, bacaranra şimarê,
Ebe hezaran, silamê şarê ma esto vacêne,
Şima rûmetê mayê, ser bilindê mayê,
Defêna jî şoretê koanê mayê, meymanê mayê.

Hevalê delalî, dereng mefinêne,
Rêbiyê ma, meymanê ma rayefiyêne,
Kemasiya meymanî bivînêne,
Heval, ti şona, torê oxirê xêrî bone.

De şo şo ser bilindê dayîka xo şo,
Vatenanê to, ez helêna, qedêna şo,
Şima piştîya mayê, taqatê hermû doşanê mayê,
Dereng mekûye şo, heval şo, ser bilindê dayîka xo şo.

09.06.2008

ÇÛÇIKA LENGE

Çi lerzena, ricifna,
Kesê to çiniyo, qey teyna menda,
Şima caran teyna nêgêrenê,
Bê nêzdiyê mi, ma ronîşime, qesikime,

Ti çi persena, çi lewnena,
Ez birîndar kewta, lengena,
Refê hevalanê xora, tepîya menda,
Hayîya hevalan mira çiniya, ez birîndara.

Çûçika lenga,
Bê meymanê mabe,
Meterse macî hevalê toyme,
Ma zê biran pîya derbaz keme meterse.

Ewro çarê mino, ez na haldera,
Dormê mide, wer û werdox jî nêmendo,
Ewro çendê mino mi awe jî nêwerda,
Mirê alîkarîye û wayîrtîye lazima.

Perê mi jî mide yar nîyê, birîndarê,
Ez nêşkîna firdêne, ka mirê derman bivînêne,
Pê jû linge, pê jû pere ez gere sekerî,
Mirê alîkarîye, mirê wer biyarêne.

Ez xeşimê nî welatî ya, newe ama,
Emser mi, bikerêne meymanê xo,
Hevalê mi şiyê ez vile çewta, bê hêviya,
Mirê alîkarîye bikerêne, mi hevalanê mi resnêne.

Çûçika lenga
Ti meymanê mawa, şoretê welatê mawa,
Ti xêr ama welatê ma, çiman ser ama.
Ma merdîme pîya, mendîme pîya.

Çûçika lenge,
Ti çi wena, çira hes kena vace,
Ma alî karê tobime, ti endî xem meke,
Ti nêzdîde bena weş, şona resena hevalanê xo.

Rastiye ser ma jî qayîlime ke, ti meymanê mabêne,
Malbata ma, meymanan ra heskena,ti meymanê mawa,
Ti wextoke rind bîya, şîya hevalanê xora silamê ma vace,
No welatê, welatparêzano, endî welatê made, her kes azado.

Bira hevalê to jî, naye rindek bizanê ne ,
Endî welatê welatparêzande, her kes azado,
Her kes rengê xode, nasnamê xode, zonê xo de azado
Manîfestoya Serok Apoy, nî qeydî vana, her kes naye rind bi-
zano.

15.06.2008

EZ AXÛ HESRETA

Ez ax û hesreta,
Hesretê koanê welatî ya,
Usarî koyê welatî reng bi rengê, ti vana xemelnayê,
Reng bi rengê, heybetê koan, mordemî xerq keno.

Ez xerîbîyede ra, welat ra dûrî kewta,
Ebe ax û hesretê şima nalena, zîbena,
Welat dayîka, koyê welatî, marê sitarê,
Şima şonê welat, silamê mi koanê welatîra vacêne,

Ey zozanê şerevdînî, qertalixi û çavreşîye,
Şewtî, zoravan, warê deşte û mergemîre,
Ez ax û hesretê şimawa, şima her tim ma vîrederê,
Koanê welatîra, zozananê welatîra, hezar silami mi vacêne.

Ewro koanê welatî xo xemelno,
Ti vana cejna newrozî ya, her ca reng bi reng,
Xo xemelno, tivana, şonê veyve,
Silamê mi vacêne, koanê welatîra, hezar silam şimarê.

Koanê welatîra, gul û sosinî perenê rûyê mordemî,
Awê çem û kanîyan, zê mar fizîlîna ra, çixirê xode şonê,
Zozananê welatî de, kalekala mîyan û bizan, hoka hoka şûwanan
êna,
Beto bîn de, vengê qaz û qûlingan, mordemî mest keno.

Gelê biran, şima şonê welat, koanê welatîra silamê mi vacêne,
Axîna zerê mi, vile çewtîya mi, welatîra vacêne,
Ti welatê mawa, axîna zerê mawa, ez hesretê towa ey welat
Dermanê birinanê mi, gul û sosinê toyê ey welat, hezar silam
torê.

22.08.2008

EZ XERÎBA

Dûrî kewta şimara,
Zaf dûrî kewta,
Qayt kena nêkena,
Şima nêvîna.

Ez xerîba dayê,
Zê têro bê pera,
Ez dûrîra qaytê şima kena,
Çiqa hesreta, hesretê şima wa.

Kanê a roje,
Ma defêna jûbînî bidîyêne,
Ebe hesretê, cîrantî ye û biratî ye,
Ma ax û hesretê xo, jûbînîde pare kerdêne.

Kes derdê xerîbîye nêzaneno ke çiqa zoro,
Xerîbîye derdê mordemî têra kena,
Dil û kezeba mordemî, helênena, tar kena,
Dil birîno, derd girano, bê dermano ezo.

Şimara dûrî kewta bê hala, bê teбата,
Nêweş kewta, bê hala,tebat nêkena,
Maye çînya, pî çîniyo, heval çînyo,
Dil birîno,derd girano, bê dermano ezo.

28.08.2008

MI CA MEVERDÊNE

Ez gûneka, bê kesa, xerîba,
Sebeno, mi tey xo berêne, ca meverdêne,
Nalena, ax kena, of kena, mi naca, teyne meverdêne,
Şima şonê, mi jî tey xo berêne, nîca mi cameverdêne.

Mi xêlî kedê xo, araqê çarê xo, şimarê verda,
Mi jî tey xo berêne, mi ca meverdêne,
Ez şimarê ax kena, of kena, helîna sawa şima,
Şima şonê mi jî tey xo berêne nîca teyna meverdêne,

Mal û milkê mi çiniyo, ez bê hala, jar kewta,
Mi na belengazî ye de, binê nî banî de, teyna meverdêne,
Ma pîya jîyanê de riñdeke derbaz kerde, nika jî vile çewta,
Mi na vile çewtîyede, na kalîye de, teyna ca meverdêne.

Rewşê mi, roj be roj tepîya şono, ez xo rind nêvînena,
Kifşo dil û gûrçikê mi helîyê, çokanê mide, taqat nêmendo,
Çîmanê mide jî fer nêmendo, ez melûl melûl rayera şona,
Na axrîya emrê mide, mi teyna meverdêne, teynabîne zora.

Ez nêmuşa teynabîne, teynabîne zorê mi şona,
Xem û xeyalê mi, şimade şono, mi jî tey xo berêne.
Ebe kêf weşîye, tasê awa serdine, bidêne mi, mirê beso,
Mi na vileçewtîye de, na kalîye de, teyna ca meverdêne.

Xem û xîyalê mi jîyana şimawa, mi vile çewt ca meverdêne,
Mi ebe araqê çarê xo, şima pîl kerdî, zewecnay,
Ez bê kesa, bê hêvîya, mi na kalîye de, teyna meverdêne,
Şima şonê mi jî tey xo berene, mi naca cameverdêne.

29.08.2008

ZOZANÊ WELATÎ VILE ÇEWTE

Zozanê welatî poxzînê, vile çewtê,
Xem kenê, kelegîrîyê sawa şarê xo,
Şima qey ma caverdayme, teyna verdayme,
Bê waîrtîye zorê ma şona, ma bê waîr meverdêne,

Ma henî wazenîme ke, şima bêrê zozanan, ma pîya rindekîme,
Ma axû hesretê şimay me, bavde kal, ma pîya derbaz kerdo,
Coka ma honday ax kenîme, of kenîme, sawa amayîşê şima,
Ma teyna meverdêne, ma pîya rindekîme, pîya azadîme.

Hela defê qaytêke, mexelanê pesîde, têr qû nêkeno,
Garana dawarî de tek jû daware çîniya, îsîziya,
Mîyanê warande defê bigêre, kozê sexlî şaniyê we,
Warê deşte û axakûye de dêsê waran amê war, darû ber jî leşkerî berdo.

Bêrê ne, ma waran şenkîme, kozanê sexlî newede virazîme,
Bira garana dawarî de, dawar mexel bo, îsîz meverdêne,
Şodirne dikê şodirî vengdêne, şewe vengê kûtikan bêrone,
Roj hoka hoka şûwyanan, lornayîşê bêrîvanan, kale kala bizêkan
bêrone.

Jîyana ma bê şima kesro, vile çewtîya, poxzînîya,
Ma vile çewtê şarê xoyme, hewcê qomê xoyme,
Bêrêne ma bê hêvî, vile çewt meverdêne, ma pîya rindekîme,
Bêrêne marê hêvîtiye, marê cîrantîye, marê rêveberîye bikerêne.

Ma rewşê welatî jî, ê şarê xo jî, rindek zanenîme,
Na kilake welatdera, na kila asîmilasiyonîya,
Xo ver bidêne, nî înkâr kerdîşî qewîl mekerêne,
Ser bilind vindêne, ma paştîya şimadeyme, metersêne.

Çimê ma, rewşen bîran û şoreşgeranê welatîrawo,
Şima jî şoreşgeran û rewşen biran, teyna meverdê ne,
Ebe ser bilindî ye, destê xo bidê ne, destê jûbînî,
Ez ebe vengêde berz, vengê şarê ma dana, ma pîya rindekîme, pîya
azadî me.

DİKÊ ŞODIRÎ

Hîna şefaço, dikan veng kerdo tê, veng danê,
Tayê kozikê xode, tayê jî tewera, veciyê serê silondan,
Veng kerdo tê, ti vana orkestrawa, mecal nêdanê jûbînî,
Veng dêne, ebe dil û can vengdêne, şima wextê xode veng danê.

Tayê dikî veciyê serê silondî, veng danê, çire wazenê,
Vanê her dik, serê silondê xo veng dano, azado,
Ecî dikê nî silondîya, serê nî silondî, bê mi kes veng nêdano,
Her dik, serê silondê xo vengdano, serê silondê xo azado.

Ewro diko sûr, vecîyo serê silondî, çire wazeno,
Eke vano ez ke eza, tew kesî verê çimanê xo nêvînenno,
Diko sûr, zaf qûretîye meke, gorê hêzê xo vengde,
Ti naye rind bizanêne ke, torê jî nêmaneno.

Şodro ewro dikan veng kerdo tê, qîrenê,
Veng danê gazî hawarîya dîkana, mecal nêdanê jûbînî,
Şarê mara vanê, de ravazê, bîyo şodir, şorê karê xo,
Diko sûr zaf cewlan meke, torê jî nêmaneno,

ROJ MIDE HÛNO

Roj mide hûno, keke gîrî beno,
Şarê mara vano, çimê şima roştê bêne,
Welatê şima jî saya şervananê şimara azad beno,
Çimê şima roştî bêne, endî welatê roje jî azad beno.

Roj mide hûno, ebe dil û can kêf weşo,
Vano ey welatê roje, mîzgîna mi bidêne,
Xort û kênanê şima, çila ke koan ra fîsta ta,
Şewq û şemalê a çila, xo do pêrkoyê welatî.

Ey şarê mawo ser bilind, dormê a çila azadiye de pêresêne,
Hêzê xo bikerêne jû, xûrt vindêne, ser bilind vindê ne,
Eyro roja vindetene nîya, roja mêrxasana ê şêr û egîtana,
Na mîzgîna azadiye, mîzgîna azadiya serok Ocalanî ya.

Bira xerîbê şima şabê ne, bindestê şima şabê ne,
Na mîzgîne, biresnê ne, şervananê azadiye,
No kedê î şervanano, ê şehîdanê azadiye wo,
Şabê ne ke welatê şima, welatê roje azad beno.

Mîzgîna mi, dar û berê welatîra vacêne,
Mîzgîna mi, koanê welatîra, zozananê welatîra vacê ne,
Mîzgîna mi, çem û kanîyanê welatîra, sewalanê welatîra vacê ne,
Vacêne şervananê azadiye, çila xoseriya demoqratîki fîsta ta.

Roj mide hûno, kêf weş beno, vano xewzilbe şima ke,
Nî şoreşgerê şima, şêr û egîtê şima, welat parêzê şima estê,
De bêrêne de bêrê ne, welatê roje de pîya azad bê ne,
Sawa azadiya welatê xo, sawa azadiya serokê xo.

06.09.2008

KANÎYÊ BIZÊBANAN BERBENO

Ey kanîyê bizêbanan,
Ti qey berbena, qey lornena,
Hela derdê to çîyo, majî bizanime,
Derd ke esto, dermanê ey jî esto.

Ti kanîyê bizêbanan biya,
Bizêbanan, çendek û çend serî, awa to werda,
Awa to, bizêbanan rê zê dermana,
Awa to, sexlê bizêbanan rê jî, zê abû heyatebîye.

Ez qey meberbê ne, qey melornê ne
Emser çendek û çend serî yo ke, ez vile çewta,
Hela bizêbanê mi key ênê, xemê mi, xîyalê mi ,
Her tim goşê mi, serê amayîşe bizêbanano.

Çend serîyo ez bekle kena, ha emser, serêna,
Kesoke bêro mira pers kerone çinîyo,
No şarê marê sebî, qey bizêbanî nênê,
Gelê bizêbanan bêrêne, meymanê mibêne.

Mi namê xo şima bizêbanan ra gorito,
De bêrêne mi bê meyman, bê bizêban meverdêne,
De bêrêne, kêf weşîya ma pîya bone,
Şima axa minê, hesreta zerê minê

Kanîyê bizêbanan derd girano,
Lorneno ax keno, wax keno, teynabîna xorê,
Vano verde serê mi ca çinîbî peyay roşêne,
Bizêbanî qey nênê, qey mira pers nêkenê.

Bira bizêbanî oncîna bêrêne,
Serê to govende giran kerêne,
Ti xem meke a roje ji êna, şima pîya kêf weş benê,
Ti kanîyê bizêbanana, şoretê zozanan, şoretê welatîya. .

11.09.2008

GELÎYA ZILAN

Serê geliya zılan,
Xêli helbestî nivîsiyê
Xêli dêrî (kilamî) amê vatene,
Qetil xûran geliya zîlande qetil kerdo.

Kemer û kûçê geliya zılan şahadê,
Dar û berê geliya zılan şahadê,
Çem û kanîyê geliya zılan şahadê,
Vanê ma şahadê hîrîs û hîrê cananîme.

Sîstemê qilêrî se qetil kerdo, ma rindek zanenîme,
Bira şarê ma bêrone mara perskerone,
Ma jûbe jû rindek zanenîme, şahadê nî qetlîamî me,
Jariya hîrîs û hîrê cananrê, koy berbenê

Verê qetlil xûranra, gonîweranra cahaletê înanra,
Sewalanê çöle, geliya zılan, terk kerdî, daymiş nêbî,
Jariya hîrîs û hîrê canan rê, kam nêberba kî,
Kemer û kûçê çole, geliya zılanrê helîya, tarbî.

Hela qaytê qetil xûran kerêne,
Defêde bîn, namê î qetilxûrî danê kûrûmanê xo,
Mekerêne mekerêne, pê şêhîdanê ma, kay mekerêne.
Şerm bikerê ne, fedî bikerêne, nînan ra lanetî biyrêne.

Ey qetil xûrêne, şima dest û payê mêrxasan girê danê,
Çimanê şêr û egîtan, bêbextiyede gênê,
Peyra zê varayîş gûlan varnenê, bêbextiye de,
Gonî werêne, na gonîya şêr û egîtan, şîmarê jî nêmane na.

Ey şer û egîte na aleme, qey vey nêkenê,
De vacêne, na mêrxasiya, an jî bêbextiya,
Mabe xo pê vatena nî gonî weran qan nêbenîme,
Hîn beso, fedî bikerêne, şerm bikerêne. bêbextêne.

Heyan û roja ewroy jî şarê ma şehîdanê xorê naleno,
Şehîdanê geliya zîlan rê, pêrkoyê insanan berbenê,
Lornenê, zîbenê, keserîne, ax kenê şehîdanê xorê,
Ey telaq reşene, roja şima jî êna, şimarê jî nêmaneno,

Sebeno, caran pesnê bêbextiye medê ne,
Sadamî jî zaf pesnê xo dêne, peyniye sebî,
Gonîwerê ne, gonî be gonî pa nêbena,
Dawîya şima, gonîweran jî bena zê sadamî.

Geliya zîlan de fermano,
Gonîwerê mûxlalî fermanê hîrîs û hîrê canan veto,
Zîlan de jarî û zîbiya, gazî û hawarîya şarê mawa,
Wanê bebext mevîndêne, ewro roja mêrxasana, şêr û egîtana.

12.09.2008

MA BÊKES MENDÎME

Kanê, rêberê ma,
Kanê, rewşenbîrê ma,
Kanê, xort û kênê ma,
Pê sebî, kanê dewicê ma, kal û pîrê ma,

Bêbextêne, şîma şarê ma welatra koç kerd,
Ebe milyonan şarê ma koçber bî, hina jî yanêgêrê welat,
Pêrko metropolanra vila biyê, kar û gûre çîniyo, vile çewtê,
Sawa welatî vile çewtê, vanê ma welatê xo wazenîme,

Kal û pîrê ma, cîrananê xora gêrenê, hesretê cîrananê,
Heroj ebe ax û hesretê cîrananê xo vazenê ra, nûşenê ro,
Ti kamecîra persena, jîyana xora memnûn nîyê,
Şarê ma, sawa azadiya xo, zonê xo, nasnamê xo, kewto kûçan,

Metropolan de, ma bindest mendîme, bê waîr mendî me,
Kûçan de, bê kes mendîme, bê rêber mendîme,
Îyê ke zor û zebt vînenê jî mayme, bê waîr jî mayme,
Dima nî honday kiştene de, koçberîye de, ma şîmara vanîme
bira.

Kanê biratîya şîma, kanê cîrantîya şîma, hevaltîya şîma,
Kanê welat parêzê şîma, rewşen bîrê şîma, zanyarê şîma,
Şîma ma welatê made kerdîme kole, hîn beso şîmarê,
Ey bêbextê ne, telaqreşêne ma ne koletîye, ne jî bin destîye, qewîl
nêkenîme.

Ma jî endî bê rêber, bê Serok nîme, ê majî Serokê ma esto,
Xort û kênê ma, rewşen bîrê ma, zanyarê ma jî girêdayê Serokî
xo yê,
Şoreşgeran şer kerdo giran, vanê bê serokî, marê jîyane herama,
Dewande, qadan de kal û pîranê ma jî veng kerdo berz, vanê bê
serokî jîyane nêbeno.

13.09.2008

TI QEY NÏYMA

Ez serê to honday vile çewtebîya,
Çiqa veciyêne tewer, çimê mi raya torabî,
Bê birayê mi, Ekinê mi dermanê mi,
Dayîka Sosine torê tar bena, taqatê xo nêmando bê bira bê.

Ti defê serê made bîyamê ne,
Ma jûbinî bidîyêne, pîya ronîştêne,
Ma jûbinîrê hesrêtê zerê xo, kesîkerdê ne,
Qesîkerdêne ke, ma çiqa, ax û hesrêtê toyme.

Ti qanatê zerê dayîka xo Sosinebîya,
Ti ke amêne kê, hevalê to kêfweş biyêne,
Hevalê dayîka xo, serbilindê şarê xo,
Sebeno defê bê, dayîka bîrîndare to bivînone.

Ma axîna xode meverde, defê bê serê made,
Kanê to vatê ne ez rew êna, de bê bira bê,
Çendek û çend serî yo, ma jûbinî nêdîyo,
Sebeno defê bê, dayîka Sesine to bivînêne.

De bê hevalê mi, şoreşgerê daîka xo,
De bê roşnaha hûrdmîne çimanê mi bê,
De bê axîna zerê daîka xo bê, ma jûbinî bivîni me,
Na axrîya emrê xode, ez defêna to bivînê ne bê.

Ez derd girana, kûl û birînê mî har bîyê, nêvindenê,
Bîrînê mi har bîyê nêvindenê, mecal nêdanê mi,
Rind bizane ke ez daîka, zerê daîka to, xover helîno,
Sebeno defê bê, dayîka bîrîndare to bivînone.

Ey birayê axîna zerê dayîka xo Sosine,
Ey gorgeçîna aştiya welatê xo,
Ey pîvoka zozananê warê Deşte û Girboxî,
Ekin bira, ez to û hevalanê torê silamê daîke rûşnena.
Bê bira bê.

18.09.2008

LO BIRAWO

Lo lo birawo lo,
Bê hevalo, bê keso lo,
Derd girano, derman çinîyo lo,
Bîrîn xedaro, bê hedûro lo.

Beybûnê çöle, torê berbenê lo,
Dar û berê welatî, torê zîbenê lo,
Têr û tûrê çolan, derdê torê wanenê lo,
Xerîbo, bê keso, çolera teyna mendo lo.

Lo birawo, qickeko, xeşîmo lo,
Dawû dozan de teyna mendo lo,
Alîkarîye wazeno, alîkar çinîyo lo,
Birawo qickeko, şerde teyna mendo lo.

Ti şêr û egîtê welatê bindestîya lo,
Ti zê pîvoka verê vare narîna lo,
Ti axîna dayîka xo û welatê xowa lo,
Ti marê hemgênîra şîrîna lo.

Roj vecîyo, bilind bîyo tanî dano lo,
Têr û tûran ref girê do, şonê berûye lo,
De tijî bimeşe, refê hevalanê xo rese lo,
Derd kûro, bê dermano, bîrîn xedaro lo.

Ey birawo, qickeko, şîrîno lo,
Ti mirê zê nûrê rojî biriqîna lo,
Mi to emşo hewnê xode dîya,
Xewzil bira hewnê mi rastkên biyêne lo.

Ti hewnê şewan de jî vîra midere lo,
Ez çîqa ax û hesretê towa lo,
Defê mira pers ke, vacê derdê çîyo lo
Derd kûro, bê dermano, bîrîn xedaro lo.

Lo birawo, rindeko mirê şîrîno lo,
Bejn teniko, rûnermo, kêf weşo lo,
Gonî germo, bîrîn xedaro lo,
De menale, de melorne torê helal bo lo.

19.09.200

DE ŞO

De xo rê şo,
Pey xo de qayt ke hîna şo,
Ti qey honday lerze kena,
Lerze meke bira, pey xode qayt ke hîna şo.

Defê pey xode qayt ke,
Qayt ke, çîqa vile çewtî estê,
Ma girêdayê jûbînîme bira,
De xorê şo, virnîya to roştîbo ne.

Ma vile çewtîme, serê xerîbanê xo,
Ti xerîba welatê mawa, dil û canê mawa,
Xemê ma, xîyalê ma, sere bilindîya şimawa,
De xorê şo, torê oxûrbone, ser bilindê ma.

Ti şona, ma xo vîrera meke,
Berbîşê ma, kêf weşîya ma, pîyabîye,
Ma sawa şima, ax kenî me, of kenîme, berbenî me,
De xorê şo, pey xode qayt ke, hîna şo, oxûrbone.

Şo birawo cîwan şo, virnîya to roştîbone,
To hîna derdê serê derdan, nêdiyê,
Waştena majî awa ke, şima derdan nêvî nê ne,
De şo torê oxûrbone, ma xo vîrera meke.

01.10.2008

NÊŞKÎNA FIRDÊNE

Mi timî waştê ne, ez bilind firdêne,
Seke mordem hewnê xode firdano, gêreno,
Ecî qayîla, raste rast firdêne,
Bilind, zaf bilind firdêne.

Serê hewran ra, asmênî resêne,
Kilamanê aştiye û azadî ye vacêne,
Ewro per û baskê mi şikîyo, nêşkîna firdêne,
Waştana mi awa ke, serê hewranra, berz firdêne.

De bêrêne, refê qûlingan, mi tey berêne,
Ez teyna nêşkîna firdêne, micî tey xo berêne,
Ma serê hewran, govende girankime,
Bira vengê ma, hard û azmên biheşnone.

Ê her mordemî, armancê de ey esto,
Ê mi jî, mexsed û miradê mi, berz, tey têran firdêne,
Serê hewran, pîya kilamanê azadîye vacime,
Bira vatenanê ma, pêrkoyê aleme biheşno ne.

Bira mi, serê hewran, hewnê şewe bîdîyêne,
Mî hewnê xo, têr û tûran rê qesîkerdêne,
Mi mexsed û miradê xo, têranrê qesî kerdêne,
Belkî kûl û bîrînê mi weşbêne.

Ê mi, per û baskê mi, hevalê minê,
Qanatê zerê mi, domanê mi, hevala mina,
Ax û hersê tê mi, welatê mi, zonê mi, nasnamê mino,
Xwezila bira perê mi bîbîyêne, mi zaf bilind firdê ne.

25.09.2008

EMSER

Kûlilkê dormê çeman, zer biyê,
Awe çinay, kûlilkî vile çewtê,
Çimê dormê çeman jî vile çewto,
Emser awe çinya, her ca zer keno.

Verocanê welatîra, palaxe rewra zer biya,
Zimande, dîndaroke û kevlo kewe keno,
Şarê ma, emserîra teselîya xo kewta,
Na sera dihezar û heyştî, serêde çetina.

Bostanan de, pelê kûndiran, xîyaran permelîyê,
Çiçegê dînan rişiyê, pêrko karixandero,
Awê çeman, ê kanîyan, kemî biyê, tayê jî miçiqîyê,
Sera emserî şorone, defêna bira serêde nîyanêne nêrone.

De bivare, varayîşê payizî, de bivare,
Bivare ke, çem û kanîyan, deşt û zozanan kewe ke,
Şarê ma hewcê kewetîye yê, çîqa sewalî estê, hewcê awayê,
De bivare, de bivare, sewalan koç kerdo, mêşanê hemgêni bars
do şîye.

2008

HEWNÊ ŞEWAN

Ez xerbîye de, hewnê şewan jî welatîra gêrena,
Zozananê şewtiyan, çem û kanîyanê şerevdînîra,
Warê deşte, delavê qerecenemî, koyê mergemîre ra gêrena,
Ez ax û hesretê welatîya, welat sebrê mino, dîyaxê mino.

Waştena mi, serê her kanîyê welatî roşêne, ebe kûlman awe /
yaşimêne,
Awê zozananê ma, ê çem û kanîyanê welatî serdinê,
Mordemî arasnenê ya, mordem radî kenoke, defêna yaşimone,
Awê zozanan, marê zê dermanê, Hekîmê loqmanê,

Ez hewnê şewande jî, xem û xîyalandera,
Mexsed û miradê mi, deşt û zozanê welatê rojeyê,
Şerwanê serê koanê, hevaltîya înana, meymantiya înana,
Mordem xo azad vînenî, ser bilind vînenî.

De bilorne, birawo qickek, de bilorne,
Hewnê şewande jî, min û xorê, pîya bilorne,
Seda to, weşê mi şona, no maqamê Evdalê Zeynike wo,
Bilorne ebe dil ûcan berz bilorne, bira zozanî seda to biheşnêne.

Bîrînê mi har bîyê, nêvindenê, na seda to, birînanê mi kewêne-
na,
Hewnê şewan jî, ez vera nalena, zîbena, bilorne, mirê bilorne,
Ez welatra dûrî kewta, coka hondayê ax û hesretê welatîya,
De bilorne, dengbê jê mi, de bilorne, bira vengê to şoro her ca.

2008

BÊ XÊRET MEVINDÊNE

Ey lawometêne, bêbextêne,
Mordem qaytê jariya şarê xo keno,
Na jariyera mordem fedî keno,
Şimade xêret çîniyo, şima qe fedî nêkenê.

Honday şarê ma, belangaziye anceno,
Bê xêret mevindêne, dora şima jî êna,
Destê xo bidêne jûbînî, xûrt vindêne.
Roj bibone ke, şima poşman benê.

Baxçê rezan, baxçê şêr û egîtano,
Baxçê rezanra, bîna şêr û egîtan êna,
No baxçê şêr û egîtano, baxçê laometan niyo,
No baxçê azadiyewo, baxçê serbilindiyewo.

Ede nî kolanan ra, nî kûçanra,
Kewranê azadiye, kewranê şêr û egîtan derbaz biyo,
Meverdêne bêbextî nî kolanan ra derbazbêne,
Ewro roja mêrxasana, roja mêrxasan pîrozbone.

Şoreşgeranê şarê ma, tew defê bêbextiye qewil nêkerda,
Her tim, hetê şarê xo, payra vinetê, çewt nêbiyê,
De bêrêne, majî hetê şarê xo, payra vindime,
Ewro roja mêrxasana, roja mêrxasan pîrozbone.

2008

TI AMEDA

Ey bacarê dîroka ma,
Ey ax û hesretê, bav û kalanê ma,
Ti paytextê welatê mawa,
Ti rengê mawa, dîroka mawa, axa mawa.

Ti Ameda, gûla daristanê welatê mawa,
Ti axû hesretê, şerwananê welatîya,
Her kolanê tode, dîroka bav û kalan asena,
Ti paytextê mawa, ax û hesretê mawa.

Ey bacaro serbilind û serfiraz, dîroka tode,
Vîst û hawt, şarîstanî derbaz biyê,
Şarê ma, timî to serbilind dîya,
Ti serbilindê welatê xowa, ax û hesretê mawa.

Şervanan koan de, cîwanan kolanê to de,
Çila azadî ye dada, roştîya çila azadîye, xo do her ca,
Na roştîya ke şervanan û şarê ma fista ta, xo do her cayê welatî,
Ti dîroka welatê mawa, ax û hesretê mawa.

Ewro oncîna, kûçanê Amedî de, cîwanan veng kerdo berz,
Xort û Kênan dest do pê, vengê azadîye êno,
Bacarê Amedî zê timî dîroka xo ser bilind neqêşneno,
Coka ma vanîme ti paytextê dîroka mawa.

Kûçanê Amedî de ewro veyvan û kinan,
Xo reng bi reng, kesk û sur û zer xemelno,
Xortan pêşkîre, destdera govende giran kerda,
Ti Ameda, pay textê mawa, dîroka mawa.

Ey bacarê dîro ka ma,
Paytextê welatî, axîna bav û kalanê ma,
Ti Ameda, ti omidê şarê mayê bindestî ya,
Ti hesretê axîna mawa, dîroka welatê xowa.

De bêrêne ma kolananê Amedî de, bilornime,
Derdê kamî esto, pêrko bêrêne, ma pîya bilornime,
Sawa rengê xo, zonê xo, nasnamê xo bê me tê het,
Ti hesretê axîna mawa, dîroka welatê mawa.

Ey bacarê ax û hesretê welatê xo,
Ti Ameda, bacarê ser hîldanan, rewşen bîrana,
Ti gorgeçîna aşîye, kêwerê azadîye wa,
Ti Ameda, paytextê mawa, dil û canê mawa.

21.10.2008

NÎ CA DÊRSIM O

Nî ca Dêrsim o,
Welatê şêran û egîtano,
Seyîd Riza veng dano, qîreno,
Vano bêbext mevindêne, mêrxas vindêne.

Ewro roja bêbextîye û ê mixenetîye nîya,
Na kolane, kolana, şêr û egîtana,
Gazî û hawarîya dayîkan, berbişê domanano,
Vanê ma merdenera nêtersenîme, bêbextîyera tersenîme.

Qetil xûran, hêgayê vêşayede, şarê ma kerdo rêze,
Hêgawo vêşaye şahadê, qatliamê şarê Dêrsimî yo,
Yûzbaşî se xençere eştê vilê amojna Besere,
Ey hêgawo vêşaye bê zon, vace qetil xûrran sekerd.

Gelîya Dêrsimî de, vengê nalînanê birîndaran êno,
Nî nalînê birîndaranê, ê nêweşanê ,goş serdêne,
Leşkerî, gonîwerî, kamî kotî vînenê kişenê,
Cenî, doman, kal, veyvî, kam kewte ver kişenê.

Ey xedarêne, şima ebe xapnayene û,bêbextîye,
Kenê ke, Dêrsimî bîgerê binê bandora xo,
Şarê Dêrsimî, şarê de qedîmo, bêbextîye qewil nêkeno,
Vanê ma, merdenera nêtersenî me, bêbextîyera tersenîme.

Gazî û hawarîya Elî Şêr î ya,
Vano heşar vindêne, bêbextan naskerêne,
Mevindê ne birayê mi, şêr û egîtê Dêrsimî,
Pê nî bêbextan û mixenetan qan mebêne.

Ey şarê Dêrsimî Seyîd Riza veng dano,
Rastê genimê Xarpitî de, verê dara xacîde,
Vano ke, mi dek û dolabê to, serast nêkerdî, mirê bî derd,
Mijî verê tode, çok nêda, kemer best nêvîneto, nojî torê bibone derd.

Dar û berê rastê genimê Xarpîtî amê şezde,
Vanê Seyîd Riza gûlbangê ma bide,
Vengê Seyîd Rizay deşta Xarpitî hêjna,
Gaz û koy, verxodayena Seyîd Rizayra kemer best vînetê.

Ti mereq meke, pîrê welatî,
Tornê şîma, qesasê şîma, ebe serbilindîye gêne,
To bêbextanra va verî mi, dimera lacê mi berzê dare,
Bêbextan verî Hesiko bira, verê çîmanê tode, dimera jî to berda
dare xacî.

Belê to minete nêkerde, tobe xo zê şêran ramit verê dara xacî
Hey wax bêbextîyerê, feqîrîyerê, bêkesîyerê,
Şewa tariye bizano, rastê genimê Xarpitî bizanone,
Ey pîrê welatî, vêneta to, vatenê to, ewro marê biyê mînak.

A vînetena to, galegala to, çalimê to, hînacî marê mînako,
Vengdayîşê to, o mêrxasîya to, deşta Xarpitî hêcna,
Dima tora î vatenê to, jûbe jû, ênê qalkerdene, marê biyê mînak,
Ey Pîrê welatî, vînetena to, vatenê to, ewro marê biyê mînak.

06.11.2008

DERDÊ SERRÊ DERDAN

Derdan ez werda,
Dil û gûrçikê mi, helesnê ro,
Derdan zerê astikanê mi koto,
Teyna qofa mi, payra menda.

Derd xûrê derdan, serê hardan zafê,
Ecî derd xûra, hekîm be hekîm gêrena,
Derd xûran rê, derman bîvînê ne,
Bira hekîmî, derd xûranrê derman bîvînê ne.

Ey derd xûrê derdan,
Ey dermanê, hekîmê Loqman,
Qey derd xûranrê, derman çiniyo,
Kanê dermanê, dêrd û kûlanê ma.

Zerê mi vêşeno, adir kewto laşa mi,
Welatê qedîmî de, ma teyna meverdê ne,
Na bin destîya marê, hîn beso,
Her cayê welatî de, serê ma, adir vareno.

Nî ma welatê made, kenê kole,
Vanê şima hes nêkenê, terk bikerêne,
Nî kamî, welatê kamîra, kenê tewer,
Ma vanîme, şima welatê mara defbêne.

Ma doza xo de, mafê xo de, soxînimê,
O kamo ke xo bawaro, ma welatê mara veceno,
Ma şarê nî welatîme, wairê nî welatîme,
O kamo ke welatê roje, asîmîle keno, o terk bikerone.

Ma welatê xode, serfirazîme, azadîme,
Şima heyânû roja ewroy, meymanê mayê,
Vindêne ma zê biran pîya jîyanê de, azade derbazkime,
Mexsed û miradê ma, zê biran pîya, jîyana xo berdewam bikeme.

Ez coka vana, derdan ma werdîme,
Ez coka vana, dil û gurçikê ma helesîyê,
No sistem, derdo bê dermano, asimîlasyono,
Ma şarê xorê, rêberê xorê, welatê xorê aştiye wazenîme.

11.11.2008

EZ DOMANÊ KÛÇANO

Ez koçbera, ma koç kerdo,
Dewanê made, kes nê mendo,
Cîrananê ma, pêrkûne koç kerd,
Ez domanê kûçana, ma koçber bîme.

Ê mi dadîya mi, bayê mi çiniyê,
Ez sey menda, bê maye, bê pî, bê bira menda,
Kalikê min û pîrika mi qaytê mi kenê,
Ez domanê kûçana, bê maye, bê pî, bê birawa.

Kanê dayîka mi, kanê piyê mi, kanê birayê mi,
Ez mûsa kolanê bacaran, gêrena kûçe be kûçe,
Dayîka mi, piyê mi, birayê mi, kiştê, mi vîrera nêşonê,
Ez ebe vile çewtiye gêrena, kûçanê metropolande.

Hevalê mi, xewndevanê, dibistanan de wanenê,
Dibistanê mi, kolanê kûçan û bacara nê,
Ez jî ax û hesretê wendenebiya, mi nêwend,
Kanê daîka mi, kanê piyê mi, birayê mi.

Domanê bacaran, ebe hevaltîye qaytê ma nêkenê,
Çirake, ma kûrdîme, ma koç kerdo, koçberîme,
Ê mi, kê çiniyo, maye çiniya, pî çiniyo pê sekena,
Ez domanê kûçana, bê maye, bê piya, bê birawa.

Pîrika minû, kalikê mi, kale, serê bêçika mi lerzenê,
Ez çîqa hewnra heşar bena ke, hûrdmîne serê mi berbenê,
Qaytê mi kene, hûrdî hûrdî berbenê, cîrananê xora gêrenê,
Lacê xorê, veyva xorê, bê kesîya xorê, kalîya xorê berbenê .

Ez sey menda, bê maye, bê pî menda, bê bira menda,
Ax û hesretê mi, dayîka mina, bayê mino, birayê minê,
Ez vana sûcê dadîya mi, bayê mi, birayê mi çibî?
Ez vacêne, bayê mi, dadîya mi, birayê mi kûrdîbî welatparêzî bî.

Ez xemgîna, vile çewta, owo ke bê maye, bê pî yo eza,
Şima mal û milkê pêrkoyê aleme bidêne mi, mirê bê faydo,
Şima bayê mi, dadîya mi, birayê mi, tepîya şîkînî bîyarêne,
Ez bê maye menda, bê pî menda, bê bira menda, ez derd
girana, derd giran.

21.11.2008

MI MEKIŞÊNE

Zonê mi nêgêreno, ez bê zona,
Zerê mi pirê kûlan û derdano,
Zonê mi nêgêreno ke, ez qesîkerê ne,
Sebeno, mibe weşîye mekişêne.

Ûsaro, beybûnan çolera, reng kerdo zelal,
Têr û turan, ref girêdo amê welat,
Ûsaro her ca zîndîyo, reng be rengo,
Mordem radî keno ke, zozananra bigêrone.

Her tere, refê xode fir danê,
Ecî qayila ke, refê hevalanê xo resêne,
Mi ebe weşîye û, bêbextîye mekişêne,
Mi jî refê hevalanê mi resnêne.

Lo lo birawo, qickeko, nezano,
Çollera gêreno, bê heval mendo,
Xeşîmo, nezana, gonî germo, dereng kewto,
Ravaze şo refê hevalanê xo rese.

Zar û zonê mi, teynabînera kîlît bîyo,
Nî zar û zonê mire, bibêne derman,
Zerê mi, pirê derdan û kûlano,
Dermanê mi, ez hevalanê xo resêne.

Mi ebe zar û zonê xo, vatenanê xo, mekişêne,
Vindêne ez derdanê xo, qesîkerê ne,
Şima mi, biresnêne hevalanê mi beso,
Dermanê zar û zonê mi, hevalanê minê.

01.12.2008

LÊ XERÎBÊ

De bilorne, dengbêjê mi bilorne,
Hûrdî hûrdî, mi derd xûrerê, bilorne,
Qickeka mirê bilorne, torina mirê bilorne,
Kûla zerê mirê, xerîba mirê bilorne.

Lê xerîbê, bê demê, bê dewranê,
Qickeka wayan û biranê, mi heyranê,
Ti mirê, axîna şehîdan, roşnaha çimana,
De bilorne, dengbêjê mi, kûl û bîrînanê mire, bilorne.

Ez xemgîniya xorê, bîya pepûg û goyîn,
Berbîşê çimanê mi, zê laser êno war
Ez mat û kiş bîya, xerîbanê xorê,
De bê dengbêjê mi, ma pîya xerîbanrê, bilornime.

Defê yagêre, serê dyîka xode bê,
Hûrdmîne çav kanîyê mi, zê laser ênê war,
Zê varayîşê ûsarî, mabên ci nêdanê,
De bilorne, dengbêjê mi, kûl û birînanê mirê bilorne.

Ez hevala xorê, xerîba xorê lornena,
Dayîka to, derdê xorê, derd kûla xorê lornena,
Xemê mi, xîyali mi, xerîbê mayê, ser bilindê mayê,
De bilorne, dengbêjê mi, minû xerîba mire, pîya bilorne.

Lê xerîbê, çim siya, bûrî qeytanê,
Bejn barîyê, bêçî şîmşatê,
Qickeka wayan û biranê, derd girana dayîka xoyê,
De bê, dengbêjê mi, ma pîya bilornime, torina mirê.

26.12.2008

BIRAWO BÎRÎNDAR

Berxê dayîka xo,
Mamostê welatê xo,
Xerîbê welatan, bêkesê mi,
De şo torê oxûrbone, bîrîndarê dayîka xo.

Dayîka to Gûltene, torê korbone,
Wayê to, birayê to, torê tarbenê,
Şarê to, hevalê to, torê helînê,
De şo, torê oxûrbone, bîrîndarê dayîka xo.

De ravaze, mamosto hêca,
Ewro to, dersede nîya,
Ravaze, xewndevanê to amê,
Îcî vile çewtê, kelegîrîyê, berbenê sawa to.

Mezra Goşan, dewa Korkan xemgîna,
Hevalê to, qomê to, cîwantîya torê berbenê,
Birawo kêf weş, mamosto veng bilînd,
Torê oxûrbone, birawo bîrîndar, hevala hêca,

Elî Heyderê mi, gûla zozananê xo, torê oxûrbone.
To ma caverdayme, bê hêvî verday me,
Kanê tembûrê destê to, zê kew wendêne,
Dayîka to, hevala to, domanê to, tembûrê to, vile çewto,

De ravaze, Elî Heyderê mi, de ravaze,
Berxê dayîka xo, bîrîndarê mi, de ravaze,
Domanê to, vile çewtê, hevala to xemgîna,
Defê sarê xo berz ke, qaytke bîrîndarê dayîka xo.

Kam çizano, xem û xîyalê to çibî,
Sawa domananê xo, hevala xo, daîka xo,
Waştena to çibî, xerîbê welatan bê kesê mi,
De şo torê oxûrbone, bîrîndarê dayîka xo.

Dayê dayê birîndarê, derd giranê dayê,
Gultenê, roreşê, roj nêdîyayê dayê,
Dar û berê çolan, to û Elî heyderê torê helyayê,
De şo torê oxûrbone, birîndarê dayîka xo,

06.01.2009

XEMLÊ WELTÎ

Mi rengê, welatê mide wedarêne,
Mi rengê, zozananê mide ténimnê ne,
Mi rengê, deşta Kanîreşe de bixemelnê ne,
Bira xemlê mi, rengê welatê mide bone.

Bîna gûl û sosinanê welatî, mira bêrone,
Mi pê axa welatê mi, ténimnêne,
Bira axîna zerê mi, hardê welatîde kewebone,
Bira reng be reng kewebêne, azad kewebêne.

Demê ûsarî, rengê welatî, kesk û sûrû, zer kewebeno,
Zê şalîn û bil bil, têde waneno, ti radî kena ke temaşekerê ne,
Her mordem, ebe heşretê axa xo, pîl beno,
Bira xemlê mi, rengê welatê mide bone.

Ez maşiqê bîna hardê welatê rojewa,
Mirê zê baya mîsk û amberîya, weşê mi şona,
Sebeno mi berene welatê mide wedarêne,
Mi pê axa welatê mi ténimnê ne.

Usaro qazan û qûlingan ref do gire, verba welatî,
Ref be ref, verba welatê serhedî kewtê rêze,
Qaz û qûlingî jî, xemlê welatîra hes kenê,
Coka ez vana mi pê axa welatê mi, ténimnê ne.

Xemlê welatê roje, xemlê azadîye yê,
Xemlê welatê roje, xemlê biratîye yê,
Xemlê welatê roje, xemlê mafê mordemanê,
Coka ez vana mi, ebe xemlê welatê roje ténimnê ne.

2009 / Serinyol

TEYNA MENDA

Kesrê mi, kûl û birînê mi kûrê,
Çira ez teyna û bê kes menda,
Derdê teynabîne rindek zanena,
Şima teynabîne, mira pers kereêne.

Bîrînê zerê mi kûrê, zaf decenê,
Vengê nalînanê mi, şono cîranan,
Ez xedar bîrîn kûra, zêde nalena,
Şima derdê teynabîne, mira perskerê ne.

Ez bîrîndarê bê kesîye û teynabîne wa,
Bîrînanê mi, fek kerdo ya, har bîyê, nêvindenê,
Faydê derman kerdene çiniyo, bê faydewo,
Şima derdê teynabîne û bê kesîye, mira perskerêne.

Kesrê mi, kûl û birînê mi, kamîrê çi,
Teynabîna mi, bê kesîya mi, kamîrê çi,
No dewr, dewrê mal û milkîyo,
Şima derdê jaran, bê kesan, mira pers kerêne.

Verba ma ûsaro, qûlingan oncîna ref do girê,
Verba zozanan, ebe kêf weşîye meşenê,
Herçîyê ke per û baskê xo şîkî yê, nê nê welat,
Şima derdê î bîrîndaran, mira perskerêne, çîqa zoro.

Î bîrîndarî jî teyna mendê, zîbenê, ax kenê,
Îcî alîkarîye wazenê, hevalanê xora,
Ê înan jî derdê înan, teynabîna, bê kesîya,
Şima teynabîne, jaranra, bêkesanra perskerêne.

17.01.2009

EZ KE FIRDÊNE

Bira xewzila perê mi bîbîyê ne,
Mi verba zozananê serhedî firdêne,
Tey refê qazan û qûlûngan, bişîyêne welat,
Zê qûlûngan cayêde berzde, derdê xorê bilornêne.

Lo lo qûlingo, hevalo, kamta şona,
Verba zozananê serhdî şona se, mijî tey xo bere,
Ejî wazena ke, tey şima firdêne welat,
Sebeno mijî tey xo berêne, zozananê serhedî.

Lo lo qûlingo, perû baskê mi çînîyê,
Mijî serê per û baskanê xodêne, tey xo berêne,
Ma emser zozananê serhedî de, bibime cîran,
Mi tey xo berêne kê, ez derdê xorê mirdî bilornê ne.

Mi bişikîyêne firdêne, zozananê welatî ser şîyêne,
Qûlingo, malek mîrato, mijî tey xo berêne,
Ez şimara wer, şimara kar nêwazena, mi tey xo berêne,
Mi tey xo berêne ke, ez zozananê şerevdînîde, mirdî bilornêne.

Mi berêne zozananê welatî, ez tey pepûgî, derdê xorê bilornêne,
Ma kûl û bîrînanê xo, zozanan de pîya parekime,
Pelanê gûl û sosinan, bîrînanê xorakime, tey şerwanan bigêrime.
Zozanê ma, dermanê kûl û bîrînanê mayê, hevalê şoreşgeranê
mayê.

Ey zozanê qertalixî, şerevdînî, çavreşîye, koxa bîngolî,
Warê deşte, mergemîre, warê geliye û hemedxanî,
Silam hezar silam şimarê, ez ax û hesretê şimawa, maşiqê
şimawa,
Zozanê ma, dermanê kûlan û bîrînanê mayê, hevalê şoreşgeranê
mayê.

25.01.2009

KES HALÊ XERÎBAN NÊZANENO

Ez xerîba, bê hêvîya,
Kes hal û hewalê ma xêrîban, nêzaneno,
Kam bi kamî, ti bimirêne, hayîya kesî tora çînîya,
Jîyana xerîban, koçberanra perskerê ne.

De vace, xerîbê welatê xo, bê hêvîyê welatê xo,
Derdan û kûlanê xo, mide pareke,
Ecî zê to, bîrîndara, bê hêvîya, derd girana,
De bê, jûbînîrê ma, derdanê xo parekeme.

Xerîbiyede, mordem bê zar, û bê zono,
Metrepolande, mordem xo, vîndî keno,
Xerîbiyede mi vatêne, xewzil mi cîranê de xo bidîyêne,
Derd û kûlê xo, cîranê xode, pare kerdêne.

Çîqa welat kûna vîra mi, ez xerq bona, ax welat vana,
A wext, rewşê welatî, jîyana welatî, çîmanê mi vera nêşona,
Nica metrepolande, kes halê feqîran pers nêkeno,
Şîma jîyana koçberan, koçberanra perskerêne.

Ewro serê mira têrî firdanê, zaf berz fir danê.
Hela nêzdî bêrêne, ma jûbînîra derdê xo parekime,
Têrî zonê mi nêzanenê, tew qayt nêkenê.
Defê qayt kerene, eji zê şîma derd girana.

Lo lo têro per beleko, hela vinde,
Ti kamta şona, hevalê to, kotî mendê,
Bê ma pîya, kûl û bîrînanê xo qesîkime,
Kifşo ke, têrî zonê mi nêzanenê, tew qayt nêkenê.

Xwezil be Feqîyê Têyrane kî, zar û zonê têran zanitêne,
Zonê têran weş qal kerdêne, pîya kêf weş biyêne,
Têr û tûran, tew caran Feqîyê Teyranera nêremêne,
Endî Feqîyê teyrane jî çîniyo ke, şimade qal bikerone.

10.04.2009

BÛRISKÎ JENENÊ

Tewera serdo, varayîş vareno,
Tey varayîşi, va jî lerze keno,
Henîbe xezebo, serdo, va şîp êno,
Serê deşta Çewlîgî, mij û dûmano.

Deşta Çewlîgîde çimî çiman nêvînenê,
Gegene bûrîskî jenenê, roştî danê,
Serê deşta Çewlîgî ra, varayîş qeydê xode vareno,
Bivare bivare, qeydê xode bivare, wextê to amo.

Verê locine, dormê sobî germo,
Tewera henî serdo ke, çûçîkî jî fir nêdanê,
Feqîr halê rêbî û ricalanrê, şervananê serê koanrê,
De bivare de bivare, wextê to amo, rindek bivare.

Bûrîsk jenenê qeydê xode,
Va ebe şîpo, varayîş vareno qeydê xode,
Seqemê aşma Adare, mordemî, peretneno,
Axînanê zerê mordemî, cemedneno.

Lo bûrîsko de bijene, wextê to amo, rind bijene,
Serê deştan û koan fortan meke, bijene,
Demê ûsarîyo, wextê to amo, lerze meke,
Serê koan şervanê azadiye estê, bê hedûr meke.

2009

DERD GIRANÊ DAYÊ

To ax kerdê ne, of kerdêne,
Ti bîrîn darebîya, bîrîna to giranebîye,
Bîrîna to ebe axînan, ofînan derbaz nêbîyêne,
Ti derd xûrebîya, bîrîn kûrebîya, dayîka Fikrîya.

Bîrîna to harbîbî, tebat nêdêne to,
Ti bîrîndarebîya, derd giranebîya,
Çimê tojî yanêbîyêne, kesî derdê torajî fam nêkerdêne,
Peynîyede tobe axînan, ebe ofînan, emrê xo derbaz kerd.

Derd giranê dayê, defê çimanê xo yake qayt ke,
Apê to, pêr û lêzimê to amê, sarê xo berz ke qayt ke,
Vace şima xêr amê, gelê apan, biran, derezan,
Pêrko dormê tode, kom biyê, tora persenê, de qesîke.

Lacê mi ez vengê pêrkûne heşnena, şima xêr amê,
Çimanê mi ser, sarê mi ser amê, çimî mira goritê,
Ez nêvînena, şima rindek heşnena, şima defêna xêr amê,
Ez be axû hesretê, bîrîna pîyê xo Zeynelî nalena, şima xêr amê.

Dayê dayê bê dermanê dayê, domanê to qickekê cameverde
dayê,
Cîranê to, hevalê to, domanê to, eqrebayê to, torê berbenê dayê,
Ti ax meke, ti of meke, bîrîn kûrê, bê dermanê dayê, ser bilindê
mayê,
Ez be ax û hesretê kêna xowa dest henîye, Hekîfarê nalena,
birîndara.

De şo dayîka hêja, dayîka ser bilinde, torê oxûrbone,
Ti çîqa bîrîndarebîya, honday jî şewqetebîya, oxûrbone dayîka
Fikrîya,
Ti derd xûrebîya derd giranebîya, hînajî sawa to herkes qalê to
keno,
Tobe axînan, ebe of kerdene, emrê xo derbaz kerd, torê oxûr-
bone, dayîka Fikrîya.

VA HELBESTAN GOTINÊN DAYÎKA MI FÎKRÎYAYÊ NE

Darebî şewtî berî avê,
Berf dibare gav bi gavê,
Ê mi sêbîyê,
Nel mi dê ye, nel mi bave.

Bakî têyo bayê çîyan,
Lê dixîne, pelê qawax û bîyan,
Mi lome mekin, gelê gûndê Darebî yan,
Îro roja mine, sûbe dora weye.

Lolo bira hey wax bira,
Mil banî kî, tel banîkî,
Ez û te bexê êk dangî kî,
Me av nexwar êk kanîkî.

Şîrnan şewtî, ber newalê,
Tê dengê goînê, kalekala vê xezalê,
Bira xwezila lawê apê mi Kazim,
Derketan batan vê malê.

Mi genimek ajot paş pêrê,
Mi kişandî pê qantirê
Mi digo Abdîn mezin dibe,
Fîkrîya dibe berbûya bîrê.

NOT; *Dayîka Fîkrîya dema kû nexweşî bû va helbestan sala 1965 da pêşkêş kirî bû.*

DEWÊ MA BERBENÊ

Dewê ma berbenê,
Qomê ma şîn û şîbanderê,
Xort û kênanê marê, kemer helîno,
Macî tey dewicanê xo, xemgînîme.

De meberbe bira meberbe,
De melorne dayê melorne,
Şîma na welat te zaf derdê giranî dîyê,
Mordem gere mêrxas vindone, ser bilind vindone.

Ti vana, xezeb teyna serê ma vareno,
Jarîye û belangazîye, timî para mawa,
Coka şarê ma berbeno, naleno, zîbeno,
Kemer û dar û berê çolan, derdê marê helîno.

Berbîş caverdêne, ewro roja mêrxasana,
Mixenetîye mekerêne, ser bilind vindêne,
Dewicê ma berbîş caverdêne, mekerêne,
Bira mixenetî û lawometî kêf mekerêne.

2009

KESRÊ MI ZAFO

Keserîna, nalena, ofena, zîbena,
Xem kena, ax kena, mora mîyanê mi visîna,
Bîrîndara lerzena, hobnena derdê xorê,
Kesrê xorê, bîrîna xorê, axa zerê xorê.

Kesrê mi, rewşê welatê mino,
Kesrê mi, jîyana şarê mawa,
Mexsed û miradê mi, aboriya şarê mawa.
Qey teyna feqîriye, belangaziye para mawa.

Çem û kanîyê welatê majî, nalenê, zîbenê,
Ê înan jî kesrê xo zafo, bîrîn kûrê nalenê,
Têr û tûrê welatî jî, derd giranê, nalenê,
Kesrê înan jî, rewşê welatî, jariya welatîya.

Kesrê welatî kesrê mawo, jîyana mawa,
Dayikî, xort û kênanê xorê, keserînê of kenê,
Kal û pîrê ma, welatra dûrî kewtê, xemkenê,
Ti welat te kamejî kemere berskerêne, pêrko xemgînê.

Ma jîyanêde henêne wazenîme ke,
Kes kesîra lome mekerone, zêdetîya kesî çînîbone,
Ma kesrê xorê, bê kesîya xorê helînîme,
De vace heval, de vace, welatê made, kesrê kamî çînîyo.

2009

WELAT MARA HÊRSO

Hêrs mebe welatê roje, mara hêrs mebe,
Xemê ma, xîyalê ma, welatê rojewe,
Ti jîyana mawa, darî dermanê mawa, hêrs mebe,
Ti roşnaha hûrdmîne çimanê mawa, hêrs mebe.

Xilemalo welato ke ti reng bi renga,
Ti xemê mawa, roşnaha çimanê mawa,
O kamo ke welatê xora, hes nêkeno,
Ti hêrs mebe, ti şoretê mawa, hewnê şewanê mawa.

Xem û xîyalê to, teynabîna towa, bê cîrantîya towa,
O kamo ke wazeno welatê xora koç kerone,
Ma verê zorbazanra, cerdewanan ra koç kerd,
Ey welat ti, şoretê mawa, roşnaha hûrdmîne çimanê mawa.

Welatê roje, ti timî vîra madera, xem û xîyalê madera,
Hêrs mebe welatê roje, hêrs mebe, ti şoretê mawa,
Ti xemgîn mebe, kêf weş vînde, ti sebra mawa,
Ti çîqa mara hêrs bêna, ma honday tora heskenîme.

Welatê roje, to xêlî şêr û egîtê ma dî,
Qaytê jîyana î şêr û egîtanê make, hêrs mebe,
Î şêr û egîtê kanîyê şêran, ser bilindê welatê xobî,
Sebeno ti mara hêrs mebe, ti xemê mawa, roşnaha çimanê mawa

09.10.2009 / Çewlig

DE RAVAZE CÎRANO DELAL

Ewro qe veng tora nêvecîno,
Dormê to pêrko, heval û cîrananê toyê,
De ravaze, birawo delal, hevalo hêca,
Ma vengê to biheşnime, bejna to bivînime.

A sewda to, ma vîrera nêşona,
Hûyayîşê to, gale gala to, qalkerdişê to,
Tew caran ma vîrera nêşono, Hûsên bira,
Hevalê to, cîranê to, amê tora persenê.

Qey veng tora nêvecîno, ti bê vengê,
Meymanî kêwerê tode amêne, ti reqesîyêne,
Ti welatparêzebîya, kêf weşebîya, de ravaze,
Hevalî tora persenê, dil û xatiranê to gêne ra.

De ravaze, hevalo ser bilind, Hûsên bira,
Veng û vac tora birîyo, de qal bike,
Qesîke majî derdê to bizanime,
De ravaze cîrano delal, hevalo ser bilind.

Ma xemgînîme, xemgînîme ke ti made qesî nêkena,
Sebeno sarê xo berz ke, qaytê make,
Ma defê na jûbînî bivînime, vatenanê xo parekime,
De ravaze cîrano delal, hevalo serbilind, Husên Demircîoxlû.

Cîranê to dormê tode kom bîyê ,
Galegala tora hevalan zaf heskerdêne,
Hevalê to, dewicê to, zaf xemgînê ,
Ti serbilindê welatê xowa, oxurbone heval Hûsên Demircîoxlû.

11.10.2009

ŞARÊ MARA SILAMÊ MI VACÊNE

Ey şarê mawo, kedkar û vile çewt,
Ez welatê xora, şarê mara, dûrî kewta,
Torê hezar defa silm, welato serbilind,
Ebe axîn û ofinanê xerîbîye, silamê mi vacêne.

Mayme, xerîbîme, zere vêşayîme, sawa şarê xo,
O kamoke xerîbîyede, sawa şarê xo, of nêkeno,
O maymeke, sawa welatê xo, roj be roj helînîme,
Ebe hesrêtê zerê dayîkan, silamê mi welatê mara vacêne.

Ey welatê axa bav ûkalanê ma,
Jiyana ma û welatê ma, çîqa çetina,
Marê honday şîrîna, honday serbilinda,
Ti hewnê, şewan de jî, her tim vîra madera.

Bira kes pîvokanê welatê ma, mevisnone,
Sebeno, têr û tûranê welatê ma, hêrs mekerêne,
Bêrêne ma jû cade, pîya destê xo bidime destê jûbînî,
Zozanan û beybûnanê welatîra silamê mi vacêne.

Xerîbîyede, ax û hesretê şîma zafê,
Zê bilbilê malek mîratî, derd giranê,
Sewda şîma zê sewda, Memê Alan, Zîna Botana,
Şîma ax û hesretê welatê xoyê, ser bilindê welatê mayê.

Ez ebe ax û hesretê zerê xo,
Ebe ax û hesretê dayîkan, birîndaran,
Zê heskerdena, Memê Alan, Zîna Botan,
Ebe axîna şehîdanê xo, ma tora heskenîme ey welat.

11.11.2009

TI MENALE

Ti menale, ma tey xo mehelêne,
Vengê nalînanê to, mi helêno,
Nalînanê torê mordem, tebat nêkeno,
De ti menale, ti of meke, bîrîndarê mi.

Hewnê şewan jî, vengê nalînanê to,
Mi vîrera nêşono, de menale,
De menale, bîrîndarê mi, hewnê şewanê mi,
Vengê nalînanê to, mordemî, helêno.

Tora kifşo, tebatê to nêmendo,
Ti kûr nalena, axînanê xo henî kûr mance,
Ez ke qaytê to kena, xo ver helîna,
De ti menale, ti of meke, bîrîndarê mi.

Mordemo weş, bîrînanê nêwêşî nêzaneno,
Nalînê to, mordemî helênenê, tar kenê,
O kamoke qemîşê to beno, vacone ti senêna,
Kes qemîşê to jî nêbeno, sawa derdanê to pers kerê ne.

Nalînanê torê, vergê harî amê şezde,
Çûçikê mîyanê birî, amê zon, îjî berbenê,
Derd giranê welatê roje, ti menale,
Vengê nalînanê to mordemî helênenê.

Wexto ke ti nalena, of kena,
Hard zîbeno, sewalê çole, xof kenê,
Vanê alîkarbêne, nî nalînê bîrîndarî rê,
Kes tebat nêkeno, hard û asmên qewîl nêkeno.

Bira neyarî pê nalînanê to mezanêne,
Bîrînê to, har biyê nêvindenê,
Ti şêr û egîtê mawa, ser bilindê mawa,
Menale birawo derd giran, menale.

Ti ke nalena delavê Mûnzirî zingeno,
Pêlê awa Mûnzirî zê marî lîfan dano,
Ti vana pêlê awa Mûnzirî har bîyê,
Nêvindena, kes nêşkîno, bido vinetene.

Çemê pêriye jî derd girano,
Naleno, ax keno, of keno,
Vano ez şahadê nalînanê bîrîndarana,
Mevindêne, bîrîndaranê xorê alîkarbêne.

17.11.2009

KANÊ MEYÎTÊ MA

Şarê ma, perseno, xem keno,
Mezelanê şehîdanê xora gêreno, nêvînenno,
Vanê kanê nî meyîtê ma, kanê mezêlê nînan,
Xemê ma, xîyalê ma, meyîtê şehîdanê mayê.

Hewnê şewan jî, ma meyîtanê xora gêrenîme,
Çirake gonîya mayê, şehîdê mayê, rûhê mayê,
Ma be î şehîdanê xo, şa benîme, serbilindîme,
Şehîdê ma, ser bilindê mayê, azadiya mayê.

Xort û kênê ma, marê zê gûla daristanîyê,
Zê beybûna çoleyê, zê pîvoka verê vareyê,
Perenê rûyê mordemî, ti vana qîlay kerdê,
Kanê meyîtê şehîdanê ma, kanê heq û hûqiqê ma.

Şehîdanê ma, bidêne ma, bira cayê mezelanê înan kifşbone,
Mezelê şehîdanê ma marê omîdê, î dil û canê mayê,
Ma jî, zê her kesî, cejnande, şimime serê mezelanê xo,
Meyîtanê şehîdanê ma bidêne ma, marê zêde mevînêne.

21.11.2009

HESRETA ZERRÎ MI

Hesreta zerê mi, hevalê minê, î rûhê minê,
Ez sawa to helîna, zê vara verê tîce helîna,
Zê kolîyanê binê sacî, zerê mi vêşeno,
Xerîbê mi, hevalê mi, ti mi vîrera nêşona.

Rojê ma pîya, çîqa rindek derbaz bîyêne,
Ma pîya çîqa rindek, xewetiyêne, hûyêne,
To ez teyna verda, bê omîd verda,
Ti omîdê mina, hevalê mina, rûhê mina.

Qey telefonê to bersiv nêdano mi,
Qey vengê to birîyo, ez hesretê vengê towa,
Vengê to taqatê hûrdmîne, hermanê mino,
Ti roşnaha hûrdmîne, çîmanê mina.

A şewa ke to mira xatir waşt şîya, ez xerq bîya,
Kamî çî qesîkerdêne, tew veng nîyamêne mi,
Xemê mi, xîyalê mi, xerîbê mino, hevalê mino,
De mirê telefonke, ez vengê to biheşnêne.

Vengê to sebrû dîyaxê mino, rewşê mino,
Mirê zêde mevînêne, axîna mi şîya,
Xerîbê mi, dûrî şîyo, ez nêvîna,
Ez birîdara, birîn kûra, xem kena.

Birînanê mi, fek kerdo ya harbîyê,
Nêvindenê, zerê mi, zê ronê tawîke qijeno,
Kela kela zerê mi, berz bîya, ustirê çîmanê mi,
Zê laserê demê ûsarî, hêrîkinê nêvindenê.

Ti vana çemê pêriye wo hêrîkîno,
Çî kûno ver, dana xo ver beno,
Çîmê mê kor bîyê, goşê mi ti vana ker bîyê,
Zonê mi lal bîyo, sebrê mi nêmendo.

Kanê to pê mi, kêf weş biyêne,
Sebrê mijî, omidê mijî tibîya
De bê xerî bê mi, de bê mevinde,
Bê, ma pîya axînanê jûbînî parekeme.

Çimê dayîka to, pîyê to, rayerawo,
Îjî çar çim, serê amayîşê to vile çewtê,
Hêvîya mi, ez zaf dûrî qayt kena,
Qayt kena, nêkena to nêvîna.

Sitarê mi, rûhê mi, hevalê mi,
Mirê telefon ke, ez vengê to biheşnê ne,
Vengê to, sebrê mino, dîyaxê mino,
Xerîbê mi, hevalê mi, hêvîya mi, ti mi vîrera nêşona.

03.12.2009-ÇEWLÎG

TORÊ CÎ NÊMEND

Ti bêbextê şarê xobîya,
Gonî werê şarê xobîya,
Ti se qemîşê şêrê Kûrdan,
Elî Şêrî bîya, torê jî nêmend.

Elî Şêr, şêr û egîtê Kurdan bî,
Ronak bîrê welatê roje bî,
Ti Reyberê kurdan nîya,
Ti naletmê şarê Dêrsimî ya.

De ravaze, şêrê kurdan Elî Şêr,
Şarê Dêrsimî, ebe sarê to sond weno,
Ti şêrê Kurdan, ronakbîrê welatê xobîya,
Torê jî nêmend ey bêbextê Dêrsimî.

Bêbexto lanetmo, Reybero,
De ravazeke şerê Dêrsimî tora se vano,
Ravaze biheşne ke, şarê Dêrsimî se vano,
Vanê Reyber, bêbextê şarê xowo, lanetmê Dêrsimî yo.

Biheşne ke, ti lanetmê de senê pîla,
Qic û pilê Dêrsimî, tora nefret kenê,
Şarê Dêrsimî namê to heşnenê, şerm kenê,
Vanê xwezil bira Reyber, Dêrsimra nêbîyêne.

Kanê na dinya roştî, torê jî nêmende,
Rind bizanê ne ke, çila fesadan heyânû şodir nêvêşena,
Ti jî bekê de fesad bîya, çila to rew xûrba şîye,
Bira xwezil ti Dêrsimra nêbîyêne, ma tora şerm kenîme.

Lawo lawo, bêbexto, qetil xûro lawo,
Ti se qemîşe Elî Şêr û heval Zarîfe bîya,
Tew caran vîra şarê Dêrsimîra nêşono,
Vanê bira xewzil, Reyber Dêrsimra nêbîyêne.

Egîtê welatê xo, serbilindê şarê xo,
Şarê Dêrsimî hîna jî torê, hevala Zarîferê helîno,
Hîna jî namê şima derbaz bî se, herkes ax keno,
Vanê bira xwezil Reyber Dêrsimra nêbîyêne.

Dêrsim hîna jî matemê şimadero,
Şima bawar bêne ke, heyana dunya bibone,
Şarê Dêrsimî şimarê helîno, tajanreşî beno,
Vanê xewzila bira Reyber, Dêrsimra nêbîyêne.

Bêbexto Reybero lawo,
Bira bêbextê zê to caran xo mepesênêne,
Seke torê nê mend, nî bêbextanrê jî, nêmaneno,
Bêbexto Reybero, bira xwezil ti Dêrsimra nêbîyêne.

24.12.2009-ÇEWLÎG

ŞERWANÊN AZADÎYÊ

Şerwanên azad û ser bilindê welat,
Ka ez çenedek û çend sale digirim,
Ez vê axîne de, war bi war digirim,
Ez heyrana weme, hûn ser bilindê menin.

Ez ketim zozanên, navçe Kanîreşê,
Zozan bi zozan, kon bi kon digirim,
Zozanê Sewtî, Zoravan, Serevdînê digirim,
Qertalixê û Cavreşiyê digirim, we nabînim.

Ez bi ax û hesreta welat digirim,
Bo hevaltî û biratîya rsatgên digirim,
Ez birîndarê weme, ax û hesreta weme,
De werin, şerwanên azadîyê, de werin.

Mi ax û hesreta xweda, nehêlînin,
Dilê mi, fena êzingên bin selê dişewite,
Îsal çendek û çend sale, ez hesreta weme,
Mi vê axê de mehêlînin, ez hesreta weme.

Çekdarên delal, ser bilindên gelê xwe,
Hûn zozan biz ozan, nav gûlû sosinanda digerin,
Ez bawarim ji we, bîna kûlîlkên welatê serhedê tîn,
De werin, şerwanên azadîyê, de werin, em hev û din hemêzkin.

18.01 20110

BIRÎN KÛRO EZO

Şima birîna mi, mira perskerêne,
Perskerêne ke, çîqa kûra, çîqa xedara,
Kûl û birînê her kesî, birîndarîra asenê,
Birîn kûra, bê dermano, derd girano ezo.

Birîna mi tewera nîyasena, kûra,
Kes rûbe rû nê vînenê, kam çizano,
Kam çizaneno ke ez, çîqa birîndara,
Derdê serê derdan, bê dermano.

Lê lê hevalê ti qey xerq bîya, bê tebata,
Ti qey derd xûrê xora, pers nêkena,
Ti qey alîkarê, birîn kûrê xo nêbena,
De yagêre qayt ke, birîn kûrê to, çîqa naleno,

Ti kor bîya, ti xerq bîya, şaş bîya,
Bê mal û milkê dunya, çîyê nê vînena,
Bira mal jî torê, milk jî torê, bêsoxînê,
Mide soxîn be, mide hevalbe, mide dil û can be.

Ez tora ne mal, ne milk wazena,
Hîrîseyû des û di xaxê mi lerzenê.
Bêbext jî tîya, bê soxîn jî tîya, bê heval jî tîya,
Mide hevalbe, mide soxîn be, mide dil û can be.

Şima henî qaytê mi mekerêne, ez hondayke payrawa,
Ez xode vecena, giran giran roj beroj helîna,
De yagêre, birîn kûrê xora wayîr vecîye,
Alîkarbe, pê destê birîndarê xo bîge, xatir biwaze.

Ez birîndara, birîn kûra, bêdermana,
Birînê mi, weş nêbenê, dermanê xora gêrena,
Mexsed û miradê mi, hevalê minê,
Birînanê mi weşkerêne, mi hevalanê mi resnêne.

19.01.2009

ÇEWLÎG ŞÎRÎN O

Şîrîn o, şerbet o, zê nebat o Çewlîg,
Zê axîna dayîke, zê roşnaha çimano,
Zê gûla daristanî, zê pîvoka zozanano,
Mirê zê awa, çemû kanîyanê welatî şîrîno.

Daristanê to, zozanê to ke rindekê,
Awê toyê serdinî, koyê toyê berzî,
Rengê, gûl û sosinê to, perenê rûyê mordemî
Wile ke ti mirê şîrîna, Çewlig o rengên.

Koyê to, daristanê to, meskenê şêr û egîtanê,
Xwezil bira perê mi bibiyêne, mi serê zozananê to firdêne,
Mordem radî keno ke, koanê tora, bigêrone,
Mi berz firdêne ke, şêr û egîte welatî bivînîtêne.

Ey bacarê azadiye, meskenê şêran,
Bilindê welatan, zozanê şerwanan,
No rewş rewşê vinetene nîyo, mevîndêne,
Wayîrê zonê xo, nasnamê xo, çanda xo veciyêne.

28.01. 2010-ÇEWLÎG

BÛRÎSKÎ JENENÊ

Tewera hewrî kom biyê,
Bûrîskî zê, kevan jenenê,
Tariyo, tewera çimî çiman nêvînenê,
Ûsaro, wextê bûrîskan amo, zê kevan jenenê.

Hewrî amê ra, tewera va jî êno,
Varayîşî kerdo piro, vareno zê xo,
Hetê de bûrîsk jeneno, va êno, varan vareno,
De bivare, qeydê xode, rengê xode bivare.

Ti rahmeta demê ûsarîya, bivare,
Serê zozanan, mergan, ziman, koan bivare,
Çem û kanî derbiyê, pêl danê qeydê xode,
Bûrîskê ûsarî, tew mabên ci nêdanê, zê xo jenenê.

Demê ûsarîde zozanî, çîqa zîndiyê,
Gûl û sosinê çole, perenê rûyê mordemî,
Mordem radî keno ke, zozanande bimeşone,
Her çî wextê xode, rindeko, wextê xode zîndiyo.

Bûrîskê ûsarî bijene, domanan, metersne,
Ti ke jenena, domanî tersenê, xof kenê,
Henî rindek bijene ke, kesî metersne,
Wextê to ama, de xorê mirdî bijene.

03.02.2010-ÇEWLÎG

WELAT XEMGÎNO

Ti welatê de qedîm, welatê de ser bilinda,
Ti şehîdanê xorê, ser bilind vinde,
Beybûnanê azadiye, meşiknêne,
Welat xemgîno, sawa şêranê azadiye.

Çem û kanîyê to, zozanê to berbenê,
Koyê to, daristanê to xemgînê,
Sewalanê çole, veng kerdo berz berbenê.
Welat şehîdanê xorê berbena, zîbeno.

Ma xemgînîme, rewşê welatîrê,
Ma xemgînîme rewşê xort û kênanrê,
Ma xemgînîme rewşê siyaset medarenrê,
Ey welato qedîm, ti ser bilind vinde.

Ser bilind vinde ke, şarê to meberbone,
Dayîkê to, ronak bîrê to, cîwanê to meberbêne,
Dayîkê welatî, zê pepûg û goyînê, timî berbenê,
Ey welato qedîm, ti ser bilind vinde, meberbe.

Welato qedim, ûsaro ti bejna xo bixemelne,
Aşma adare de, ebe beybûnanê welatî bixeme
Welatî bejna xo zê veyvika, dest henîye xemelno,
Welato qedîm ti bejna xo, rengê xode bixemelne.

05.02.2010-ÇEWLÎG

MA MEXAPÊNE

Dem û dewran teyna şimarê nê,
Jîyana rindeke, teyna hêsa şima nîya,
Na welate kam estose, hêsa her kesîya,
Hîn beso, ma mexapnêne, marê jî azadiye.

Ma xap xapokê, şima nîme,
Ma kolû bendê, şima nîme,
Ma morabayê kesîjî nîme,
Kes endî, nêşkîno ma bixapnone.

No dewran, dewranê zûrekeran nîyo,
No dewran, dewranê fesadan nîyo,
No dewran, dewranê dizdan nîyo,
Beso ma mexapnêne, bawarîya mabe şima çînîya

Bêbextêne, şima domantîya ma qedêna,
Telaqreşêne, şima xortânîya ma heremna,
Gonî werêne, şima şewqetê zerê ma qedêna,
Hîn beso, ma mexapnêne, bawarîya mabe şima çînîya.

Şima zanenê ke, ma jîyanê de senêne, derbazkenîme,
Ma kûçanê bacarande, vile çewt, vêşan, viran gêrenîme,
Kar çînîyo, wer çînîyo, kê çînîyo marê, hîn beso,
Beso ma mexapnêne, bawarîya mabe şima çînîya.

Kanê dewê ma, kanê warê ma, xort û kênê ma,
Kanê cîranê ma, rewşen bîr û welat parêzê ma,
Şima kal û pîrê ma, sekerdî, xerîbîyede tebat nêkenê,
Hîn şimarê beso, ma pê şima qan nêbenîme.
Ewro roj, ê ma Serokê ma esto, şimarê beso,
Ewro roj îyê ke mara wayîr veciyênê, şervanê mayê,
Ma endî bê Serokê nêtewî, xêrce şerwananê azadiye,
Bîr û bawarîya mabe şima û sitemê şima çînîya.

02.03.2010-ÇEWLÎG

EZ HEWNÊ XO DE WELATÎ VÎNENA

Welato qedîm, ez ax û hesretê towa,
Ti bîna mina, sebrû diyaxê mina,
Hesretê welatê ma, timî vîramaderê,
Welato qedîm, ti hewnê şewan jî vîra madera.

Welato qedîm, de vengê mide, ez bêrêne welat,
Ez bêrêne welat, bira ax û hesretê mi biqediyê,
Ez pê çimê biratîye, welatra bigêrêne,
Welato qedîm, ez hewnê şewan jî to vînena.

Welatê roje, xerîbê to, xerîyede tora persenê,
Silamêde germ, xerîbanê xorê bişawe,
Bira gûlê xerîbanê to yabêne, kêf weşbêne,
Ez hewnê xode jî welatê xo vînena.

Usar amo, têrî firdanê şonê welat,
Têrêne, serê mi vindêne, mijî tey xo berêne,
Berêne welatê roje, ez ax û hesretê welatîya,
Ma bême jî, meyême jî, ti welatê mawa.

Şima soz dabî mi, ejî tey xo berdêne welat,
Şima ebe axînanê zerê xo, kenê ke, mijî berêne,
Welat axîna zerê mina, caran mi vîrera nêşono,
Ez hewnê şewan jî, koanê welatîra gêrene.

De bê, xerîbê welatan de bê,
Sebrê welatê xo, kenake de bê,
Ma pîya şimime welat, pîya bigêrime,
Ejî zê to, hewnê xode, welatî vînena.

Xerîbiye ez helêna, laylaj kerda,
Ax û hesretan, ez pîr û kal kerda,
Mibe nî xem û xîyalan, meverdêne,
Axînanê zerê xo kenêke, mijî berêne.

Mi axa welatê mide, wedarêne,
Pê axa welatê roje, kûl û birînanê mi tînimnêne,
Mexsed û miradê mi, azadîya welatê rojewa,
De torê oxûrbone, ti axa welatê xode ra, xerîbê welatan.

06.05.2010

XEZEB MA RA VARENO

Ti vana xezebo, tofano mara vareno,
Hetêde, jariye, koçberîye û xerîbiye,
Heto bînde, laometîye, bêkesîye,
Îlam derdê, bêbextîye û bê kesîye.

Xezeb henî mara vareno ke,
Kanê nasnamê ma, zonê ma,
Kanê dîroka ma, rengê ma,
Kanê azadiyama, olê ma.

No xezebê, bêbextano, mara vareno,
No xezebê xezebtûlan, mara vareno,
Ma xezeb nêwazenîme, biratîye wazenîme,
Kanê marê jî azadiye, marê jî biratîye.

Mabe zonê xo, nasnamê xo, rindekîme,
Ma serê, ser bilindîya xo vindeme,
Bêrêne ma destê xo bidime pê, pîya ravazime,
Bira mara xezeb mevarone, kiştene para ma nêbone.

Şima şarê mawo ser bilind, vêşan, têşan verda,
Ey xezeb tûlayêne, şima mara çi wazenê,
No honday xezebo ke mara vareno, bes nîyo,
Şerm bikerêne, heya bikerêne, hîn beso.

08.10.2010

MA MEXAPÊNE

Şima qey rast nêvanê,
Durîtîye de şima çi dîyo,
Nî şarê qedîmî, mexapêne,
Mara raste vacêne, raste qesîkerêne.

Araqê çarê mordemî, ked helaliya,
Araqê çarê mordemî, vindî mekerêne,
Ebe vatenanê xo, şarê mayê qedîmî qan mekerêne,
Bêrêne ma jûbinîde, rast vindeme, rast qesîkeme.

Nî ma xapnenê, nî made raste qal nêkenê,
Nî ma kesernenê, nî dûrîtîye kenê, ma qan kenê,
Endî ma be, vatenanê nînan qan nêbenîme,
Mabe bîr û bawarîya xo, rêberê xo bawarîme.

Şerwananê azadîye çila ke fîsta ta,
Ma roştîya a çilade xo, azad vînenîme,
Hezar sera ke, şima ma qankenê,
Ma endî xap xapokê şima nîme, hîn beso.

De bêrêne ma zê biran, zê cîranan,
Zonê herkesî azdbone, nasname azad bone,
Dibistanan de her şar, ebe zonê xo perwedebone,
Hîn beso, mabe şima bawar nîme, ma qan mekerêne.

10.10.2010

ÇİLÊ MEZRANÊ DAREBÎYE NÊVÊŞENE

Ey koyê karêr babay,
Kanê cîranê toyê mezra Lolan
Kanê bûlûr vanê to, bizêbanê to,
Şûyanû gabanê to, welate tew kes nêmando.

Kanê cîranê to, apo Welîyê Hûzî,
Apo Cafîrê Silêmanê Mûrtî, apo Sebrî,
Defê qayt ke, mezra Lolande kes nêmando,
Zimistano, mezra Lolan melûla, tek çîla nêvêşena.

Hey wax, mezra Bekande jî kes çînîyo,
Kê Eskenderê Kekî, Babayê werqî, Heyderê Dilî,
Cîranan bar kerdo, çîla kesî nêvêşena, hey wax,
Zimistano, çilê mezra Bekan jî nêvêşenê.

Mezra Sofyan û Şavan verba jubînîya,
Çilê na mezra jî, zaf melûl vêşenê,
Kanê terziyê karêrî, apo Îbil, Rizayê kêna axay,
Alîyê Memikî, kam estokeye, çilê kamî bivêşene,

Lerze meke heval zimistano, Bertalan û Zerkande jî,
Kes nêmando tew dûyê kesî, wenêdarîno,
De ravaze bira de ravaze, kes nêmando mezrande,
Rast jî çilê mezranê Darebîye nêvêşenê, melûlê,

Mi verê xo da Gûşkan, Mergahemî û Qûrbete,
Gûşkan şênatîya, çilî vêşenê, Mergahemî û Qûrbete,
Wêrano, çilê meezranê, Darebîye nêvêşenê, melûlê,
De ravaze bira, de ravaze, mezranê Darebîyede, kes nêmando.

De şo ma şimime, Mamûdan û Tengdere,
Na mezra jî melûla, zimistano, çilê mezran nêvêşenê,
Ti endî cîrananê verî nêvînena, zafine koç kerdo şîyê,
Dewan û mezranê made, çilê cîranan nêvêşenê.

Ma verê xo da mezra Axakûye û xatûn ware,
Axakûye meskenê Mehemed Efendiyê Karêribîye,
Ewro roj konax şaniyo we, mezra wêrana, kes nêmeno,
Ne Xatûnware, ne jî Axakûy de, ti vanê wele vîta ro kes nêmen-
do.

Dewa Darebîyede jî zimistanî çar kêy manenê,
Dewe melûla, rojê jû bimirone kes çiniyo mezele bikinone,
Dewe û mezran rewra verê zorbazanra, koç kerdo zaf dûrî şiyê,
Ne mezrande, ne jî dewede, çilê kesî nêvêşenê cîranan koç kerdo,
koçber biyê.

2010- ÇEWLÎG

EZ KOR BÎYÊNE

Bira ez korbîyêne,
Mibe roşnahanê xo,
Jarîya şîma nêdîyêne,
Derdê serê derdan, jarîya şîmarê.

Ey bacarê Dêrsimî,
Bira ez korbîyêne,
Mi gazî û hawariya dayîkan,
Nêheşnêne, mezanitêne.

Sera hîrîs û hawt û heyşt te,
Wileke şîma feqîriye û bê kesîye diye,
Derd giran şîmabî, şêr û egîtê kurdan jî şîmabî.
Jarîya şîmarê, dar û kemerê çole amêbî zon.

Bira zonê dar û kemerê Dêrsimî bibîyêne,
Bîyamêne zon ke, şarê Dêrsimî çîqa merdene,
Koçber îye, vêşaniye, viraniye, bê kesîye diya,
Bîyamêne zon, a jarîya şîmarê, sacî non nêpotêne.

De vacêne, çem û kaniyê Dêrsimî,
De bêrêne zon, jarîya Dêrsimîrê,
Sebeno, kamî çî dîyo qesîkerêne,
Jarîya Dêrsimî, qal kerêne ke, aleme, bizanone.

Qesîkerêne ke, nî şarê qedîmî çî dîyo,
Çî nêdêdîyo, bira her kes bizanone,
Çîqa xort û kênê dest henî, amê kîştene,
Bizanêne ke heqe bidêne nî şarê qedîmî.

De vace koyê Dêrsimî, çemê Mûnzirî,
Şîma qey vey nêkenê, nî şarîra vacêne,
Sewalê çole, şîma qey vey nêkenê,
Şîma pîlanê xora çî heşno, înan qesîkerêne,

Şima díroka Dêrsimî rindek zanenê,
Mêr xasiya Syîd Rizay vacêne,
Berbişê daîkan û domanan vacêne,
Çiqa gonî, serê kemeranê Dêrsimî rişîya vacêne.

Çem û kanîyê Dêrsimî, bêrê zon,
Ez şimara vana, mi biheşnêne,
Şima qey vey nêkenê, kamîra xof kenê,
Çira şima nêne zon, nêvanê hîn beso.

No zûlmê, zulumkarano,
No zûlmê sistemê qilêriyo
Ey zûlim karêne, qetil xûrêne,
Şima verê qatliamê Dêrsimîra, mirdî nêwenê.

Ey bêbextêne, telaq reşêne,
Gonîwerêne, bê însafêne,
Şimarê jî nêmaneno, rind bizanêne,
Derdê serê derdan, jarîya Dêrsimîrê.

25.01.2011-ÇEWLÎG

EZ XEMGÎNA

Ez dil û kezeba xo ra xemgîn o,
Na dewrde, peso xêrxwaz nêmeno,
Mordemê xêrxwazî, zaf kemî mendê,
Kûl û bîrîné mi, kûrê, bê dermanê.

Xem û xîyalê mi, bêkesîya mina,
Qey kes araqê çarê mi, nêvînenê,
No honday kedê mi, qey vîndikenê,
Xemgînîya mi, bê kesîya mina.

Ez bîrîna xorê nalena,
Derd girana, derdê xora gêrena,
Neyarî zê timî qaytê mikenê,
Şima qey zê neyaran, qaytê mi kenê.

Ey hêvîya dil û bedene mi,
Şima, neyaranra bîyê neyar,
Qey zê neyaran qaytê mi kenê,
Şima hêvîya minê, roşnaha minê.

Ez çîqa binalê, bikalê, şima vîra miderê,
Qey şima şaş bîyê, kor bîyê nêvînenê,
Heyanû key na korbîna şima, şaşbîna şima,
Şima hêvîya minê, roşnaha, çîmanê minê.

Ez nî rewşîra tersena, xof kena,
Bêbextîye, laometîye fayde nêkena,
Ze bêbextan, laometan qaytê mi mekerêne,
Şima hêvîya minê roşnaha çîmanê minê.

13.01.2013-ÇEWLÎG

GONÎWERÊ NÊVINDENE

Sebeno, mira lome mekerêne,
Ez rewşê şarê marê, bê hedûra,
Bê hedûra, derd girana, bê dermana,
Gonî werî, gonîbe gonî pakenê.

Qey Kûrdanrê qedrû qîmet çiniyo,
Nasname qedexo, zon qedexo, reng qedexo,
Perwedahî qedexo, çand û hûner qedexo,
Made hedûr nêmando, derman jî nêmando.

Gonî werî hîna jî serê vatenanê xoyê,
Nêzananê ke, na welate adir vareno,
No adir, teyna serê Kûrdan nêvareno ,
Pêrkoyê welatîra vila beno, her kesî vêşneno.

De bilorne daye, rind bilorne,
Şervanê ma şonê, înanrê bilorne,
Kam çizano, defêna key ênê,
Bilorne dayê bilorne, şerwananê marê bilorne.

Nî ceberûtê, nêvindenê, har bîyê,
Nî hewnê şewanê ma heremnenê,
Nî rindîyera, cîrantîyera, fam nêkenê,
Nî gonî werê kenêke gonîbe gonî bûşîyêne.

12.04.2013-ÇEWLÎG

TI BIVÊŞAYENE PARÎS

Ewro welat xemgîno, şarê ma xemgîn o,
Dêrsim pozzîno, daîka to pozzîna,
Ti şêr û egîta Kûrdan, roşnaha mabîya
Ti bivêşêne Parîs, adir toranişone Fransa.

De vace dewleta telaqreşe, bêbexte,
Kanê mafê mordemanê to, hûqîqê to,
Kanê demoqrasîyê to, marîfetê to,
Ti bivêşêne Parîs, adir toranişone Fransa.

Gonî werêne, şîma se qemîşe, şêr û egîtan bî,
Sakîne, Fîdan, Leyla, hîrê şêr û egîte Kûrdan,
Şîma xof nêkerd, mafê mordemanra, şerm nêkerd,
Ti bivêşêne Parîs, adir toranişo Fransa.

Dayê xerîbîye zora, zaf zora,
Îlam jî Fransa, Parîs de zora,
Kam çizano, xem û xîyalê şîma çibî,
Ti bivêşêne Parîs, adir toranişo Fransa.

Ser bilinda dayîka xo, roşnaha çîman,
Zerê dayîka to çîqa vêşeno,
Ê şarê majî, honday vêşeno,
Ti bivêşêne Parîs, adir toranişo Fransa.

Dayê dayê xerîbê dayê, goyîne dayê,
Bê kesê, bê hedûrê dayê, xerîbê mayê,
Welatra dûrî menda, bê sebrê bê tamûlê dayê,
Ti bivêşêne Parîs, adir toranişone Fransa.

Hevala Sakîne, çar parçê Kûrdan torê helîno,
Zê ronê tawîke, zerê daîkan torê vêşeno,
Ti ser bilinda Kûrdan, rûmeta mabîya,
Ti bivêşêne Parîs, adir toranişone Fransa.

De bêrêne ma pîya bilornime, pîya qalkeme,
Pîya ser bilindîyê de pile nişandime,
Bira aleme û Fransa, ma bê kes, bê serok mezanone,
Ti bivêşêne Parîs, adir toranişone Fransa.

De bê bê hevala Sakîne bê,
Ewro ti meymanê Dêrsimî ya,
Koyê Dêrsimî, zozanê Dêrsimî, xemgînê,
Ti bivêşêne Parîs, adir toranişone Fransa.

Sewalê çole, dar û berê Dêrsimî,
Torê biyê kemer best, çîqa xemgînê,
Têr û tûran ref girê do, amê şezde,
Ti bivêşêne Parîs, adir toranişo Fransa.

Dewlata faşîste, gonî were,
To se hîrê tekoşerê Kûrdan,
Ser bilindê Kûrdan, vîndî kerdî,
Ti bivêşêne Parîs, adir toranişo Fransa.

Ey mafê mordemanê aleme,
Rind goş serê madêne, ma naskerêne,
Ma qetlîamê Parîsî tew xo vîrera nêkenîme,
Ti bivêşêne Parîs, adir toranişo Fransa.

13.04.2013-ÇEWLÎG

EZ BÎYA PEPÛG Û GOYÎN

Ez derdê xorê,
Kûl û bîrînanê xorê,
Sebr û dîyaxê xorê wanena,
Ez bîya pepûg û goyîn derdanrê.

Pepûg serê gaz û koan waneno,
Ez her cayê welatîde, her wext wanena,
Pepûg wextê kengerî de waneno,
Ez her wext, her cayê welatî de wanena.

Wexto ke, kela kela zerê mi êna,
Ez ebe dil û can, derdê welatîrê wanena,
Mordemo bîrîn kûr jî, tey mi waneno,
Daîkê welatî, derdê xorê zê pepûg wanenê.

Ey pepûg o, dil bîrîn û derd giran,
Ti xo teyna, derd giran mezane,
Majî zê to, derd giranîme, bîrîndarî me,
Bê ma pîya derdê xorê, biwanime, bilornime.

Lo lo pepûgo, derd girano, usar amo,
Kengerî kewe bîyê, kela kela zerê to nêvindena,
Ti wanena derdê biratîyerê, ti bîrîn kûra,
Biwane derd giranê welatê roje, min û xorê biwane.

Daîkê şehîdan jî zê to, bîyê pepûg û goyîn,
Derd giranî derdê to zanenê, de xorê biwane,
Ti bîrîndarê birayê xowa, biratîye zora,
Şima derd giranî, bîrîn kûrî, şoretê welatê mayê.

22.05.2013- ÇEWLÎG

AX LEMINÊ WAY FELEKÊ(SITRAN)

Ax leminê way felekê,
Bê bextê, bê henekê,
Serokê netewî, li girava Îmralî yê,
Maye bin destê Roma bêbext,
Gelê biran wele, Rom bêbexte,
Ezê gazî û hewariya xwe,
Gelên welat parêzên alemêra dişinim,
Hûnê çêbin çê bixewitin,
Emê destê Serokê Netewî,
Ji bin destê roma bêbext, derxin,
Ax leminê way felekê,
Bêbextê bê henekê,
Te çima le me wakir,
Agir li ser serê, xort û qîz û,
Bûk û welat parêzên gelê Kûrdan rakir,
Gelê Tirkan, Ereban, Laz û Çerkezan,
Wele em biratiyê dixwazin,
Hezar sale ke em û gelê,
Tirkan, Ereban, laz û çerkezan,
Nav hevda dijên,
Birano heyran wele em,
Biratiya rastkên dixwazin,
Dijminatî ne barê meye,
Ne ji karê meye,
Daxwazî kî me jî heye,
Gelên welat parêzên alemê ra,
Em dibê jin em jî mirovin,
Dawa heqê xwe dikin,
We çima serokê netewî, bêbextî yêde
Avitiye heps û zîndanên,
Ax leminê way felekê,
Bêbextê bê henekê,
Te çima le me wakir,
Agir le ser serê xort û qîz û,
Welat parêzên gelê Kûrdan rakir,
Rêberê Kûrdan li girava Îmralî yê,
Gazî û hewariya xwe dişîne gelê Kûrdan ra,

Hûnê çêbin çê bixebitin,
 Wele biratîya gelan karê meye,
 Ax leminê way felekê,
 Bêbextê bê henekê,
 Te çima le me wa kir,
 Agir le ser serê xort û qîz û,
 Bûk û welat parêzên gelê kûrdan rakir,
 Birano wele, doza me doza,
 Seyriza ye, Şêx Saîde, Qazî Mûhamede,
 Doza me doza Serokê Netewî ye,
 Wele doza me doza serfirazîya gelê meye,
 Îsal çendek û çend sale,
 Emê ber xwe didin,
 Em dibên sexwebûn jîyane,
 Ax leminê way felekê
 Bêbextê bê henekê,
 Te çima le me wakir,
 Agir le ser serê, xort û qîz û,
 Bûk û welat parêzên gelê Kûrdan rakir,
 Hela tûyê carê mêze ke,
 Kûrdistana rengînda,
 Gundîyan koç kirine,
 Hemû koçber bûne,
 Berê xwe dane metropolên Tirkan,
 Têda bela bûne,
 Ax leminê way felekê,
 Bêbextê bê henekê,
 Te çima le me wa kir,
 Agir le ser serê xort û qîz û,
 Welat parêzên gelê Kûrdan rakir.
 Birano wele welat şîrîne,
 Mîrov nikane terkê welat bike,
 Welat şîrîne axa meye,
 Şûna bav û kalê meye,
 Ax leminê way felekê,
 Bêbextê bê henekê ,
 Te çima le me wakir,
 Agir le ser serê xort û qîz û,
 Welatparêzên gelên Kûrdan rakir.

05.06.1999 –SERÎNYOL

DE MEBERBE

Ez ax kerdena, dayîkan rê berbena,
Lornayîşê dayîkan rê berbena,
Teyna mendîşê dayîkan rê berbena,
Na bêkesîya dayîkan rê berbena.

Ejî dayîka, zerê mi vêşeno
Êstîrî çimanê mira, xo ver ênê war,
Zê laserê usarî, xo ver ênê war,
Na bê kesîye rê, êstîrê kamî nêne.

Na jarîya ma, barê xo girano,
Derd xûrî, derdê marê berbenê,
Ma bîrîn kûrîme, derd giranîme,
Na jarîya marê, kes daymiş nêbeno.

Axa welatê roje de, qetlû qutalî zaf bîyê,
Her bosta welatê made, gonî rişîya,
Bîr û bawarîya mabe, sistemî nêmenda,
Ma derd giranîme, berbîşê ma xo ver êno.

Berbîşî marê tomet mekerêne.
Lornayîşî marê, zêde mevînêne,
Ma derd giranîme, bîrîndarîme,
Kezeba ma vêşena, weyîdîya marê.

Mara vanê, de meberbêne
Nî lornayîşê xo, bidê vinetene,
Ma bîme pepûg, goyîn ax kenîme,
Ma bîrîndarîme, bîrîn kûrîme, ax kenîme.

Heroj serê ma zê torge, bombî varenê,
Xort û kênanê ma kişenê, koçber kenê,
Ma gere se meberbime, se melornime,
Zerê ma vêşeno, êstîrî çimanê mara, xo ver ênê.

Ma bîrîndarîme, bîrîn kûrîme,
Ax kenîme, of kenîme, xort û kênanê xorê,
Derman ra gêrenîme, ma bîrîndarîme,
De meberbe ke, ti se meberbêne.

Mordem welatê xode, bindest bone zoro,
Dayîkê ma heroj berbenê, lornenê, ax kenê,
Ti vana berbîş, na alemede teyna hêsa mana,
Hîn beso bes, berbîşê dayîkanê ma beso.

Ewro roj oncîna serê ma, adir vareno,
Koanra dû darîno we, vengê topan êno,
Kam çizano gonî weran, kotî xirabe kerdo,
Zerê dayîkanê ma, kalanê ma, marê helîno.

ÇEMÊ PÊRÎYE

Ewro roj, ti bîrîndara, xemgîna,
Sîstemo qilêr, qeydê xode kaykeno,
Dewlete azadiya tora, xof kerdêne,
Ewro ti vile çewta, bîrîndara, xemgîna.

Delavê to zê misk û ambe ro,
Gûl û sosinê to, reng be rengîbî,
To vatêne tey şalîn û bilbil waneno,
Ewro ti vile çewta, xemgîna, bîrîndara.

Awa to, rengê xode, zelal, hêrikîyêne
Melorne, çemê pêrîye, melorne, meberbe,
Ewro ti, xemgîna bîrîndara, bê dermana,
De bê ma pîya bilornime, biberbime.

Awa tode masû ajne kenê,
Ejî wazena tey masûyan ajnekerêne,
Verê xo, bidêne bacarê Dêrsîmî,
Cayê mêr xasan, bacarê Seyd Riza yo.

Verba ma ûsaro, wextê to amo,
Kela kela zerê to ama, de xorê bilorne,
Dar û berê dormê to, silam danê to,
De bimeşe, ser bilindê welatê xo, bimeşe.

Ti wazena, qeydê xode, azad bimeşêne,
Kanê azadiye, xoserîye, ser bilindîye,
Sîstemo qilêr, xoserîya to, nêwazeno,
Nêverdano ti ebe azadiye bimeşêne.

Çemê pêrîye, ewro oncîna xemgîno,
Awa çemê pêrîye, lêmişt hêrikîna,
Masûyê çemê Pêrîye, berbenê derd giranê,
Vanê sebena awa ma, qilêr mekerêne.

Ma nê mûsaye, awa lê mişte, qilêre,
Vindêne bira awa ma, zêlal bêrone,
Marê awa zelale, zêde mevinêne,
Vindêne bira çemê Pêrîye azad bimeşone.

Sistemê qilêrî raû dirbê ma birnê,
Ez bê cîran, bê heval menda,
Delavê Pêrîye kifş nîyo, ti nas nêkene,
Çemê Pêrîye, birîndaro, derd girano, bê dermano.

Mirê azadîye, serbilindîye zêde mevinêne,
Vindêne ez qeydê xode zê verî bimeşêne,
Bêbextê ne şima, delavê çemê Pêrîye miçiqno,
Çemê Pêrîye, birîn kûro, naleno rewşê xorê.

GORGEÇÎNÊ AŞTÎYE

Gorgeçînê welatê roje,
Şima xêr amê, çiman ser amê,
Çimê ma rayerabî, sawa şima,
Şima axîne mayê, gorgeçînê mayê.

Mevindêne, bêrêne, qey dereng kewtî,
Welat serê şima vile çewto, xemgîno,
Şima qasidê aştiye yê, gorgeçînê mayê,
Rewşê şima, vinetena şima, azadîya mawa.

Sebrû tamûlê dayikanê aştiye, nêmeno,
Şima sebrê dayikanê, roşnaha dayikanê,
Ewro roj aleme silam dana şima,
Şima gorgeçînê welatîyê, ser bilindê mayê.

Xwezila bira ez têrêbîyêne,
Perê mi bibîyêne, mi firdêne
Zê pepûgî, mi derdê xorê, biwendêne,
Jîyana şima, rewşê şima, çimanê xo bidîyêne.

Mi destê birîndarê xo, bigoritêne,
Bîrîna birîndarê xo, ebe destanê xo, bikewênêne,
Ebe destanê xo, derman kerdêne,
Hela birîndarê mi, dayîka xora se vatêne.

Şehîdê dayîka xo, ez dil bîrîna, xemgîna,
Çimê dayikanê şima, şimarê korbêne,
Şima roşnaha mayê, dil û canê mayê,
Ser bilindê welatê rojeyê, axîna mayê.

2014-ÇEWLÎG

SERHÎLDANÊ KOBANÊ

Ey şêr û egîtê kantona bacarê Kobanê,
Şîma hebûna mayê, roşnaha mayê,
Serbilindîya şîma, azadîya welatê rojewa,
Vengê ser bilindîya şîma, tamamê alemê vila bîyo.

Serê kantona Kobanê axir zemano,
Himnî û gimnîya topana, tew mecal nêdanê,
Qîre qîra dayikan, gazî hewarîya şerwanan,
Bêbext mevindêne, ewro roja mêrxasana.

Welat parêzî, xeta Kobanê de, kewtê rêze,
Selam danê şerwananê azadîye, hezar silam,
Şîmara helal bone, şêr û egîtê, welatê roje,
Şîma hebûna mayê, ser bilindê mayê, roşnaha mayê.

Ez şîma şerwananê azadîye, hewnê xode vînena,
Çira ke xem û xîyalê dayikan, azadîya Kobanê ya,
Ewro roj azadîya Kobanê, azadîya welatê rojewa,
Şîma şêr û egîtê mayê, roşnaha mayê, ser bilindê mayê.

Ey welatparêzê welatan, mevindêne, de bêrêne,
Ma welatê roje, bindestîyera rareynime, azad keme,
Ewro roja mêr xasana, bêbext mevindêne, xûrt vindêne,
Şerwananê azadîye, çila azadîye, Rojawade fîsta ta.

Na xete, xeta Serok Apo ya, xeta azadî ye wa,
Ser firazîya pêrkoyê şaran, ser bilindîya şerwanana,
Toximê azadîye, Rojawa de, xûrt kewe bîyo,
Şîma şêr û egîtê mayê, ser bilindê mayê, roşnaha mayê.

Ewro roj ser bilindîya şîma, welat parêzanrê, bîya mînak
Bacarê Kobanê ra dû darîno we, wengê topan êno,
Kelpanê neyaran, fermanê welat parêzan veto,
Ey welat parêzê alemê, xûrt vindêne, ser bilind vindêne.

Ey bêbextêne defê sarê xo berz kerêne, qaytê alemekerêne,
Hela aleme şimara se vana, qetil xûrêne, bêbextêne,
Şima şarê mazlûmî qetil kenê, gonîbe gonî pa nêbena,
Şêr û egîtê welatê roje, naye şimarê nêvardanê.

Şûna zûlmî kewebiyêne se, xeta Sadamî kewe biyêne,
Mekerêne mekerêne, nî zûlmî, şarê mazlûmîra mekerêne,
De bêrêne ma pîya, jîyanê de azade kewekeme,
Bira defêna na welate, zûlûm nê, toxime azadiye kewebone.

2014- ÇEWLIG

DE BIBERBE

De xorê mirdî biberbe,
Welatê xorê biberbe,
Xort û kênanê xorê, biberbe,
Derd giranê xorê, biberbe.

Kal û pîrê welatî, vile çewtê,
Xemgînê, bê hêvî mende,
Çimê kalan hêvîtîya şimarawo,
Nî kal û pîranê xora, wayîr vecîyêne.

Usaro welate, gûl û sosinî têra biyê,
Gûl û sosinê welatîcî, vile çewtê,
Çem û kanîyê welatî, xemgînê,
De xorê biberbe, sawa welatê roje,

Kanê to vatêne, ez nêberbena,
Ez kesî ebe berbîşê xo, şa nêkena,
Bira kes pê berbîşê ma, şa mebone,
De meberbe, derd girana welatê xo, meberbe.

Usaro rengêno, kela kela zerê mi ama,
Hedûr nêdanê mi, ez se meberbêne,
Çimanê mira êstirî, xo ver ênê war,
De meberbe ke, ti se meberbêne.

Mordemo derd giran poxzîno, berbeno,
Mordemo bê hêvî, bê kes mendo, berbeno,
Kes kêfanê xorê nêberbeno, rind bizanêne,
De meberbe ke, ti senî meberbêne.

Ez bê kes, bê hêvî menda,
Ewro roj, dormê mide kes nêmendo,
Ez zaf bê omîd, bê kes menda,
Ez zafêrî, bê kesîya marê berbena.

18.03.2015

DÛRÎ QAYT KENA

Welat ra zaf dûrî kewta,
Hesreta welatî, timî zerê midera,
Xerîbîyede kam çizano, ti qey hesrete ancena,
Ez ebe hurdmîne roşnahanê xo qayt kena, welatî nêvînena.

Xerîb menda, teyna menda na welat te,
Kamîrê çi, xerîbîya to, bêkesîya to,
Kes tora pers jî nêkeno, ti senêna, qey pozzîna,
Çiqa ez dûrî qaytkerêne jî, welatî nêvînena.

Ey welato şîrîn, ti hewnê şewande jî,
Ma vîrera nêşona, ma ax û hesretê toyme,
Qomê macî, ma vîrera nêşono, ez xemgîna,
Ez hondayê bilind qaytkena nêkena, to nêvînena.

Bêbextan, bêbextiyedê ez qefelna,
Kanê bextê şima, sozê şima,
Şima mûsê timî zê xo kaykenê,
Majî zê şima qayt nêkenîme, zê biran qayt kenîme.

Roşnahê mi lêl biyê, ez nêvînena,
Hevalê mi dûrî kewtê, ez nêvînena,
Hesreta mi, axîna zere mi, vînîtena welatîya,
Ez honday ax û hesretê towa, ey welat.

Ey welato bê zar û bê zon,
Î koyê berzê, serbilindê to,
Î zozan û çemû kanîyê to,
Ez dûrî kewta, şimarê silamê xo rûşnena.

Ez mirena, ebe axîna to,
Ez vile çewta, sawa axa xo,
Ez ax kena, sawa hevalanê xo,
Ti mirê çîqa şîrîna, ey welato qedîm..

19.03.2015

BÎRÎN KÛR MAYÎ ME

Tan û niçanê sîstemê qilêrîrê beso,
Nî şerm nêkenê, fedî nêkenê,
Timî pê ma kaykenê, tinazanê xo kene,
Mayî me ke derdê nînan wenîme, qarê nînan ancenîme.

Endî naz û leq û lûqanê nînanrê beso,
Mafê mordeman estose, ma pêrkûnerê, zê jûbînî,
Jîyanêde azade estase, ma pêrkûnerê,
Teyna şîmarê azadiye, serfiraziye qewîl nêkenîme.

Vatenê ma, vatenê azadiyeyê, biratiyeyê,
Karê ma, vatenê ma sawa pêrkoyê şarano,
Mirad û mexsedê ma, biratiya gelana,
Bîrîn kûr mayme, bar giran mayme, bê hedûr mayme.

Kanê şîma biratiya, ma waştêne,
Kanê şîma defêna derdê ma, têra nêkerdene,
Kanê şîma azadiya ma, waştêne,
Şîma ma kerdîme bîrîn kûr û derd giran.

Ma ebe vatenanê şîma, bawar nîme,
Vatenê şîma, kulan kene zerê ma,
Ma bîme, bîrîn kûr û derd giran,
Hîn beso, şerm bikerêne, ma mexapnêne.

Ê şîma, şan û şodirê şîma, kifş niyo,
Sozê şîma, qedrû qîmetê şîma, çîniyo,
Vatenê şîma, kulan kenê zerê ma,
Zê xo kay mekerêne, zê xo qerar ci medêne.

Heyanû roca ewroy, bîrîn kûr mayme,
Bê kes, bê hêvî, bê waîr mende, mayme,
Endî vatenanê şîmarê, bîr û bawariya ma çîniya,
Endî zê xo kay mekerêne, ma pîya qerar cidîme.

23.03. 2015

QEY VILE ÇEWTA

Henî vile çewt, qaytê mi meke,
Ez tora zede, bîrîn kura, derd girana,
Kokima, weîda, bêhêviya, taqat çînîyo,
Mecal nêmando, coka ez vile çewtiye, qaytê to kena.

Ti mira alikariye wazena, hêvitiye wazena,
Ejî zê to bê hêvi, bê kes, weid menda,
Ez qaytê kena, zere mi vêşeno, tar beno,
Bê waîriye, bê kesîye, zora heval.

Sebeno henî vile çewt, qaytê mi meke,
Mi tey jîyana xo, mehelêne, tar meke,
Ser bilind vinde, jîhatî vinde, xûrt vinde,
Her kes zê ma bê kes, bê waîr mendo meterse.

Ti mirê zê gula daristanî, pîvoka vere varewa,
Ti mirê zê dermanê, hekîmê loqmana,
Ti mirê zê roşnaha çiman, axîna welatiya,
Sebeno, henî vile çewt, melül, qaytê mi meke.

Zerê mi sawa to gonî şono, ez xemgîna,
A vinetena to, qayt kerdîşê to, mi helêneno,
Mî tar keno, tew caran mi vîrera nêşono,
Sebeno henî melül, vile çewt, qaytê mi meke.

Ma zê jûbinî, bîrîn kûrîme, derd giranîme,
Şarê ma zafêrî zê mayê, minete nêkenê,
Macî ser bilind vindeme, xûrt vindeme,
Vile çewtiya to, xemgîniya mina heval.

De bê hevalo derd giran, de bê,
Ma derdanê xo, bêkesiya xo, parekime,
Destê xo bidime jûbinî, xurt vindime,
Bira neyar û bêbextî pê jîyana ma, kêf mekerêne.

25.03.2015

TI AXÎNA MI NA

Birawo qickek, hevalo rû nerm,
Ti timî, vîra midera, sebrêmi,
Ez to nêvînena, birawo qickek,
Ti sebrê mina, roşnaha çîmanê mina.

Ti hewnê şewande jî, xîyalê midera,
Ez tora dûrî kewta, bindesta, ewro roj,
Xwezil bira ez têrê biyêne, mi firdêne,
Hetê birayê qickekîde ronîştêne, sebra zeremi.

Kanê ma her şewe jûbînîde qal kerdêne,
To tew awir nêdêne ma, kêf weşîya to kaykerdenebî,
Xwezil bira ma defê jûbînî bidîyêne, Sitar Alî,
Ti axîna mina, roşnaha çîmanê mina, sebrê mina.

Vengê to, kaykerdişê to, verê çîmanê mira nêşono,
To se vatêne ma pê vatenanê to, kêf weş biyêne,
To marê zê teberika, bira Sitar Alî, hevalo qickek,
De bê ma jûbînî bivînîme, birawo gonî germ.

Xwezil bira mi hewnê şewande to bidîyêne,
Ti qey hewnê şewande, meymanê mi nêbena,
Ez honday ax û hesretê towa, Sitar Alî,
De bê, ma jûbînî bivînîme, sebra zerê mi.

Tewer vînitene cabe ca gêrayîş, marê çîniyo,
Ez teyna azmênê kewî vînena, ez heyran,
Gorgeçînê daîka xo, ez heyran, Sitar Alî,
Ti axîna mina, roşnaha çîmanê mina,

Varan vareno mi hît nêkeno,
Vare varena, ez nêcemedîna,
Tîce vecîna, ez germ nêbena,
Ez mîyanê çar dêsande, bin desta heval.

08.04.2016

ZOZANÊ WELATÎ

Aşma gulanede, hercayê welatî zîndîyo,
Ti radî kenake, zozananra temaşekerêne,
Gul û sosinan ebe rengê xo, zozanî, xemelnê,
Zozanî rengê xode xemelîyê, rengbe rengê.

Zozanê welatî jî vile çewtê, alîkarîye wazenê,
Serê qomê xo, şûyanû gabanên xo, vile çewtê,
Veng danê, vengê qomê xo danê, bê hedûr mendê,
Vanê yagêrê welat, ma axû hesreta xode meverdêne.

Ma zozanande, pîya hûyêne, pîya kaykerdêne,
Şîma ma vile çewt verdayme, bê kes verdayme,
Zozanê welatî, tevla şîma rindêkê, serbilindê,
De yagêrê welat, zozanî bê cîran mende.

Kanê şîma mara vatêne, ma pîya rindekîme,
Şîma şî, ma teyna verdayme, bê hêvî verdayme,
Tebatê ma jî nêmendo, ma bê tebat bîme,
Ma kokimîme, bê hêvî mendîme, taqat nêmendo,

Ma bê hêvî, bê cîran, bê heval meverdêne,
Zozanê şerevdînî çavreşîye, vengê ma dane,
Warê deşte, zoravan, şewtîyan, mergemîre veng danê,
Kanê şîma soz dabî ma, şîma bê cîran nêverdanîme.

Zozanande, sewalê çole jî, bê hedûrê, xemgînê,
Têr û turan, ref girê do, vecînê zozanan,
Wextê înan amo, qazan û qûlingan, veg kerdo berz,
Verba zozanan fîrdanê, ti vana şalîn bilbilo wanenê.

Welate kenger kewe bîyo, pepûg qeydê xo de waneno,
Ebe dil û can derdê xorê waneno, xemgîno, derd girano,
Usar amo, daîkê şehîdan jî, tey pepûgî, şehîdanê xorê lornenê,
Veng kerdo tê ebe dil û can derde xorê, lornenê.

19.04.2015

ZERRÎ MI VÊŞENA

Şano çar hawêrê mi sûr û bedeno,
Ez tewer nêvîna, teyna azmênî vîna,
Gegene vengê têr û turan, çûçikan heşnena,
Ewro roj usar amo welat, welat zaf zîndîyo.

Çûçîkî berz fir danê, qîşte qîştâ îna,
Îcî catkenê ke, vecîyêne zozanan,
Wextê têr û turan amo, hêlûna xo amade kenê,
Qûlingancî verba zozanan, ref do gire, berz firdanê.

Zozanî têr û tûranrê, meskenê azadîyeyê,
Dengbêjo nemir, Evdalê Zeynike jî çîniyoke,
Serê qûlingî sitrana xo vacone, tey qalkerone,
Ti dengbêjêde nemir, dostê bêkesan bîya.

Feqîyê têyrane jî, zonê têr ûtûran zanitêne,
Tey sewalan hevalbî, kêf weşbî, dîyalogdebî,
Derdê înanrê bîyêne derman, bîyêne rêber,
Kanê ne Evdalê Zeynike, ne Feqîyê têran mendo.

Axîné mordemî, nêrêne şûne,
Mordem xemgîn beno, derd giran beno,
Kes axînanê bêkesanra, pers nêkeronese
Mordemo bêkes, ebe axînanê xo, ebe ofinanê xo mireno.

Welatê xerîbîyede, kes tora pers nêkeno,
Kam çizano, axû hesretê zerê to çiyê,
Herçiyêke bizanê jî, eycî dûrî remenê,
Coka ez vana, zere mi vêşeno.

Ez derdan vera, roj be roj helîna,
Birîndara, birin kura, bê hedûra,
Hedûr mide nêmendo, bê tebata,
Coka ez vana, zere mi vêşeno.

EZ HESRETÊ ŞIMAWO

Çimê mi, raya şimara lêl bîyê,
Qayt kena nêkena, ez şima nêvîna,
Sebeno ma birayê jûbînîme, wayê jubînîme,
Mira dûrî meremêne, nêzdî bêrêne.

Ma jû kanîra, awe yaşimîta,
Verê jû adirîra, ciya bîme,
Verde dûyê ma jû locinera, darîyêne we,
Ez honday ax û hesretê, şimawa.

Ê mi ne maye weşa, ne pîyê mi weşo,
Na bindestîyede, teyna menda, bêkes menda,
Bivêşone bindestîye, ez çîqa ax û hesretê şimawa,
Axir ma defe jûbînî bidîyêne xerîbîyede, sebeno.

Bivêşone Osmanîye, welatra çîqa dûrîya,
Zê raya hat û natîya, kes nêno, nêşono,
Çîqa hevala mi, lac, kêna, veyve û Sîtar Alî ênêse,
Oncînacî çime mi, raya biran û wayanê mirawa.

Biratîye, waytîye zora zaf zora,
Îlam jî xerîbîyede, Osmanîyede zora,
Xêrce çar dêsan, ti cayê nêvîna
Coka ez honday, ax û hesretê şimawa.

Ez teyna wayan û biranê xora lome kena,
Wakû din, lomê mi kesîrê çiniyo,
Mordem ebe jûbînî kêf weş beno,
Ax û hesreta zere mi, vînîtena şimawa.

Sebeno vengê mi, axîna zerê mi, bizanêne,
Qey şima honday ez teyna verda,
Biratîye û waytîye zora, îlam jî xerîbîyede,
Ez birîndarê şimawa, ax û hesretê şimawa.

22.04.2015

XO MEPESÊNÊNE

Xo kolananê welatîde mepesênêne,
Na alema ke esta, ebe dem û dewrana,
Zafîne, zê şîma xo zaf tada, kanê,
No dem û dewran şîmarê jî nêmaneno.

Honday feqîr û fiqaran, koç kerdo,
Metropolande vêşan, têşan, bê wair mendê,
Serê axa xo vile çewtê, ax kenê, of kenê,
Şîma verê jarîya nî mazlûmanra, mirdî nêwenê,

Dayîkê nî mazlûman, vile çewtê, bîrîndarê,
Bê kesanê xorê, jaranê xorê berbenê,
Şîma ebe nî rewşî, teyna xo xapnenê,
Verê jarîya mazlûmanra, şîma mirdî nêwenê.

Kanê hûqiqê şîma, mafê mordemanê şîma,
Kanê şîma vatêne, na welate, herkes birayê jubînîyo,
Çendek û çend serîyo, şîma şarê ma xapnenê
Hîn beso şîmarê, şarê mazlûmî mexapnêne.

Şîma ebe pesnanê xo, şarê ma xapnenê,
Şîma pê dek û dolabanê xo, şarê ma xapnenê,
Endî kesbe, vatenanê şîma bawar nîyo,
Hîn beso, mabe vatenanê xo mexapnêne.

25.04.2015

HAWARO

Deşt û zozananê welatîde hawaro,
Vengê berbîşê domanan, berbîşê dayîkan êno,
Qîre qîra pîran û kalan, hawara daîkan êna,
Rewşê welatîrê, kiştêna xort û kênanrê berbenê.

Xort û kênan sere koan, çila fîsta ta,
Na çila azadîye, çila xoserîye wa,
Zulûmkarî, çila xoserîyera tersenê,
Xof kene, vanê dewranê ma qedîno.

Xort û kênan, dest do jûbînî, veng dane,
Şarê mayê bin destîra vanê, metersêne,
Ma alîkarê şîmayme, ser bilind vindêne,
Ma pîya azadbime, pîya serbilindbime.

Serê koanê welatî, mij û dûmano,
Vengê şerwananê, azadîye êno,
Vanê daîkanê şehîdanrê, silamê ma vacêne,
Ma şerwanê azadîye, şêr û egîtê şîmayme.

Koyê welatî silam dane, şerwananê azadîye,
Vanê şîma şêr û egîtê, şarê bin destîyê,
Xwezil şîma her şewe bibîyêne, meymanê ma,
Ma ax û hesretê şîmayme, dorgerînê şîmayme.

Ey bêbextêne, şîmarêcî nêmaneno,
No zûlmê şîmarê beso, gonîwerêne,
Şîma gonîbe gonî pakenê, zûlûmkarêne,
No zor û zebt, şîmarê jî nêmaneno.

30.04.2015

BEYBÛNÊ ÇOLE

Şima zozanan de, reng be rengê,
Her reng, serê koka, xo kewebîyo,
Tayê vile çewtê, ti vana berbenê,
Meberbêne şima, şoretê zozananê.

Usaro zozanande, kela kela beybûnana,
Rengê şima, baya şima, çîqa weşa,
Mordem, radî kenoke, şima temaşekerone,
Şima dewlemendîya zozanan, şoretê welatê mayê.

Mêşê hemgênî, beybûnanê çolera heskenê,
Beybûnê çöle jî, dewlemendîya zozananê,
Gûlê ma, mêşanê hemgênîrê azadê,
Şima şoretê zozanan, roşnaha çîmanê mayê.

Rengê beybûnan, ewro zaf zeledalo,
Vizêrî varayîş varabî, eyam serdbî,
Ewro varan çînîyo, ti radî kenake temaşekerê,
Kifşo, rengê beybûnan ewro, zaf zindîyo.

Sewalê çöle jî, beybûnanra heskenê,
Zozanande, cîranê jûbinîyê, hewcê jûbinîyê,
Beybûnê çöle, şoretê mayê, dewlemeñdîy welatîyê,
Şima bê kes nîyê, şoretê welatê mayê.

Kanê a roje, şima tevlê ma azad biyêne,
Ma zozan be zozan, pîya bigêrêne,
Ma jariya xo, bê kesîya xo, parekerdêne,
No şaro ser bilind, şimara heskeno, şima bêkes nîyê.

Şima xêr amê, beybûnê çöle, xêr amê,
Wextê şima amo, zozanî meskene şimayê,
Xwezil ma, zonê jûbinî bizanitêne,
Jîyana xo, bêkesîya xo, jûbinîde parekerdêne.

02.05.2015

WILE KE TI RINDÊK A

Welato rengên, ti mirê çîqa rendeke,
Çîqa rindeka, honday jî mirê şîrîna,
Welatê şarî, nêbeno welatê mordemî,
Ti mirê çîqa şîrîna, welato rengên,

Ez hewnê xode, welatî vînena,
Zozananê welatîra, jûbe jû gêrena,
Koyê to berzê, honikê, awê to serdinê,
Ti meymananê xorê, şerwananê azadiyerê sitara

Daristanê toyê xemelyayî, mordemîde hûnê,
Çendek û çend serîyo, şerwanê azadiye meymanê toyê,
Cîranê şerwananê azadiye, sewalê çoleyê,
Şerwanê azadiye jî vanê, zozan û koyê welatî, marê sitara.

Welato rengên, zozanê to, tîde xemelyayê,
Tey hoka hoka şûynan û bizêbanana êna,
Xemlê bêrîvanan jî zê to, reg be rengo,
O xemlê bêrîvanan, mordemî mest keno.

Beybûnê to, tarê to, nêweşanrê dermano,
Kofkarikê toyê kinkorî, çîqa weşê,
Her çiyê zozanan, zê dermanê Hekîmê Loqmano,
Hekîmê Loqman, dermanê xo, beybûnanê çolera viraştêne.

Mi vatêne ez emser, zozananê welatîra bigêrêne,
Kanê a roja azade bêrone, ma zozananê xora jube ju bigêrime,
Axa welatê mi, her tim zerê midera, welat mi vîrera nêsono,
Ti mirê qedîma, ti mirê şîrina, ti mirê sitara, welato rengên.

Ey welato serbilind, axîna daîkanê şehîdan,
Bêbextan, neyaran, faşîstan, sitar meke,
No wlato qedîm, meskenê şêr û egîtano,
Ti hesreta mawa, axîna mawa, welatê roje.

03.05.2015

ROŞTÎ

Mirê roştî tafiyêne,
Ez dormê xo, nêvîna,
Mirê tewer tariyo, ez nêvîna,
Roştî mire, zede mevîne.

Ma jûbinî rind, zelal, bivînime,
Ez şimara, roştîya azadiye wazena,
Ma şertê aştiyede, jûbinî bivînime,
Marê roştî, zêde mevîne.

Bêbextî kenêke roştîya ma bişaynêne,
Nî neyarî, kenêke, ma tarîde verdêne,
Marê jî roştî, marê jî, jîyanêde azade,
De bêrêne ma, qadê biratiyede, pîya roştî tafime.

Ma na roştîya azadiye, pêrkoyê şaranrê wazenîme,
Jîyanêde azade, pêrkoyê renganrê, zonanarê wazenîme,
Zonê xo, rengê xorê, teyna azadiye mewazêne,
Ma pîya rindekbîme, pîya serfirazbime, pîya azadbime.

Şima zonê ma, qedexe kerdo, vanê ju zon,
Şima nasnamê ma qedexe kerdo, vanê jû nasname,
Şima welatê ma asîmîle kerdo, vanê yo welat,
Marê jî zon, marê jî nasname, ma pîya rindekîme, pîya azadîme.

Kes azadiye marê tometa mekerona,
Bira kes zonê ma, marê tomet mekerone,
Zonê ma, şitê dadîya mawo, mara tomet mekerêne,
Şitê dadîya mordemî çîqa helalo, zonê dadîye ma jî, hondayê
helalo.

09.05.2015

BIRA TEKÎN

Birawo ser bilind,
Ez to hewnê xo de vînena,
Ked û emexe to, ma rê zaf bî,
Na hewnde ma welate, Zerkanday me,

To oncîna henî hêrsa marê,
Meqariye bira meqariye, ma birayme,
Kanê koma ma biran û wayan bîyamêne jû ca,
Ma serê jû adirîra, bîme cîya, ma birayme, wayme.

Ax û hesretê mi vînîtena biran û wayana,
Na bindestîyede xem û xîyalê mi vînîtena şimawa,
Kanê a roje ke, bira şimara jû bîyamêne,
Na bindestîye de, hîna kesî mira pers nêkerdo,

Tibiyêne, nika ti des defî amêbî,
Bira kes xorê malê dinya, şirîn mevînone,
Mal û milk, araqê çarê mordemî yo,
De vace bira, nî qey mira waîr nêvecîyay.

Ti birayê de ser bilindbîya,
Na dimera ma kes, torê alîkar nebime,
Ez henî ax û hesreta ke ti bê kes menda,
Mara heqê xo helal ke, bira Tekîn.

To caran bêbextîye, niheqîye qewil nêkerdêne,
Ti her wext vîra midera, to şêr û egîtê kê xobîya,
Kedê to, verê ma birande zafbî, bira Tekîn,
Heqê xo mara helal ke, birawo ser bilind.

Ma timîcî qedrû qîmetê to zanitêne,
Ti biranê xorê, wayanê xorê, pîbîya, birabîya,
Ez na bindestîyede, timî xem û xîyalê todera,
Mara heqê xo helalke birawo, ser bilind.

18.05.2015

AX KOBANÊ

Ti serbilindê welatan, axa Kûrdana,
Ti dermanê birîndaran, nasnamê mawa,
Ti meskenê şêr û egîtan, azadiya mawa,
Ti axa mawa, zonê mawa, roşnaha mawa.

Kobanî de, şerwanan çila, azadiye fista ta,
Heval Arîn Mîrkan veng dano, mevindêne, alîkarbêne,
Ewro roja serbilindiye, roja azadiye wa, mevindêne,
Bêbextiye, mixenetîya, xûrt vindêne, alkarbêne.

Azadiya Kobanî, azadiya gelanê bindestana,
Azadiya zonê mawa, nasnamê gelanê bindestana,
Ewro roja vinetene nîya, xêret bikerêne, xûrt vindêne,
Na ser bilindiye, ê ma pêrkoyê şarana.

Ewro vengê Gelhat hevalî bilind êno,
Vano ewro roja biratiye, roja mêrxasiye wa,
Nî qetlîamê qetil xûran, rind bivînêne,
Ax Kobanê ax, ti axa mawa, ti zonê mawa.

Fîrsend medêne, nî qetil xûran,
Ker mevindêne, bivînêne, biheşnêne,
Bira ser bilindiya şima, pêrkoyê aleme bizanone,
Nî ketil xûrî mûsê, gonîbe gonî paqij kene.

Ewro serê Kobanê mij û dûmano,
Vengê şerwananê azadiye, bilind êno,
Xort û kênan, şer kerdo giran, hawariya dayîkan,
Vanê nî qetil xûrî mûsê, gonîbe gonî pakenê.

Çar hawarê Kobanê de şer girano, himnî û gimnîya topana,
Lornayîşê dayîkan, berbîşê domanan, mordemî helêno,
Bira sistemo qirêj naye rind bizanone, miradê înan çime înan de
maneno,
Ey bêbextêne, sistemo qirêj, Kobanî vindî nêkerd, şima vindî
kerd.

27.05.2015

ŞİMA XEYRE AMEYE

Ez melül melül qayt kena, nêvîna,
Roşnahê mi dûrî nêvînenê, lêl kene,
Henî qayîla ke, cayêde bilind de qaytkerêne,
Qaytê zozananê welatî, waranê welatîkerêne.

Mordem, ebe çîmanê xo zozanan, waran bivînone,
Ebe goşanê xo, biheşnone ke bawarîya xo bîyarone,
Mi şîmara vato, ez dûrî nêvîna, çîme mi lêlkenê,
Ez be çîmanê xo, heyanûke nêvîne, bawarîya mi çînîya.

Kanê rêveberê ma, ronak bîrê ma, rû sipîyê ma,
Kanê xortê ma, kênê ma, veyvêma, kal û pîrê ma,
Kanê qomê ma, cîranê ma, dewê ma, warê ma,
Her ca melül keno, koy, deşti, cem û kanî zaf xemgînê.

Ez henî melül melül, qaytê şîma kena,
Şîma nasnêkena, şîma kame, çara ênê,
Majî na welatê qedîmîrayme, şervanê azadîyey me,
Şîma xêr amê, şervanê azadîye, çîmê ma raya şîmara şî.

Çîme ma ebe şîma yabenê, ma bêwayîr meverdêne,
Ma ax û hesretê şervananê azadîyey me,
Girêdayê xeta şîmay me, şîma roşnahê mayê,
Defêna şîma xêr amê, ser bilindê şarê qedîmî.

Xêlî wexto ke, ma bê cîran, bê heval, bê omîd mendîme,
Zozanê welatî jî, ax û hesretê şîmayê, serê şîma vile çewtê,
Çîqa zozanî ax û hesretê şîmayê, ma des qat, ax û hesretîme,
Ma jî, sewalê çöle jî, çem û kanîyê zozanan jî, vanê şîma xêr amê

11.06.2015

DE BÎRÊNE

Ma na gilê koyra, teyna meverdêne,
De bîrêne, çimê ma, amayîşê şimarawo,
Verde dewê ma zê bacarbî, cîranî pêrko nacabî,
Nika dewanê made têr qû nêkeno, cîran nêmando.

Dima heştayra kes nêmando, cîranî zaf dûrî şîyê,
Şarê ma koç kerdo, tamam koçber biyê,
Oncîna amnanî gegene, tayê cîranê ma ênê,
Wextê amayîşî û şîyayîş de, ebe keke girî ma vila biyêne.

No welato qedîm, welatê bav û kalanê mawo,
Pîlanê ma vatêne, pê vatenanê nî sistemê qilêrî, qan mebêne,
Kesrê bav û kalanê ma xo vîrera mekerêne, zûlmêde pîl dîyo,
Ebe meymantîye nê, welatê qedîmî, bê kes, bê cîran meverdêne.

No welato qedîm, welatê serbilindano, welatparêzano,
Welatê ma, marê zê axîna dayîka ma şîrîno,
Mordem welatê xode azado, serbilindo, rû germo,
Welat serê şima vile çewto, meberbêne ser bilind vindêne.

Meymanê welatê roje zafê, amê zozananê xora gêrenê,
No welato qedîm, axîna mawo, roşnaha mawo,
Dûrî mevindêne, nêzdî bîrêne, ma pîya kêf weşbime,
Ma zûlimkaran nas kenîme, pê nî zûlimkaran qan mebêne.

14.06.2015

ÇEWLÎGÊ RA SILAMÊ MI VAJÎNE

Ey bacarê şêr û egîtan,
Ti hewnê midera, xem û xiyalê midera,
Ez honday ax û hesretê towa,
Çewlîgê rengênîra, silamê mi vajîne.

Ti kanîyê bizêbanana,
Ti zozanê koçerana,
Ti ax û hesretê bêrîvanana,
Çewlîgê rengênî ra silamê mi vajîne.

Koyê to sitara şervananê,
Çem û kanîyê to, meskene şêr û egîtanê,
Gûl û sosinê to, dermanê hemû derdanê,
Çewlîgê rengênîra, silamê mi vajîne.

Ey zozanê şervdînî, çavreşîye,
Qertalix û şewtîyan û zoravan,
Ez na bindestîyede honday, ax û hesretê şimawa,
Zozananê çewlîgê rengênîra, silamê mi vajîne.

Çavreşîyede vengê bûlira şûyanan êno,
Zoravan de vengê lornayîşê, bêrîvanan êno,
Şerevdîn de, vengê serbilindî ya şêr û egîtan êno,
Şêr û egîtanê welatîra, silamê mi vajîne.

Ez na xerîbîyede, bê heval menda,
Fermanê ma veto, bê taqat menda,
Welatra dûrîkewta, bê hevî menda,
Çewlîgê rengênîra, silamê mi vajîne.

Ey bacarê şêr û egîtan,
Bêbextanrê, qetil xûranrê, alîkar mebe,
Birîndaranê xorê, kal û pîranê xorê alîkar be,
Şêr û egîtanê zozananra, silamê mi vajîne.

Hîndayê şêr û egîtê to şehîd kewtî,
Sawa axa xo, zonê xo, nasnamê xo,
Nî qetil xûrî, zê vergê harîyê, nêvîndenê,
Vengê nî qetil xûran, gonî weran bidene vînetene.

Defe hetê dara hêne û bogilanîde şorêne,
Ti vana sere nî hûrdmîne navçan, wele vîta ro,
Sebiyo şîmarê, bê xêret mevîndêne, xûrt vîndêne,
Dara Hêne û Bogilanîrê jî, silamê mi vajîne.

Koyê aze û mergemîre jî, vengê jûbînî danê,
De ravazêne, ewro roja vînetene nîya,
Koyê şîma qedîmê, meskenê şervananê rojeyê,
Koyê aze û mergemîrera jî, silamê mi vajîne.

Usaro koyê Karêrî jî reng be reng xemelyayê,
Warê girboxî meskene heval Qarasûngûrîyo,
Warê deşte û kalmemî, sertafê waranê,
Waranê Lolan û delavê Qerecenemîra, silamê mi vajîne.

De vacêne warê gelîye, warê Hemed xanî,
Şîma heyanû roja ewroy, çî dîyo çî nêdîyo vacêne,
Şîma şahadê şêr û egîtanê, welatê rojeyê,
Şêr û egîtanê welatê rojera, silamê mi vajîne.

Şîma qey bê vengê, warê koy, warê xeyme,
Şîma jî xêlî şêr û egîtê welatî nas kerdî,
De vacêne, şervananê azadîyera qal bikerêne,
Silamê mi pêrkoyê serbilîndanra, şervananê azadîyera vajîne.

20.06.2015

EZ KÊF WEŞA

Usar amo welatê ma, têde waneno,
Welat zê veyvika dest henîye, reng be reng,
Deşt û zozanî, çem û kanî têde hûnê, kêfweşê,
Keyfweşîya mi, welatparêzî û serbilindîya şarê mawo.

Şima mirê çîqa zindîyê, çîqa rindekê, serbilindê,
Şoretê şima, xo do welat, paqijîya şimara welat roştîyo,
Verxodayana şimade, welat azado, serbilindo,
Keyf weşîya mi, serbilindîya şimawa, azadbîna şimawa.

Kûlîlkê dormê deran, gûl û sosinê verocan,
Perene rûyê mordemî, ti vana şewle danê,
Hetêde vengê qaz û qûlingan ê kewan êno,
Ti vana vengê orkestrawo, ti radî kena ke goşdarbê.

Pîlanê ma vatêne, her çî wetê xode weşo, rindeko,
Zozanê welatê majî, demsera ûsarîde, têde wanenê,
Zê şalîn û bilbilo, mordem radî kenoke, zozanan de bigêrone,
Wlatê ma zê kanîyê zernano, serbilind vindêne, wayîr vecîyêne.

De bê bira bê, heval bê, wayê bê, birîndarê mi bê,
Ma zozananê xora, dewanê mara, pîya bigêrime,
Şarê ma jaro, bê kes mendo, derd girano,
Bêrêne ma nî şarê xoyê derd giranîrê, alîkarbime.

No şaro mazlum, alîkarîye wazeno,
Çimê şarê ma, alîkarîya şimarawo,
Vanê ma teyna meverdêne, mara wayîr vecîyêne,
Bêrêne ma şarê mazlûmî, bê wayîr meverdime.

Zozanan de, vengê bûlûra şûyanan êno,
Ti vana ke, no bûlîrwan çîqa derd girano,
Vengê bûlîre, mordemî helêneno, tar keno,
Keyfweşîya mi, azadiye û serfirazîya welatê rojewa.

01.07.2015

VENGÊ MA BIHEŞNENE

Qey şima vengê ma, nêheşnene,
Vengê ma mazlûman, bê kesan biheşnêne,
Zûlmê nî zûlimkaran, bivînêne, biheşnêne,
Mazlûmanrê, bêkesanrê, alîkar bene.

Şima qetlîamê şengalî, maxmûrî,
Ê Kobanê û Rojava nêvînenê,
Nî qetil xuran, honday şaro mazlum, qetil kerdî,
Nî zulum karê, qetil xûrê, gonî werê, bizanêne.

Ser bilindîya, Şengal û, Maxmûrî pêrkoyê, aleme heşno,
Ser bilindîya Kobanê rê, pêrkoyê gelan zaf kêf weşê,
Şima jî mevîndêne, nî welatparêzanrê alîkarbêne,
Nî gonî weran, qetil xûranra vacêne hîn beso.

Nî qetil xûrî, cenî, doman, kal û pîran nêpersenê,
Erzû eyalê şarê Kûrdî, benê, pê peran roşenê,
Nî newede kenêke, xorê koletîye rast kerene,
No şaro qedîm, ser bilindo, vatenanê nînan qewîl nêkeno.

Vengê nî şarê qedîmî, biheşnêne, alîkarbêne,
Jarîya nî şarê mazlûmî, vatenanê şarê qedîmîrê alîkarbêne,
Jarîya nî şarê mazlûmîrê, dar û kemer helîno,
Nî gonîwerî, qetil xûrî, însanetîyera dûriyê.

Mekerêne, vengê xo berzkerêne, xurt vindêne,
Bira no dem û dewran nî gonî weranrê nêmanone,
Biratiye û welatparêzîye, alîkarîyede bena,
Ma destê xo, bideme destê jubînî, vacime hîn beso.

Kûçanê Kobanê de, vengê azadîya şervanan êno,
Zerê ma, şima şervananê azadîyerê helîno,
Dayîkê şehîdan, şimarê berbenê, tar bene,
Bêrêne ma, pîya nî gonîweranra, vacime beso.

Kobenê bacarê şêr û egîtano, mêrxasan û serbilindano,
Helal bone şimarê, şêr û egîtanê welatparêzan rê,
Şima rûhê mayê, serbilindê mayê, roşnaha mayê,
Nî vengê ma şarê qedîmî, biheşnêne, alikarbêne, hîn beso.

05.07.2015

TI HEWNÊ MIDERA

Cîrano delal, mordemo hêca,
Ti xerîbîyede, timî hewnê midera,
Ez hewnê xode, timî to vînena,
Ti cîranêde delal, mordemê de soxîna.

Ti sîndordaşê ma, cîranêde ser bilind bîya,
Şima wextê xode, qedrû, qîmetê jûbînî zanîtene,
Xwezil bira cîrananê nikay jî, zê şima, jûbînîra heskerdêne,
Ez vana, xwezilbe cîrantîya şima, hevaltîya şima.

Pêrkoyê cîranan, tora heskerdêne,
To xo da warê deşte, zozanê koçerano,
De xorê mirdî qaytê, rêbî û ricelan ke,
Xwezilbe cîrantîya şima, hevaltîya şima.

Ti Mistafayê Mexsan cîrano hêcabîya,
Caran xelef, fekê tora nêvecîyêne,
To ebe çime xirabîya, qaytê cîranan nêkerdêne,
A rindîya to, hewnê şewan de jî, vîra midera.

Cîranê toyê dewa Darebîye jî xemgînê,
Vanê Mistefayê Mexsan, cîranêde ked helal bî,
Oxûrbone torê, cîrano qedîm, mordemo soxîn,
Ez oncînacî vana, xwezilbe cîrantîya şima.

10.07.2015

HÎN BESO

Gonîwerêne, şîma mara çî wazenê,
Sebîyo, kame bîya, însaf bikerêne,
Gonîwerêne, qetil xûrêne sekenê,
Pê ma kaymekerêne, şerm bikerêne.

Kanê marê jî demoqrasî,
Kanê ma birayê jubînîbîme,
Kanê zonê marê, nasnamê marê azadiye,
Hîn beso, pê nî şarê qedîmî, kay mekerêne.

Marê jî, zonê dayîke marê jî, azadiye,
Marê jî, nasname û dibistan û hûqiq,
Şîm na welate, teyna xo vînenê,
Teyna xo vînitene, azadiye nîya, şîmarê jî beso.

Şîma heyanû roja ewroy, ebe vatenanê xo, ma qankerdîme,
Şîma kenêke, defêna ma qan bikerêne, beso beso,
Ma pê dek û dolabanê şîma, qan nêbenîme,
Hîn beso, ma Kûrdê verî nîme, ma biratîye û aşitîye wazenîme.

Henî berz qaytê şarê ma mekerêne,
O cawo berzra şîma ke ginay wara, kes şîma berz nêkeno,
Ma hezar serawa ke, jîyana xo, pîya derbaz kerda,
Hîn şîmarê beso, qadê aşitîye û biratîyede, ma pîyaybi me.

Welatparêzê Tirkan, Ereban, Çerkezan, Lazan birayê mayê,
Ermenî û şaro xiristîyan jî, na welate kam eto se, ma birayme,
Qadê biratîye zê şîma nîyo, her çî gere pîya zê jûbînî parebone
Şîma teyna xo naskenê, xo vînenê, şîmarê jî beso.

12.07.2015

MÊYMANÊ MI AMÊ

Şima xeyre ameye, mêmânê mi,
Panc aşmîyo ke, çimê mi, raya şimara şî,
Biratîye û waytîye, zê şima nîya, şima ez teyna verda,
Şima xêr amê, oncînacî şima meymanê minê, sarû çimê minê.

Qey şima, hîndayê dereng kewtî,
Mi şimara şewqet waştêne, biratîye waştêne,
Şima ez tena verda, bêwayîr verda,
Biratîye şîrîna, destê mordemî nêkûna.

Ma jar bîme, bê maye, pîl bîme,
Ma jûbînîra hes kerdêne, wayîr vecîyêne,
Heyanû roja ewroy, şima mira pers nêkerd,
Biratîye şîrîna destê mordemî nêkûna.

Ma serê jû adirîra cîya bîme,
Ma jû kanîra awe, jû şifrede wer werdo,
Çiqa weşebîye biratîya, î wextî, rindekebîye,
Biratîye mirê çiqa şîrîna, honday jî rindeka.

Qey bira qey, şima ez teyna verda,
Ezbiyêne, nika ez des defî, sawa şima amêbî,
Ez wayanra jî, tew lom nêkena, way şewqetê,
Biratîye şîrîna, destê mordemî nêkûna.

Şima ewro roj, hergû jû welatêra amê,
Şima ewro, ez kêf weş kerda, serbilind kerda,
Çiqa dereng amê jî, oncîna ma wayme, birayme,
Biratîye şîrîna, destê mordemî nêkûna.

Şima ewro roj, meymanê minê, şima xêr amê,
Şima sebrê minê, taqatê minê, roşnaha minê,
Xerîbîye zora, jariye, bêkesîye zora, zaf zora,
Biratîye rindeka, şîrîna, destê mordemî nêkûna.

16.07.2015

PIRSÛS(SÛRIC) BERBENO

Bêbextêne, telaqreşêne,
Kanê, ma birayê jûbinîbime,
Şima hîrîs û hîrê canî, qetil kerdî,
Hîrîs û hîrê, gorgeçînê aşitiye, qetil kerdî.

Ewro, deşta Pirsûsî xemgîna,
Mêmanan xo rê berbena,
Şarê Pirsûsî xemgîno, derd girano,
Pirsûs, hîrîs û hîrê cananrê berbena.

Nî cîwananê serbilindanrê,
Pêrkoyê Pirsûsî berbena, xemgîno,
Vanê nî xort û kênê ma, welatparêzîbî,
Şima se qemişê, nî xortû kênanê dest henan bî.

Na telaqreşîye, bêbextîye, şimarê jî nêmanena,
Şima mûşê, timî gonîbe gonî pakenê, bêbextêne,
Mexsed û miradê nî xort û kênan, biratîyebîye, alîkarîyebîye,
Şima senî, qemişê nî xort û kênanê, dest henan bî.

Ewro têr û tûranê deşta Pirsûsî, weng kerdo berz,
Berbenê, qajnenê, vanê hey wax, hezar defa hey wax,
Nî gorgeçînê aşitiyebî, şima senî, qemişê, nî gorgeçinan bî,
Alîkarbêne, alîkarê nî şehîdanê aşitiyebêne, mevîndêne.

Serê deşta Pirsûsî, mij û dûmano, çimî çiman nêvînenê,
Ti vana hewrî zibenê, berbenê, bûrîskî jî tède jenenê,
Şervananê Kobanê veng kerdo berz, veng dane
Vanê şehîdanê azadiyera, wayîr vevîyêne, alîkarbêne.

Pêrkoyê bacarê Pirsûsî, ewro şehîdanê biratîyerê berbenê,
Vanê mevîndêne, lerezekerêne, şehîdanê biratîyera wayîr
vecîyêne,
Nî gorgeçînê aşitiye û biratîyeyêbî, mevîndêne, bêxêret me-
manêne,
De vacêne nî qetil xûrî, nî gonîwerî senê vanê ke, ma îsanîme

Pirsûs, xemgîno, kelegîriyo, berbeno şehîdanê xorê,
Vanê nî gorgeçînê aşitiye, ê azadiye û ê biratiyebî,
Qetil xûrêne, şîma gorgeçînanê azadiyera çi waşt,
Alîkarbêne, şehîdanê xora, gorgeçînanê azadiyera wayîr
veciyêne.

De bilorne dayê, şehîdanê marê, biratiya nî xort û kênanrê
bilorne,
Nî xort û kênanê dest henanrê bilorne, birîndaranê şarê marê
bilorne,
Nî xort û kêne azebê dest henî, serbilindê mayê, roşnaha mayê,
Alîkarbêne, şehîdanê xora, gorgeçînanê azadiyera wayîr
veciyêne.

Têr û tûricî ewro, bê mecalê, qişnenê, kelegiriyê, berbenê,
Dar û berê çöle, çem û kanîyê welatî jî amê zon, berbenê,
Xemgînê, kelegiriyê vanê, nî qetil xûrî senî qemîşê şîma bî,
Alîkarbêne, şehîdanê xora, gorgeçînanê azadiyera wayîr
veciyêne.

De vacêne, bêbextêne, qetil xûrêne, şîma nî xort û kênanra çi
waşt,
Nî xort û kêni, qasidê aşitiye û ê biratiyebî, qetil xûrêne,
Şîma naye rind bizanêne ke, no text û tac, şîmarê jî nêmaneno,
Alîkarbêne, şehîdanê xora, gorgeçînanê azadiyera wayîr
veciyêne.

De bêrêne, ma na gonî, pîya bidime vinetene, kes memirone,
Beso, bira dayîkê ma meberbêne, domanî sey memanêne,
Bira dewê ma, daristanê ma, meyêrêne vêşnayene, koçber me-
bêne,
Alîkarbêne, şehîdanê xora, gorgeçînanê azadiyera wayîr
veciyêne.

Ey şarê mawo welatparêz, birîndar û derd giran,
Şîma dek û dolabanê nî sistemê qilêrî vînenê,
Nî dek û dolabanê sistemê qilêrî, ma pîya serastkime,
Alîkarbêne, şehîdanê xora, gorgeçînanê azadiyera wayîr veciyê
ne.

27.07.2015

XERÎBÊ WELATAN

Ti xeyre ameye xerîbê welatan,
Zaf dereng kewta, xeyre ameye,
Hîndayê çimê ma, raya tora şî,
Ti xerîbê welatana, hevalê şervanana,

Xerîbê ma şonê xerîbîye, nê nê,
De bêrêne, ma bê cîran meverdêne,
Çime nî kokiman, raya şimarawo,
Yagêrêne welatê xo, welat bê cîran meverdêne.

Xerîbê welatan, ez zana şima, birîndarê welatê xoyê,
Şima ax kenê, of kenê, nêşkî nê bêrêne welat roje,
Oncîna alîkarbêne, bîzanêne, bivînêne, welat bê cîrano,
No welato qedîm, axa mawa, şuna bav û kalê mawa.

Ez ebe dil û can, axa welatê xowa, hevalanê xowa,
Xerîbê ma, pêrko zê ma ax kenê, nêşkî nê yagêrêne,
Welatê roje birîndaro, naleno, sawa xerîbanê xo,
Ma naye rind zanenîme, azadîya ma, azadîya welatê mawa.

Ma vanîme, xwezil bira xerîbê welatê ma, bîyamêne,
Çimê mi qayt kerdenera, lêl kenê, ez dûrî nêvînena,
Ez kal biya, çimê mi lêl kenê, qayt kerêne jî nêvînena,
Axîna mi, ez defêna xerîbanê welatê xo, bivînêne.

Awê çem û kanîyanê welatê ma, zê verî hêrîkî nê,
Xort û kênê ma, xo zê verî xemelnênê, ser bilîndê,
Aşme welatê made, zê verî roştî dana, tîce, zê verî tanî dana,
Xem û xeyalê ma, vînîtena xerîbanê mawa, de bêrêne.

Kal û pîrê ma, xerîbanê xorê, şehîdanê xorê lornênê,
Welat serê xerîban, vile çewto, bê kesîya xorê,
Vanê ma honday ax û hesretê, xerîbanê xoyme,
Mexsed û miradê ma, ma defêna xerîbê xo, bidîyêne.

08.08.2015

ADIR VARENO

Serê welatê roje, zê torge, adir vareno,
No xezebê de zaf pîlo, bêderman o,
Dermanê nî xezebî, biratîya, aşitîya,
Şima fermanê ma veto, şimarê jî nêmaneno.

Serê zozanan, waran, deştanê ma, adir vareno,
Nî kemî fersendê, bêbextê, pê nînan, qan mebêne,
Serê bacaran, navçan, bacarokan, dewan adir vareno,
No adirê gonî werano, nînan, fermanê ma veto.

Mordem qaytê nî êstiranê dayîkan keno, şerm keno,
Nînanê şerm çinîyo, fedî kerdene çinîya, nî kêf kenê,
No adir gineno kotîra, îca vêşneno, tar keno, kişeno,
No adirê neyaran, serê pêrkoyê welatî vêşeno.

Ewro kolananê Gimgimî de vengê şervananê azadiye êno,
Ferqîn, Lîce, Silopî, Cîzre de, adirê neyaran vareno,
Nî, raste rast, serê ma adir varnenê, kam verkûyone kişenê, No
adirê neyaran, serê pêrkoyê welatî vareno, mordemî vêşneno.

No adirê neyaran, ê gonî werano, serê welatê ma vareno,
Cûdatîya nînan û qetil xûranê binan çinîya, nî zê jûbinîyê,
No adir gineno kotîra aca vêşneno, piro temaşe mekerêne,
Bêrêne ma nî adirê neyaran, pîya bişaynime, bira kes memirêne.

No welat cûnê şêr û egîtano, ê bêbextan û neyaran nîyo,
Bêrêne macî tey şervananê azadiye, vengê xo berzkime,
Lerze kerene, dereng memanêne, marê jî biratîye û azadiye
vacime,
Ma nî adirê bêbextan, pîya bidime şayneyene, bira kes memi-
rone.

Gimgim vêşeno, kolananê Gimgimî ra dû darîno we,
Serê Gimgimî ra, hewrî amê ra, ti vana torge varena,
Sekenê, harbenê, kame bîya, şima nî şarê mara çi wazenê,
Lerze bikerêne, ma nî adirê qetil xûran, pîya bidime vinetene.

Ferqîn de, himnî û gimnîya topana, ti vana axir zemano,
Dîroka Ferqînî zaf kana, meskenê Zembîl Firoş û Sîyapoşîyo,
Ferqîn verdera, meskenê mêrxasan, cûnê şêr û egîtano,
Lerze bikerêne, ma nî adirê qetil xûran, pîya bidime vinetene.

Gewerde gazî û hawarîya dayîkan, berbîşê domanan êno,
Kûçanê Gewerî de, vengê serbilindîya şervananê azadiye êno,
Vanê nî gonîwerê, nî qetil xûrê, nî bêbextê, pirodêne ramever-
dêne,
Lerze bikerêne, ma nî adirê gonîweran, pîya bidime vinetene.

Navça Cîzre bacarê Bedîrxanano, dîroka ma roşnaha mawa,
Cîzre meskenê Memê Alan, Zîna Botan, Meleyê Cîzirî ya,
Cîzre, cûnê mêrxasana, ê Mehmet Tûnç û hevalanê welatparêza-
na,
Lerze bikerêne, ma nî adirê gonîweran, pîya bidime vinetene.

Hela qaytkerêne, serê Cîzre, Silopî, Sûrî adir vareno,
Nî qetil xûran, oncîna xo amade kerdo ke, ma qetilkêrêne,
Ebe nî qetlû qûtalê xojî, xo bipesênêne, marajî vacêne terorîst,
Lerze bikerêne, ma nî adirê gonîweran, pîya bidime vinetene.

No adir, teyna serê ma nêvêşeno, serê pêrkoyê welatî vêşeno,
Ma vengê pêrkoyê welatparêzanê şaran danîme, mevîndêne,
Wextê vinetene nîyo, no adir roj verê kêwerê ma jûyêdero,
De bêrêne, ma lerezekime, nî adirê qetil xûran pîya bişaynime.

29.08.2015

DAYÏKA FIKRÏYA

Sebeno dayika mi ez honday axû hesretê towa,
Şewê bê, na xerîbîyede, bindestîyede, bibe meymanê mi?
Çendek û çend serîyo, mi to nêdîya, ez hesretê dayîka xowa,
Rocê bê, na bindestîyede bibe meymanê mi, ma jubînî bivînîme.

Emşo oncîna ez ebe dil can vengê to dana, de bê, dayîka,
birîndare,
Vengê mi, na bindestîyede biheşne, kedê to vere made zafbî,
Mi na axû hesretede meverde, ti dayîka mina, axîna mina,
Ma domanê to, pêrko jî axû hesretê toyne, çîqa qayîlake to
bivînêne.

Henî jubînîra dûrî kewtîme ke, mi şeklû, şîmalê to, xo vîrera
kerdo,
Sebeno, defe bê meymanê mibe ti çi wazena, kemasîyê ma çiyê,
Ti kedkara mabîya, dayîka mabîya, axîna zerê mabîya,
Mi na xerîbîyede, na ax û hesretede meverde, şewê teyna bê.

Defe sarê xo berzke qayt ke, cîrananra kes nêmendo,
Rastande, zerkan de, cîrananê tora kes nêmendo,
Karêrcîyan zafine barkerdo şiyê, zafêrî koçber bîyê,
Dewa Darebiye û mezranra jî zafine koç kerdo şiyê.

Kanê cîranê toyê qedîmî, bavde kal, kes nêmendo,
Hecî hûsên, Kekê Silî, Mominê Bêze, kê Cafan, kê Naman,
Mistefayê Mexsan, kê Feqîyan, cîrananê bavde kalîra tew kes
nêmendo,
Rastan û Zerkan melûlo, zimmistanî tew kes nêmaneno.

Kanê no honday cîranê mayê delalî, sebî nînanrê, kamta şî,
Ewro roj, Karêrde, dewanê Karêrî de, kes nêmendo,
Sebeno defe na xerîbîyede, bindestîyede, bê meymanê mibe,
Ez honday ax û hesretê towa, mi na ax û hesretede meverde.

To ma jarîyede pîl kerdîme, ti zaf derd giranebîya,
Caran kesî jî derdê tora pers nêkerd, ti ebe bîrîndariye şîya,
Ti ebe axû hesreta zerê xo şîya, dayîka bîrîndare de bê,
De bê ke ma derdanê xo, parekime, axîna mi vînîtena towa.

03.09.2015

RENGÊ PAYÎZÎ

Payîzne, rengê daristanî zaf cûdawo,
Her dare, rengê xode, daristanî xemelnena,
Ti qaytê verocan, zozanan, ziman kena cûdayê,
Her ca reng be rengêro, ti radî kena ke temaşekerêne.

Payîzne ê her dare, rengêde xo esto,
Wextoke ti payîzne, daristanî temaşe kena,
O rengê dar û berî, mordemî mest keno,
Payîzne, her dare, rengê xode pelan rişnena.

Wexto ke dar û ber pelan zer keno, rişneno,
Her dare, rengê xode, pelan reng be reng rişnena,
A wet mordem, radî kenoke qaytê, renga daristanîkerone,
O rengê înano henî weş; pereno rûyê mordemî.

Welate her demsere, weşê mordemî şona,
Demsera payîzî jî, wextê xode, reng be renga,
Şarê ma mûso, zano, xo gorê demseran amade keno,
Her demsere wetê xode weşa, demsera payîzî reng be renga.

Mordem rengê demsera payîzî, wextê xo amê, ti vînena,
Her demsere wextê xode, rindeka, demsera xode dewlemenda,
Rengê demsera payîzî, dewlemendo, reng be rengo, mordemî
mest keno,
Her ca reng be rengo, ti radî kenake temaşekerêne.

Demsera payîzîde, sewalî jî tidarekê demsera zimistanîderê,
Vîrnîya sewalan jî zimistano, îcî tidarekê xoyê zimistanî vînenê,
Gêlî, marî, milawînî, kesî, heşî, têr û tûrî, vanê xêretkerêne,
zimistan êno,
Têr û turan jî, ref do girê koç kenê, verba berûye firdanê.

15.09.2015

NÎ MA RA ÇI WAZENÊ

Nî her mordemî, zê xo bêbext zanenê,
Nî telaq reşê, neyarê, bêbextê, ked heramê,
Mordemî qan kene, zê xo, neyar kene,
Ma welatparêzîme, serbilindîme, rind bizanêne.

Welatparêzîye, pê peran nêna herînayene,
Ser bilindîye nesîbê, her mordemî nêbena,
Nî mira bêbextîye, poşmanbîyane wazenê,
Ma welatparêzîme, ser bilindîme, rind bizanêne.

Nî mira vanê, xo înkâr bike, asimîlebe,
Ma henî to azad bikeme, raverdîme,
No dewran, dêwranê neyaran, ê bêbextano,
Bêbextêne, ebe vatenanê şîma, ez neyar nêbena.

Nî ma neyar zanenê, bêbext zanenê, fam kor zanenê,
De şorêne, xorê cayêde bîn, xele biramêne, xeta ma kifşa,
Ma neyar nîme, bêbext nîme, bê kes nîme, ma welatparêzîme,
Serbilindîme, hevalê şêr û egîtanîme, bindestîye qewîl nêkenîme.

Nî mûsê serê ma, dek û dolabanê xo çarnenê,
Cat kenêke reyêna, ma berêne serê xeta bêbextîye,
Demê Osmanîyan ra, heyanû roja ewroy, xeta nînan nawa,
Xeta ma, kifşa, ma serbilindîme, welatparêzîme, neyar nîme.

Hela defê rind qaytê makerêne, ma rind naskerêne,
Bêbextîye, neyarîye, qilêriye, hetê ma nêna rotene,
Ma biratîye, hevaltîye, welatparêzîye, serbilindîye roşenîme,
Barê ma girano, xeta ma zelala, kes ebe famkorîya xo, ma qan-
mekerone.

20.09.2015

TI KAMÎ PERSENA

Ez kamî perskerêne, kamî persmekerêne,
Ti qaytê dewe kena melûla, kes dewande nêmeno,
Ez kamecî cîranî, hevalî pers kena, dewede kes nêmeno,
Zafine koç kerdo, koçber biyê, metropolanra vila biyê.

Verde dewa Darebiye de kûreçî bî, qilaçî bî,
Çûlagî bî, sûnetçî bî, avşancî bî, terzî bî,
Marangozî bî, berber bî, dewa Darebî ye zê bacarebiye,
Ewro roj dewanê made kes nêmeno, dew melûlê.

Xwezil be cîrananê mayê bavde kalî,
Sed hezar hêfê hevaltîya verî, cîrantîya verî,
Hezar defa hêfê, qewl û qîrarê verî,
Cîranan bar kerdo şiyê, a rindekîya xocî tey berda.

Nika dewede çar kêy mende, çar cîranê,
Jûbinî nas nêkenê, jûbinîde qal nêkenê,
Kanê a cîrantîya soxîne, kanê hevaltîya verî,
Cîranan, a cîrantîya verî, hevaltîya rindeke, tey xo berda.

Verde dewa Darebî ye de, nî honday, zanyarî bî,
Sebî, nî zanyaranrê, nî kamta şî, qey tepîya niyamay,
Zanyaran jî koç kerdo, îcî koçber biyê, zaf dûrî şiyê,
Cîranan a zanyarîya xo, rindekîya xo, welatparêzîya xo tey berda.

Ez dewera gêraya, mi verê xo da, warê Deate û Kalmemî,
Warê Axakûye û warê deşte û warê Kalmemî melûlo, kes çiniyo,
Mi da janîyanê xora, hey wax, hezar defa hey wax, wêrano,
Pepûg waneno, serê paganê waran, kanê cîranî, pes, dawar,
şuyani.

Ez şimara kamî perskerêne, kam mendoke, kes çiniyo,
Verde dewê ma, warê ma, to vatêne bacaro, zorbazan nêverda,
Kanê a govenda warê deşte, o cîrît kaykerdişê xwendîyan,
Cîranan govendejî, cîrît kaykerdene jî, bar kerda tey berda.

Ez ebe axînanê zere xo, qaytê waranê ma, dewanê ma kena,
Dewanê made, waranê made, kes nêmando, zorbazan kes
nêverdo,
Her ca îsîzo, cîran çiniyo, şûyane û gabanî çiniyê, têr qû nêkeno,
Pepûg halê welatê marê, cîranan rewra koç kerdo, dûrî şiyê.

Verde waranê made, wextê govende de, xort û kênan xo xemel-
nêne,
Wexto ke xort û kêni kewtêne govende, reng be rengbi, mordem
mest biyêne,
Nika ne warî mendê, ne xort û kêni mende, nê cîranî mende, kes
nêmando,
Ez coka vana, kamî pers kerêne, kamî pers mekerêne, dewande
kes nêverdo.

Ez oncîna jî, hevalanê mayê soxînanra, cîrananê welatparêzanra
vana,
Welat serê ma vile çewto, bêrêne ma piya, yagêrime welatê xo,
mevindêne,
Mi xirbanê waranê mara xêlî temaşe kerd, hey wax, no honday
însano delal amê şî,
Kanê ni kal û pîrê ma, xort û kêne ma, şûyane û gabanê ma
kanê, kes nêmando.

Ez warê mayê Kalmemî de, vecîya serê xirba warê ma, mi vengê
cîranan da,
Tew jüyêra veng nêvecîya, hey waxke, hey wax, mi hîna zanit ke,
kes çiniyo,
Cîranan rewra warê Kalmemîra bar kerdo şiyê, newa û jura nat
nîyamê ware,
Nîya ebe fek mordem şikîno zaf çîyan vacone, welatîrê zere mi
helîno, mordem tar beno.

Ez vecîya cayêde berz, ebe dil û can mi veng da, warê Kalmemî,
derê Fate, textê Kalmemî,
Zozanê warê deşte, warê Axakûye, warê Qerqetan, Karêro
rengên, xatirbe şima,
Ez ebe meymentiye ama welat şona, belkî ma defêna jûbînî

nêvînenîme, xatirbe şîma,
Welat şîrîno, no welato qedîm, rûhê mawo, roşnaha mawo, dil û
canê mawo, şoretê mawo.

Ti nika mira kamî persena, bê faydo, welate cîranan koç kerdo,
koçber bîyê,
Kewtê metropolan têde vila bîyê, honday gêra mi kes nêdî, ti
kamî persena,
Cîranan rewra verê zorbazanra, koç kerdo, pêrko koçber bîyê,
zaf dûrî şîyê,
Hergû jû welatêra vila bîyê, welat melûlo, serê ma vile çewto,
yagêrêne welat, axîna mawa.

04.10.2015

DARÊ Û KEMER ŞIMARÊ HELÎNO,

Gelê biran, gelê dayîkan, de ravazêne, mevindêne,
Serê bacarê Anqara mij û dûmano, ti vana axir zemano,
Qîre qîra xort û kênan, berbîşê dayîkan, zerê mordemî helêneno,
Ti vana axir zemano, darû kemerê çole şimarê helîno, tar beno.

Garê trêna Anqara, şahadê nî qetil xûrano, vanê mevindêne,
Nî xort û kênanê aşîperweranrê alîkarbêne, mevindêne,
Ewro, Hîpodrimê bacarê Anqara bîyo Kerbela, biheşnêne,
Jarîya şimarê dar û kemerê çöle helîno, dayîkê aşitîye şimarê
berbenê.

Vanê nî xort û kênanê dest henanrê biberbêne, nî şehîdê azadîy-
eyê,
Dayîkê şehîdan, biyê pepûg û goyîn, derdê jariya şarê welat-
parêzîrê berbenê,
Vanê nî xort û kênan, şimara çî waşt, nî qasidê aşitîyey û bi-
ratîyebî,
Jarîya nî qasidanê aşitîyerê, dar û kemer helîno, dayîkê şehîdan
berbenê.

Dayîkê şehîdan meyîtanê xo nasnêkenê, panc meyîtê şehîdan
nasnêbenê,
Kam daymîş beno, na jariya nî şehîdanê biratîyerê, alîkarbêne,
mevindêne,
Bêrêne ma, nî dayîkanê şehîdanê xora, pîya wayîr vecîme, bê
xêret mevindêne,
Jarîya nî qasidanê aşitîyerê, dar û kemer helîno, dayîkê şehîdan
berbenê.

Ey qetil xûrêne, bêbextêne, gonî werêne, no dewran şimarê jî
nêmaneno,
Şima senî qemîşê nî xort û kênanê, dest henan bî, gonî werêne,
bêbextêne,
Mordem qemîşê nî gorgeçinanê aşitîye beno, şima verdera qetil
xûrê, gonîwerê,

Şima jî naye rind bizanêne ke, rojê dora şima jî êna, naye rind bizanêne.

De vace sîstemo gonî wer, de vace, şimarê nayera tepîya, hewnê şewan jî çiniyo,
No honday qetlû qûtal şimarê nêmaneno, şima nayera tepîya mirdî nêwenê,
Bîr û bawarîya kesî ebe şima nêmanda, şima verdera, qetil xûrê, gonî werê,
Jarîya nî qasidanê aşitîyerê, dar û kemerê çöle berbeno, dayikê şehîdan berbenê.

No şaro qedîm, şaro welatparêz, şima rind naskeno, bîr û bawarîya kesîbe şima çiniya,
No honday qetlû qûtal, koçberîye, zindan, sîstemo qilêrî şarê ma, rind nas keno,
Xo mepesênêne, şarê ma şima rindek nas keno, vatenê şima, gewlê şima bêbextîya,
Şima jî naye rindek bizanêne ke, roj biboneke, dora şima jî êna, şimarê jî nêmaneno.

Sîstemo qilêr kenoke na qilêrîya nî qetil xûran bikerone vilê welatparêzan,
Ez şaranê welatîra vana, pê vatenanê nî bêbextan qan mebêne, nî şima qan kene,
Ewro roj tamamê aleme nî welatparêzanrê, nî qasidanê azadiyerê berbenê,
Jarîya nî qasidanê aşitîyerê, dar û kemere çöle berbeno, dayikê şehîdan berbenê.

No sîstemo bêbext, gonî wero, pê gonîwerîya xo jî, pesnan dano xo,
Bêbextêne, şima bacarê Anqare de, sed û di canî şehîd kerdî, bes niyo,
Nî qasêdê aşitîye, welatparêzê şarê xobî, şima senî qemişê nî mazlûman bî,
Jarîya nî qasidanê aşitîyerê, dar û kemerê çöle helîno, dayikê şehîdan berbenê.

Gonîya nî şehîdanê aşitîye, kolananê Anqarara sur kena, ti vana
Kerbelawo,
No sistemo gonîwer, verdera, pê na gonîwerîya xo pesnan dano
xo,
Nî gonîwerî nêverdanê ma pîya azad bime, pîya ser bilind bime,
Jarîya nî qasidanê aşitîyerê, dar û kemerê çöle berbeno, dayîkê
şehîdan berbenê.

23.10.2015

RINDEKÎYA WELATÎ

Rindekîya welatî, cîranê soxîné,
Rindekîya welatî, şervanê azadîye yê,
Rindekîya welatî, deşt û zozanê welatîyê,
Rindekîya welatî, axîna bav û kalanê mawa.

Welat ebe xort û kênan rindeko,
Welat ebe qom û qebilê xo rindeko,
Welat ebe serbilindîya şêr û egîtan rindeko,
Welat ebe azadbîna zonê xo, nasnamê xo rindeko.

Zozanê welatî, ebe hoka hoka, şûyanan rindekê,
Zozanê welatî, ebe lornayîşê bêrvanan rindekê,
Zozanê welatî, ebe sitrananê dengbêjan rindekê,
Zozanê welatî, ebe çirokanê, çirokvanan rindekê.

Çem û kanîyê welatî, ebe gûl û sosinanê, zozanan rindekê,
Çem û kanîyê welatî, ebe sewalanê çöle rindekê,
Çem û kanîyê welatî, ebe govenda şervananê, azadîye rindekê,
Çem û kanîyê welatî, ebe awa serdîna, zozanan rindekê.

Hêganê welatîra, toximê azadîye biramêne,
Verojanê welatîra, zimanra sewalê çöle azad bigêrêne,
Bira her cayê welatîde, şervanî adirê azadîye dadêne,
Bira xerîbê welatî, yagêrêne welat, adirê azadîye dadêne.

Rindekîya welatî xoserîya, azadîya, serbilindîya,
Rindkîya welatî, berbîşê dayîkan nîyo,
Rindekîya welatî kiştana xort û kênan nîya,
Rindekîya welatî, biratîya, azadîya, pîyabîna şarana.

Welatê roje, ti mirê çîqa rindeka, honday jî şîrîna,
Ti dermanê pêrkoyê birindaranê welatîya,
Ti marê axîna dayîkan, serbilindîya şervanana,
Welat ebe girêdayîşê biratîye, hevaltîye, cîrantîye rindeko.

NÎ HARBÎYÊ

Şarê Ferqînî ra, xezeb vareno,
Meskene Zembîl Firoşî ra, adir vareno,
Ewro des rojîyo, Ferqîn axirzemanî,
Nî zê vergê harîyê, harbîyê nêvîndenê.

Ti bacarê Zembîl Firoşî û siyapoşîya,
Ti serbilindê şarê xo, meskenê mêr xasana,
Nî kenêke destê xo berzêne, erz û eyalê Kurdan,
Naye rindbizanêne ke, no şaro qedîm bênamûs nîyo.

Bacaro qedîm, dîroka to zaf kana û qedîma,
Ewro roj, nî bêbextî, kolananê tora, siloganan nivisnenê,
No şaro qedîm, biratîye, aşitîye wazeno, bêbext nîyo,
Şima naye rindek bîzanêne ke, no şaro qedîm, serbilindo.

Harbîna şima, bêbextîya şima verdera esta,
Şima sawa text û tacê xo, timî birayê xo kiştê,
No şaro qedîm, biranê xo, cîrananê xo nêkişeno,
Alîkarbêne, ma na gonî bidime vinetene.

Ey welatparêzê aleme, şima qey vey nêkenê,
Ewro roj şarê Ferqînî, Sûr û Cizîre zûlmêde giran vînenî,
Defê sarê xo berzkerêne, qaytkerêne, nî zûlmî, bivînêne,
Nî zûlûmkarê, qetîlxûrê, nî gonîwerê, nî zûlmî bivînêne.

Çimê nî gonîweran tarî biyo, nî verê çimanê xo, kesî nêvînenê,
Nî serê parlementeranê Kûrdan ra jî adir varnenê, qaytkerêne,
Qetîl xûr, qetîl xûro, kumca beno bibone, gonîwer, zûlûmkaro,
Zûlmê nî zûlûmkaran bivînêne, vengê pêrkoyê welat-
parêzandêne.

Vacêne, ey qetîl xûrêne, gonîwerêne, şima çi harbîye, nêvîndenê,
No dem û dewran caran kesîrê nêmendo ke, şimarê bimanone,
Roj bibone ke, poşmanbîyana şima, bê fayde bena, rind bi-
zanêne,
Şima çi harbîye, qetîlxûrêne, hîn beso, gonîbe gonî, pa nêbena.

Vengê şervananê azadîye bilind êno, veng dano,
Vengê şarê welatparêzî danê, vanê mevindêne ,
Nî qetil xûrî ma kişenê, nî vengê ma, vatenanê ma biheşnêne, .
Bira aleme zûlmê nî zûlumkaran bivînone, biheşnone. beso
beso.

19.11.2015

BIVARE

Eyro roj zimistano, welatî kincê sipêy dayê xo ra,
Bivare, hûdî hûrdî, rindek bivare, wextê to amo,
Demserra zimistanî ke amê, her cayê welatî sîs keno,
Zimistanê welatî amo, welatî cilê xoyê sipeyê daye xora.

Demserra zimistanî de, dewanê welatî de, kes nêmaneno,
Zafêrî dewande di keye, çar keye, an jî şeş keye mendê,
Dewican rewra koç kerdo, verê zorbazan ra, dûrî şîyê,
Zimistanî, jû bimrone, kes çinîyo mezele, bikinone.

Zimistanê welatê ma bê meye û bê piyo û bê birawo,
Dewa Pircanan de, zimistanî teyna di kêy manenê,
Demsera zimistanî, koy çîqa bê kesê, dewê macî honday bêkesê,
Çimê dewican pirowoke, cîranê înan defêna yagêrêne welat.

Ewro pûkê zimistanî yo, hetêra va êno, heto bînra vare varena,
Kal û pîrê ke welate mendê, zaf bê omîdê, hey wax halê bêke-
sanrê,
Bêkesîye, weyîdiye û kalîye zora zaf zora, îlam jî derdê
bindestîye,
Welatê made dewande, demsera zimistanî xêl zor û zametê xo
esto.

Zimistanî wextoke va êno beno pûk, mordem xof keno,
Gaz û koy ti vana, vengê jûbinî danê, jûbinîde cengderê
De menale ke ti senî menalêne, mekalêne, meberbêne,
Dewicî rewşê xorê, bêkesîya xorê, jariya xorê berbenê,

Oncîna şano, vare dest kerdo piro varena senî varena,
Tew mabên ci nêdana, ti vana, emser tew nêvara,
De bivare, wextê to amo, xorê mirdî bivare,
Bivareke demsera amnanî de, çem û kanîyande aw zafbêne.

Her demsere wextê xode çîqa weşa, ticî zimistanî rindeka,
Wextê to amo, goş mede kedxûran, kedxûrî mordemî qan kene,
Ewro oncîna ti amabe xezeb, varena senî varena, ti vana tew
nêvara,
Çimê zozanan, çem û kanîyan, varana şimarawo, mirdî bivare.

Xêrî ser endî wextê to qedîyo, ti şona, ma xo vîrera meke,
Çimê zozanan, çem û kanîyan, têr û tûra şimarawo,
Zaf dereng mekûyêne, rameta xo rew rew marê birûşnêne,
Şo torê oxirbone, dereng mekûye, serêna oncîna bêrêne.

28.11.2015

DE TI VANA

De ti vana, de ti vana, de ti vana, ez rind zana,
Dert girana, bêderman a, de ti zana qey nêvana,
Ez xem kena, keserîna, ez uff kena, qahar bena,
Bêkesîme, weyîdîme, keserîna halê marê.

Wêran kerdo, adir no pa, welatê ma, talan kerdo,
Nî bêbextan nas bikerê, nas bikerê bitepişnê,
Ax wêrano, law wêrano, wêran kerdo, talan kerdo,
Welatê ma, bê hêvîyo, bê hêvîyo wayîr vecîyê.

De ti vana, ez rind zana, meke heval, meke heval,
No welatê mêr xasano, alîkarbe, wext nêmendo,
Cîrantîye, azadîye, biratîye, zaf rindeka,
Welatê ma, bê hêvîyo, bê hêvîyo, wayîr vecîyê.

Ax welato ti rindeka, ti rindeka zaf şîrîna,
Mî meşikne, mi hêrs meke, vile çewta, bê hêvîya,
Ez maşiqê welatîya, ez maşiqê Çewlîgi ya,
Welatê ma bê hêvîyo, bê hêvîyo, wayîr vecîyê.

Welatê ma Kûrdistan o, Kûrdistan o bar girano,
Welat baxçê egîtano, mêr xasano, şervanan o,
Ax welato ti şîrîna, ti zê axa dayîkana,
Welatê ma bê hêvîyo, bê hêvîyo wayîr vecîyê.

De bê bira, de bê bira, de bê bira ti rind zana,
Ti rind zana qey nevana, qey nevana, ma xapnena,
No welatê ma Kûrdano, ma Kûrdano derd girano,
Welatê ma bê hîvîyo, bê hêvîyo wayîr vecîyê.

Welat kanîyê şervanan o, şervanan o derd giran o,
Ax welato ti şîrîna, ti zê axa dayîkana
De ti vengde, de ti vengde, de ti vengê şervanan de,
Hêvî bibê, wayîr vecîyê, şervanê ma, mêrxasê ma.

Botan, Xerzan, şer girano, Dêrsim meskenê hevalan o,
No welatê mêr xasan o, egîtan o, şervanan o,
Bêbext mebê, alîkar bê, alîkarbê wext nêmando,
Hêvî bibê, wayîr vecîyê, mêr xasan rê, şervanan rê.

28.11.2015

ZÎNDANÊ XALFETÎ

Ez ewro meymanê zîndanê Xalfetîya,
Ti navçêde kewnara, dîrokîya, serbilinda,
Axa birêz Ocalanî, warê şêr û egîtana,
Ez ax û hesretê axa xowa, welatê xowa.

Ewro kevokanû çûçikanê zîndanî jî, silam da mi,
Ti xêr ama, xerîbê welatan, ti xêr ama
Na axa qedîme, axêde zanyara, her kesîra vana, bira,
Ti birayê mawa, hevalê mawa, meymanê mawa.

Şima, herçî kevokî û çûçikî, mara metersêne,
Ma şimara heskenîme, şima şênatîya mayê,
Ma wazenîme, her zîndî, xoserbone, azadbone,
Şima şênatîya mayê, riindekîya welatê mayê.

Cêrê ma çemê Feratî derbaz beno,
Virnîya çemî gorita, çem jî zê ma xo ser nîyo,
Mordem radî keno ke, awa çemê Feratî ra temaşekerone,
Çemê Feratî jî wazenoke, ebe azadîye bimeşone.

Çemê Feratî, ti şoretê welatê mawa, rûmetê mawa,
Ma jî wazanîme, ti xoser bimeşêne, ti xo ser rindeka,
Xo serîya to, xo serîya mawa, azadîya welatê mawa,
Çemê Feratî jî zê ma ocî, berbeno, naleno, halê xorê.

Dîrokîya navça Xelfetî jî, binê bendavê awede menda,
Minarê mîzgefta Xalfetî, henî mîyanê awede aseno,
Zê na mîzgefte, xêlî dîroka Xelfetî binê awede menda,
Nî raste rast wazenêke, dîroka ma, şaristanîya welatê ma vindibone.

Naye rindek bizanêneke, şima nêşkînê şaristanîya Kûrdan vindikerêne,
Na şaristanîya Mezopatamya, teyna ê şarê Kûrdî nîya,
Na welat te kamî jîyana xo berdewam kerdase, ê ma pêrkûnewa,
Beso, beso, beso, hîn beso, asîmîlasyonê şimarê, înkâr kerdena şimarê beso,

04.01.2016

SÎSTEM O BÊAR

Ti demê Osmanyen ra heyen roja ewroyê, zê xo kaykena,
Pêrkoyê aleme, xo kerdo qadê biratiye, qadê aşitiye,
Ti hîna zê verî kaykena, zê verî xeta xo berdewam kena,
Ewro roj, no şaro qedîm, pê vatenanê şima qan nêbeno.

Şima sawa text û tacê xo, biranê xo kişenê,
Ewro roj, şima biranê ma, xort û kênanê ma, kalanê ma,
Domananê bêşige, bê sûc, bê xeta qetil kenê,
Şima nî şarê mayê qedîmîra, vanê terorîst.

Ewro roj kolananê bakûrî de, şer girano,
Şima ebe topan, tanqan kewtê kolananê bakûrî,
Kam veciyone kûçan, şima kişenê, cira vanê terorîst,
Kamî heşno, kamî dîyo ke, mordemo mazlum bîyo terorîst.

Namê qetlû qûtalê şima, aelemera vila bîyo,
Pêrkoyê dewletan, nî rewşê şima zanê,
Kes tewera şimara rind nêvano, şima qetil xûrê,
Şima mûsê qetil xûranra vanê bira, mazlûmanra vanê terorîst.

O kamo ke vano biratiye, aşitiye, demoqrasî,
Şima îra vanê terorîst, îra vanê bêbext û xayîn,
Defê qaytê bêbextiya xokerêne, înkarkerdena xokerêne,
Şima mazlûmanra vanê terorîst, gonîweranra vanê bira.

Sistem o bêar, teyna şimarê nê, ma pîya rindekîme,
Bêrêne ma destê xo bidime jûbînî, pîya azadbîme,
Şima qey defê kemasiyanê xo nêvînenê, serfiraz nêbenê,
Beso mazlûmanra mevacêne terorîst, vacêne bira.

Ma şima de qada aşitiyede, biratiyede benîme bira,
Na mordem kiştena xo caverdêne, ma biratiye wazenîme,
Şima pê neyaran rayera şonê, na neyartiya xo caverdêne,
Sistemo bê ar, bêbextiya xo caverdêne, biratiye qezenc kena.

13.012016

AX CÎZÎRA BOTAN... AX!

Cîzîra Botan, ti axa Kurdan, paytextê Bedîrxanî bîya,
Meskene Memê Alan, Zîna Botab bîya,
Ti mîrasê Amedê Xanî, Meleyê Cîzîrî û ronakbîrana,
Ewro roj, fermanaran, fermanê Cîzîre, Silopî û Sûrî veto.

Vace Cîzîr vace, ti ewro bê omîd menda,
Mordem welatê xode, bê omîd bimanone zoro,
Cîzîre axa Kûrdan, meskenê Orhan Doxanî û ronakbîrana.
Ti mîrasê Amedê Xanî, Meleyê Cîzîrî û ronak birana.

Serê, Cîzre, Şîrnax, Silopî û Sûrî axir zemano,
Gonîweran, şer giran kerdo, serê Kûrdan,
Ti vana axir zemano, cîran nêreseno cîranî,
Fermanaran fermanê Cîzîre, Silopî, Şîrnax û Sûrî veto.

Ey bacarê dîroka ma, axa ma, ti şahadê nî gonîwerana,
Heval memet Tûnç ebe bîr û bawariya xo, veng dana, qaytk-
erêne,
Mevîndêne, bivînêne, nînan fermanê şarê mazlûmî veto,
Ti Cîzîra Botan, axa şehîdan, meskenê Memê Alan, Zîna Botana.

Birîndarî, zibenê, nalenê, vengê ma danê,
Vanê, ma rareynêne, ma birîndarîme, alîkarbêne,
Nî ma vêşnenê, bêbextan her cade şer giran kerdo,
Bira welat pêrko, vengê nî birîndaran biheşnone.

Taxa Sûrîde vîst û heşt, hevalî birîndarê, rareynêne,
Nî birîndarî mara alîkarîye wazenê, şeş hevalî şehîd kewtê,
Ma hîna vîst û di hevalî birîndarîme, alîkarbêne, ma rareynêne,
Mordem daymişê nalînanê, nî birîndaran nêbeno, biheşnêne,
alîkarbêne.

Telefonde vengê nalînanê birîndaran êno,
Vengê nalînanê birîndaran, mordemî helênenno, tar keno
Mordem daymişê nalînanê birîndaran nêbeno,
Ey mafê mordemanê aleme, nî nalînanê birîndaran biheşnêne.

No dewran dewranê bêbextano, dizdano, ê gonîwerano,
Nî caran gonîra, mird nêbenê, gonîbe gonî pakenê,
Herçî gonîweran ra mevacêne însan, nî vergê harê,
Nî harbîyê mordemî wenê, peynîyede jî jûbînî wenê.

Sûrde, Cîzîre de, Silopî de, Şîrnax de vergi har bîyê,
Fîrsend medêne nî verganê haran, nî mordemî wenê,
Peynîyede jî har bene, jûbînî wenê, nî gonî werê,
Meskenê Memê Alan Zîna Botande, ser bilind vindêne.

Ax Cîzîra Botan ax, hezar defa, ax û hey wax,
Ti axa Bedîrxanan, meskenê Memê Alan, Zîna Botan bîya,
Cîzîre, Silopî, Sûr û Şîrnaxde, şervanan veng bilind kerdo,
Vanê bira aleme, nî qetil xûran, gonîweran nas bikerone.

De vacêne, bêbextêne, şîma welatê mara çî wazenê,
Ma sawa axa xo, zonê xo, nasnamê xo, şer kenîme,
Şîma çîyê xo vindî kerdo, qey şîma nêvînenê bêbextêne,
Ewro roj serê şarê Kûrdî, şer girano, ti vana axir zemano.

Têr û turan ref do gêrê, serê Cîzîre ra qîşte qîşta,
Vanê mekerêne, şîma nî şarê qedîmîra çî wazenê,
No dewrano qilêr, şîma bêbextanrê jî nêmaneno,
Nî har bîyê, mordemî wenê, peynîyede jî jûbînî wenê.

28.01.2016

ŞİMA AXÎNA MINÊ

Ez hîndayê ax û hesretê şimawa,
Şima qey mi nî xem û xîyelande verdanê,
Sebeno defê bêrêne, ma jûbînî bivînime,
Dayîka Pakîza na ax û hesretede meverdêne.

Mi hîndayê ke raya şimara qayt kerdo ke,
Endî hurdmîne roşnahê mi, lêl kene,
Zerê dayîka şima, zê ronê tawîke qijeno,
Sebeno mi na ax û hesretede meverdêne.

Usaro wextê zozanan amo, xerîbê welatan ênê,
Heval û hogirê şima jî, ref be ref ênê, şima tey çinîyê,
Ez mîyanê hevalanê şimade qayt kena, şima nêvînena,
De berêne, mi na ax û hesretede meverdêne.

Ez kamecî kar û güre bikerêne, şima vîra miderê,
Xemê mi, xîyalê mi, vînîtena şimawa, de bêrêne,
Kanê şima soz dabî mi, ma to na axede nêverdanîme,
Gulsima mi, Fayka mi, bêrêne, mi na ax û hesretede meverdêne.

Dayîka Pakîza, şima gorgeçinanê xorê, ax û întîzara,
Şima serbilindê mine, roşnaha çimanê mine,
Ez nêweşa, ax kena, lornena, of kena sawa şima,
Gulsima mi, Fayka mi, bêrêne ma, defe jubînî bivînime.

Dayîka şima, sawa hurdmîne gorgeçinanê azadîye,
Lal bîya, nêweşa, hewnê şewan jî, berbena sawa şima,
Ez hurdmîne dest henanê xorê berbena, lornena,
Gulsima mirê, Fayka mirê, na rewşa mirê bilornêne.

Ez honday ax û hesretê şimabîya, berxêne,
Ez birîndara, bê dermana, lome mekerêne,
Ez birîndarê hurdmîne azebanê xowa, dest henanê xowa,
Ez ebe ax û hesretê şima, ofînanê şima birîndara.

SÛR XEMGÎNO

Ewro newayê û di rojîyo,
Hewrê sîyayê gêrenê serê bacarê Sûrî,
Dû darîno we, serê kezeba Kurdan,
Ti vana axir zamano, Sûr bê kes mendo.

Sûr paytextê Kûrdano, roşnaha Kûrdano,
Nasnamê Kurdano, zonê Kurdano,
Ewro wextê vinetene nîyo, mêrxas vindêne,
Nî gonî werê, qetil xûrê, gonîbe gonî şûnê.

Ey mafê mordemanê aleme,
Şima qey nî qetil xûranra nêvanê beso,
Şima nî qetlû qutalê nînan nêvînenê,
Hîna çîqa Kurdê mazlûmî bêrêne kiştene.

Dayîkê Sûrî veng dane, ma birîndarîme,
Nî birîndaran rareynêne, mevîndêne,
Alîkarîye wazenê, Sûr vêşeno, adir no pa,
Nî qetil xûrê, gonîwerê, mûsê, gonîbe gonî şûnê.

Nî qetil xûran fermanê ma veto,
Amê xezeb, kam verkûyone kişenê,
No ferman cora amo, Paytextra amo
Nî gonîwerê, nî qetil xûrê, gonîbe gnî şûnê.

Ma ferman nêwazenîme, şer nêwazenîme,
Aşitîye wazenîme, biratîye wazenîme,
Ma pîya rîndekîme, pîya zazdîme, pîya serbilîndîme,
Vîndêne ma pîya jîyanêde azade bimeşîme.

De bêrêne, ma pîya, tey kewranê azadîye bimeşîme,
Nî qetil xûran û gonî weranra vacime hîn beso,
Nînan Sûrde, Cîzîrde, Silopîde şarê ma qetil kerdo,
Bêrêne ma nî qetlîamê, nî qetil xûran bidime vinetene.

Qomûtan Çîya Ger bilind veng dano,
Vengê şarê welat parêzî dano, mevindêne,
Ser bilindîya Sûrîrê alîkarbêne, xurt vindêne,
Sûr axîna Kurdano, Paytextê Kurdano, zon û nasnamê Kurdano.

02.03.2016

ZERRÎYA XO CAMEVERADEYENE

Meşorêne, meşorêne,
Welat ca meverdêne,
Axa mordemî, zerya mordemîya,
Axa xo, zerîya xo, ca meverdêne.

Mordem axa xora kewt dûrî,
Macîr beno, bê hêvî beno,
Ma ne koçber benîme, necî macîr benîme,
Axa xo, zerîya xo, ca meverdêne.

Mordem axa xora kewt dûrî,
Macîr beno, bê hêvî maneno,
Ne koçber bêne, necî macîr benê,
Axa xo, zerîya xo, ca meverdêne.


Hewnê mi nêno,
Zerîya mi decena,
Qom şîrîno, bê hewn manena,
Axa xo, zerîya xo, cameverdêne.


Dewran dewranê, qetil xûrano,
Dewran dewran, gonî werano,
Dewran dewranê, cerdewanano,
Axa xo, zerîya xo, ca meverdêne.

Welatê ma, kezaba mawa,
Welatê ma dayîka mawa,
Welatê ma axa mawa,
Axa xo, zerya xo, ca meverdêne.

Axa xo, terk mekerêne,
Cîrananê xo, qomê xo, ca meverdêne,
Welat evîna mawa, dayîka mawa,
Axa xo, zerîya xo, ca meverdêne.

03.05.2016







Wendekarê mayê ercayî, Weşanxaneyê J&J yew kitabê kirdkî newe reydi hemvere şima do... Nî xebatê yew het ra kirdkî benê aver yew het ra zi hîson de.vateyon de nuştoxon de kirdkî rî tercûmanê kena.Ma zanayene ke tewir na xebat çina beno va bibo rencê nuştoxon ma veng nêşona. No qayide kitabî ke ma newe çapkerdo aye semedê zi biviyarte yo...

Nî kitabê helbestî de nuştoxê ma hîsê xo erdê ziwana.... Rojeve ma ra zafê çiyî ancina erdê ma vîr... Nî hîsê nuştoxê yew tewir hîşmendîyê ma wendekaronê zi yo.Na semedê ra ma nî xizmetê ke done wendekaron xo ercayo, ma peyî na xebatê.na xizmetê zafê zi keyfweş benê.

Ma na xebata ercayâ semedê nuştoxê xo Halîs YURTSEVERê ra vone ke berxudarî bî bîrêz Halîs.... Wendoxon xo re zi serfirazê wazene ma....

J&J

